

APOLOGIÆ
PATRUM SOCIETATIS,
CONTRA

Censuram Lovaniensem & Dua-
cenlem,

Conscriptæ circa annum 1588.

Quibus hic accedit brevis descriptio
exordii & progressus totius
Controversiæ,

*Ab iisdem Authoribus fideliter
concinata.*



LEODII,

Apud Henricum Hoyoux. Anno 1634.

THE
MAY 1861

THE
MAY 1861

THE
MAY 1861

THE
MAY 1861

THE
MAY 1861



THE
MAY 1861

THE
MAY 1861

RESPONSIO AD CENSURAM

Facultatis Sacræ Theologiæ
Lovaniensis.

P R Æ F A T I O.

CVM nobis à Facultate Theologica quadam ex nostris lectionibus ab Auditoribus exceptis desumpta, fuissent oblata, tanquam in eis contineretur, quod offendere posset, rogavimus aliquoties Facultatem, ut duos dignaretur deputare, qui nobiscum de istis coram Arbitris hinc inde à partibus deputatis agerent. ut ita & ipsi nostras, & nos illorum sententias, & quæ inter nos esset discrepantia, intelligeremus, & à labore scribendi & replicandi, qui in infinitum tendere solet, supersederetur. Animadvertēbam enim, multa non esse intellecta, multa in alium sensum accepta, pleraque etiam ita à suis locis avulsa & detorta & imperfecte mutilèq; posita, ut intelligi commodè nequirent, omisissis præsertim illis, quæ ad explicationem illorum pertinebant. Sperabam itaque fore, si coram ageretur, ut singula clare aperirentur, & Magistri Nostri nos de singulis

Præfatio

gulis sententiis & verbis, si videretur, interrogarent, quid sentiremus & quemadmodum explicaremus; & nos vicissim ab illis, sicubi esset dissensio. Hac enim videbatur facillima via incunda concordia, præsertim cum nostra dogmata non sint nova neque privata; sed omnibus sæculis jam inde ab Apostolorum temporibus in Ecclesia defensa, & penè ab omnibus Patribus explicata, & hæc maximè tempestate apud omnes usitata, qui contra hæreticos de libero arbitrio disputant. Inter quos & D. Ruardus, qui hujus Universitatis, cum maximè floreret & studiosorum numero & integritate doctrina, columna erat: Item D. Driedo, & D. Adrianus Papa, & Reverendissimi, Dilectissimiq; Episcopi D. Cuncerus & D. Martinus Rithovius, ut mirum sit Dominos Censores dicere hæc dogmata esse offensiva, peregrina & periculosa. Itaque non sperabam se difficile convenire, si hanc controversiam sine scriptis coram aliquibus deputatis diceptare concederetur. Sed quia non placuit Facultati hanc rationem inire, sed scripto agere (quam ob causam nescio) necessitate compulsus quantum opus fuerit, scripto respondendo.

Sed primò advertendum est, exceptis propositionibus de Scriptura, qua postea adjuncta sunt

Præfatio

sunt , controversi in nostram in quatuor consistere questionibus.

1. Vtrum omnes homines post lapsum ex parte Dei habeant sufficiens auxilium, quo possunt peccata vitare , item à peccatis resurgere & salvari ?

2. Utrum parvuli , qui moriuntur ante Baptismum , ita à Deo sint reprobati , ut ipse per se eorum impediatur salutem & applicationem remedii, ordinando & disponendo omnes causas naturales & liberas, ut illis non applicetur remedium salutis; an verò Deus iusto suo iudicio permittat remedium non applicari , sinendo res naturales & liberas agi suis propriis motibus ? *Vt loquitur Augustinus.*

3. Utrum homo sufficienter excitatus & præparatus ad fidem vel ad conversionem per gratiam excitantem & prævenientem , possit credere vel non credere, converti vel non converti sine nova gratia, quæ præveniat ejus consensum , & faciat illum consentire , ita ut illâ positâ non possit dissentire & sine illa non possit in effectu consentire. *Quod sic clarius explicatur:* Utrum duobus & juxta excitationis & præparationis per gratiam Dei, fieri possit ut alter credat, alter non credat , sine ulla nova gratia præveniente & efficaciter præoperante

Præfatio

operante ipsum credere in eo qui credit, solum quia hic ita præparatus vult, ille non vult?

4. Utrum omnia, quæ fiunt, efficaciter sint præordinata à Deo, ante omnem omnium præscientiam?

In his omnem nostrorum dogmatum controversiam sitam esse, mihi facti sunt duo Magistri Nostri, qui præ cæteris in nostris sententiis examinandis & refutandis laborarunt: & perspicuum etiam est ex propositionibus hæc collectis, item ex testimoniis & rationibus, quæ contrarias adferuntur.

Ob has quæstiones, quia aliud sentimus, Magistrum Nostri putamur totam D. Augustini doctrinam evertere; & ideo tam gravis contra nos instituitur declamatio. Itaque vitanda prolixitatis causâ commodius fuisset, istas propositiones rescriptis, supervacaneis, per se examinare, an aliquid offensionis contineant, vel certè eas ad Sedem Apostolicam mittere, ut ipsa de his iudicium ferret. Verùm nec hoc placuit Magistris Nostri. Itaque breviter respondebo, & primum ad præfationem.

RESP.



R E S P O N S I O

Ad Praefationem.

IN praefatione primo vocantur dogmata nostra *peregrina*, *offensiva* & *periculosa*, quæ valde dura est censura, praesertim non auditâ parte, quæ id desideravit & rogavit. Quod si talia fuerint deprehensa & iudicata ab eo, qui etiam extra Concilium generale controversiarum est infallibilis iudex, id est à Sede Apostolica, paratissimi sumus ea mox revocare; nos enim filij sumus Sedis Apostolicæ, cujus iudicio nobis in omnibus parendum esse duximus, à cujus definitione ne latum quidem unguem recedemus. Sed quomodo possunt esse *peregrina*, cum D. Ruardus hujus Universitatis columen & ante aliquot annos docuerit, & ex parte etiam Driedo & Adrianus Papa, & ante paucos annos Reverendissimi Episcopi D. Cunerus & D. Rythovius? Non esse autem *offensiva* vel *periculosa*, patebit ex responsionibus.

Secundò, & hæc dogmata inter communes auditores & discipulos disidia, ac partium studia generasse.

Resp. Si quæ contentio inter illos orta est, ideo orta est, quòd quidam Magistri Nostri sententias nostras clroneas, alij etiam hæreticas & Pelagianas dicerent, has nempe: *omnes habere sufficiens auxilium ex parte Dei. Hominem viribus nature posse invocare Deum ut authorem naturæ. Hominem sufficienter excitatum & praparatum posse converteri sine nova gratia, quæ facias ipsuin converteri & consentire.* Quod cum à quibusdam studiosis esset exceptum & nostris auditoribus oblatum, conati sunt quidem istas sententias tueri, & ita verum est ad disputationes. Monuimus tum statim nostros, non esse internos & Facultatem animorum dissensionem: itaque nec inter ipsos esse debere, & proinde oportere cum modèstia, non condemnando alterutram sententiã inter se conferant. Et quamvis quidam Authores, qui hæc tempestate contra hæreticos scribunt, graviter contrariam sententiã incessant, nos tamen contra illam nihil acerbius censuimus, sed simpliciter nostram propositimus & confirmavimus, contrariã sententiã in genere dumtaxat refutatã; ignorabamus

bamus enim eam à Facultate teneri. Itaque à nobis nulla data est occasio, cur studiosi in partes discederent, nec jam puto ullarum partium studia inter illos esse.

Tertiò, multa dicuntur de authoritate D. Aug. & ita traducimur, quasi nos nitamur totam ejus doctrinam de gratia & prædestinatione evertere. Immò semper professus sum, me sequi doctrinam D. Augustini de prædestinatione & gratia sufficienti & efficaci: solum visus sum ab eo recedere in questione de electione immediata & absolutâ ad gloriam; dixi enim efficacem & absolutam voluntatem dandâ gloriam esse posteriorem ratione, quàm sit prævisio meritorum. Et quia quidam putant, Augustinum sentire contrarium, scilicet Deum antè omnem prævisionem quasi in primo rationis signo omnes salvandos elegisse voluntate absolutâ ad gloriam, & in secundo signo præparasse media; ideo dixi in lectionibus meis: contraria sententia tribuitur Augustino; ego enim dubitabam, an revera hoc Augustinus sentiret: unde non fui ausus dicere absolutè, sententiam esse Augustini.

Postea tamen obortâ hâc controversiâ, loca Augustini accuratius expendi, & non deprehendi aliquem, ex quo possit

4 *Prefatio*
convinci, D. Augustinum hoc sentire.

Itaque teneo, Augustinum etiam hac
in re nobis non adversari; hac enim ratio-
ne concillatur cum pluribus Græcis & al-
liis qui fuerunt ante Augustinum, qui
omnes tenent (ut ostendi in lectionibus)
præparationem gloriæ esse ex prævisis me-
ritis. Sic eos conciliat Tapper, a. 7. Dri-
edo fol. 34. de concordantia liberi arbitrij.
Sic etiam facilius explicamus rationem
meriti & liberi arbitrij contra hæreticos,
qui istam contrariam sententiam avidissi-
mè sunt amplexi, & ex ea meritum & li-
borum arbitrium conantur evertere. Vide
Calvinum lib. 3. cap. 21. & præsertim
22. §. 1. 2. &c. & 9.

Quarto, dicitur, nos asserere, Græcos Pa-
tres esse contrarios D. Augustino in su-
pradieto argumento.

Rēsp. Hoc non esse verum. Imò pu-
ramus & dicimus, D. Augustinum de
auxilio sufficiente & efficaci, & de præ-
dest. omnino consentire cum Græcis;
hanc tamen propositionem, scilicet electi-
onem ad gloriā esse ex prævisis meritis, esse
apertè sententiam Græcorum, quod patet
ex D. Ruaro Tappero & Driedone, &
nos ostendimus satis multis testimonijs.
Contrariam verò sententiam dicebamus

tribui Augustino ; nunc autem putamus, nostram esse D. Augustini. Id si tamen non esset, nihil sanè periculi esset, ut aliàs demonstravi : sicut etiam quidam ex MM. NN. putant, D. Augustinum sentire, non omnibus dari sufficiens auxilium, ut resistent peccato. Item necessitatem peccandi quæ ex peccato originali vel actuali oritur, non excusare à peccato ; quæ tamen excusaret, si ex peccato orta non esset ; & peccatum, quod pœna est peccati, non solum à Deo esse permissivè subtracto auxilio, sed etiam tanquam directè intentum & ordinatum, ut per illud majori cæcitate præcedens peccatum puniatur.

Similia possent adferri, quæ à multis tribuuntur D. Augustino, qualia sunt 75. propositiones damnatæ à duobus Pontificibus ; quarum plerasque dicebant earum Authores esse D. Augustini. Et si verum est, hæc esse D. Augustini, nihil sanè periculi, si in quibusdam receditur à D. Augustino. Quamquam mihi satis certum sit, D. Augustinum nihil horum sentire. Quamvis enim obscurè loquatur, si quis tamen scopum ejus spectet, ac alia consideret, non erit admodum difficile ostendere, Augustinum hæc non sentire, & ubi aliud dicere videretur, eum piè explicandum.

Eodem modo dicendum de propositione hac, *electionem absolutam & efficacem ad gloriam esse ex praevisis meritis*, D. Augustino non repugnare; quia D. Augustinus praelectionem vocat, non preparationem gloriae, sed gratia, qua certissime liberantur quicumque liberantur, & hanc ostendimus esse ex nullis praevisis meritis, sed ex voluntate sola Dei cui nullo modo repugnat, *electionem absolutam ad gloriam esse ex praevisis meritis*, ut infra ex Ruaro ostendemus.

Non ergo oportebat ita generatim nos traducere, quasi D. Augustini doctrinam de gratia & praedestinatione, quam contra Pelagium tradidit, nitamur evertere: hoc enim falsissimum est, nam nos illam ad unguem in omnibus ijs, quae ad gratiam & praedestinationem pertinent, sumus secuti, ut ex istis propositionibus & responsionibus ad censuras patebit. Cum enim omnia hinc inde contraria sint ex nostris lectionibus, quae aliquo modo videbantur esse contra D. Augustinum, cum ostendero, ne haec quidem D. Augustino adversari, sed ex intima ejus doctrina deprompta esse, patebit, doctrinam nostram D. August. sententiam non evertere.

Itaque de intelligentia D. Augustini

inter nos controversia est; non autem an Augustinus sit sequendus. Sed quid, quæso, periculi est, si in aliqua particula, cum plurimas quæstiones ista materia complectatur, à D. Augustino recedatur? v. g. si sentiam, *prædestinationem esse factam ante prævisum peccatum originis* cum D. Thoma, Soto, Alexandro, alijsque pluribus, quod tamen est contra D. Augustinum. An ideo doctrina mea debebit esse suspecta; quia nimirum in aliqua quæstione pertinente ad materiam de prædestinatione recedo ab Augustino; quem Cælestinus dicit, non tantum necessarium modum non excessisse; sed etiam inter optimos Magistros à suis prædecessoribus habitum; nec ullo umquam sinistrae suspicionis rumore aspersum? Quasi verò D. Thomæ doctrina non sit etiam luculentissimis testimonijs Summorum Pontificum & præclarissimarum Universitatum commendata: ergo neque à D. Thomalicebit in aliqua quæstiuncula recedere. Et quia Cælestini elogium de D. Augustino adfertur, quasi propterea ab Augustino in nullo liceat dissentire, legatur quod habet Cælestinus in fine illius epistolæ: *profundiores verò, ait, difficilioreſq; partes occurrentium quæ-*

sionum, quas latius tractarunt, qui hære-
cū resistunt, sicut non audemus contem-
re, ita non necesse habemus asserere. Ubi a-
pertè ait, se de abstrusionibus, quæ inter
disputandum cum hæreticis obiter solent
occurrere, nec necessariæ sunt ad hære-
sim confutandam, nolle quidquam defi-
nire: atqui nihil facit ad refutandam hæ-
resim Pelagii, sive dicas in primo signo
rationis omnes salvandos esse efficaci &
absolutâ voluntate; & immediatâ ele-
ctione electos ad gloriam ante omnem
prævisionem & conditionatum; & in 2.
instanti ad gratiam prædestinationis; sive
dicas, in primo signo ad gratiam præ-
destinationis, in secundo ad gloriam ele-
ctos esse, ut patet cuius mediocriter in
Theologicis dogmatibus versato. Imò
facilius refutabis hæreses nostri temporis,
si teneas talem electionem efficacem &
immediatam ad gloriam, ante omnem
prævisionem factam non esse. Atqui hoc
totum est, in quo visus sum à D. Au-
gustino recedere; nam in aliis omnibus
ex professo D. Aug. secutus sum. De
qua quæstione cū rogarem quemdam
M. N. qui contra nos scripserat, quid
Facultas sentiret, respondit se nescire, &
exceptâ quæstione de gratia efficaci non
posse

posse inter nos magnam controversiam esse. Hæc dico, non quod in hac quaestione à D. Aug. dissentiam (quia penitus me secundum ipsius doctrinam docuisse puto, ut assertiones istæ, quæ contra D. Augustinum esse putantur, & nostræ responsiones declarabunt) sed ut res suis momentis æstimetur, nec ita generatim clametur, everti doctrinam Augustini.

Quintò, dicitur nos renovare sententias Massiliensium, & aliorum per Gallias D. Augustini doctrinæ obstrepentium, item Catharini & Pighii, deinde ponuntur sententiæ illorum. Ad quod respondeo, hoc falso nobis obijci. Imprimis quod attinet ad sententiam Catharini, qui illum legit, facile videt, quam longè ab ejus sententia absumus, quod etiam in meis lectionibus ostendi. Ipse enim ait prædestinationem absolutam esse & efficacem voluntatem dandi gloriam: nos cum Augustino dicimus, esse *preparationem gratiæ*. Secundo, vult hanc voluntatem esse priorem ratione, quam sit voluntas dandi gratiam: nos contra probabiliter putamus, voluntatem dandi gratiam priorem debere censi & absolutâ & efficaci voluntate dandi gloriam.

Tertio ipse vult multos salvari non prædestinatos : nos contra nullum non prædestinatum salvari. Quarto, ipse ponit duos ordines salvandorum, prædestinatorum & non prædestinatorum : & nos omnes salvandos dicimus esse prædestinatos. In hoc solum Catharino consentimus, quod ipse velit, multos electos ad gloriam esse ex prævisione operum, quæ per gratiam Dei erant futura, quod nos putamus de omnibus dicendum. Item putat omnibus dari auxilium sufficiens, ad quæ etiam adduximus Albertum Pighium, quod non debet nobis vitio verti, nam in istis nemo umquam dixit illos errasse ; nam plurimos alios citavi, qui idem sentiunt. Quid autem ad primam Massiliensium querelam attinet, nihil mihi unquam tale in mentem venit : nec propositiones collectæ aliquid præ se ferunt.

Ad secundam, nunquam dixi gratiam Dei, quæ prævenit nostra merita, dari ex aliquo in nobis præviso merito, aut prædestinationem esse ex præscientia aliquorum quæ in nobis sunt, neque dixi hoc aliquem Patrem sentire, quod est aperte hæreticum : imò longâ questione docui contrarium. Neque huc repug-

nat. quod doceam, prædestinationem præsupponere præscientiam conditionatam, nam id aperte docet Augustinus. Nec refert, quod locum illum *Iacob dilexi*, *Esau odio habui* aliter exposuerim, quam D. Augustinus; secutus sum enim expositionem faciliorem, & quæ magis favet libero arbitrio, idque propter hæreticos hujus temporis, secutus in eo Patres Græcos & Ambrosium & Hieronimum, qui ob eandem hæresim quæ modo viget & tunc vigeat, locum illum ita exposuerunt, quæ tamen expositio non repugnat Augustino, ut satis ostendit Driedo & Tapperus a. 7.

Ad tertiam, 4. 8. 9. 10. satis fusc ostendi prædestinationem & gratiam prævenientem concordare optimè libero arbitrio. Si tamen talis inducatur prædestinatio, quâ absoluta voluntate ante omnem præscientiam etiam conditionatam, omnes actiones humanæ cum omnibus suis circumstantiis sint præordinatæ, qualem inducit Calvinus, dixi difficile esse salvare liberum arbitrium, ex hoc enim principio potissimum tollit Calvinus liberum arbitrium, & sanè mihi difficile videtur ei respondere. Hæc etiam sententia facile homines ad torporem & desperationem

Calv. lib.
de prædest.
fol. 33. ne
una quidē
syllabā in
quæst. de
prædest. &
reprob. ab
Aug. se ait
dissentire,
sed pro fu-
o more
mentitur.

impelleret, & parum præceptis & exhortationibus videtur loci relinquere. Dico tamen sententiam hanc non esse D. Augustini, sed Calvinī, qui eam Augustino falso imponit, qui etiam multum laborat, ut ostendat homines non in desperationem impellere, & exhortationes & comminationes & præcepta locum habere.

Ad 5. & 6. nihil est in propositionibus istis aut scriptis nostris, quod vel speciem habeat cum istis sententijs.

Ad 11. solum dicimus, illam sententiam quæ asserit non omnibus dari auxilium sufficiens, non videri satis consentaneam esse Scripturis quæ dicunt pro omnibus mortuum esse omnium Redemptorem.

Ad 12. de parvulis nihil, opinor, sentimus contra Augustinum, cum hæc ita se habere, quivis qui nostra diligenter legent, facile perspicere possint. Mirum est, nobis has sententias objici, & asseri nulla ferè alia in scriptis nostris dictatisque reperiri. Quod si ita est, mirum est, à MM. Nostri in hac censura non esse posita & demonstrata, cum tamen hæc sint valde offensiva. Sed satis patet tum ex lectionibus nostris, tum ex ipsis propositionibus & meis responsionibus, falsò hæc nobis imponi.

Post

Post hæc ponuntur aliæ sententiæ Massiliensium, ad quas videantur nostræ prope accedere. Itaque ne longior sim, quia hoc in genere tantum dicitur, nec adferuntur nostræ propositiones, quæ his videantur affines, respondebo suis locis, ubi etiam ostendam, quomodo fides sit donum Dei, & nihil eorum sequi, quæ in quartâ causâ colliguntur. ¶

Quod autem in conclusione nos hortatur, ut sententiam Bellarmini sequamur, id omnino facimus; nam hanc totam ferè de prædestinatione doctrinam ab illius ore in familiari colloquio accepi. Nec refert, quod ille hic aliter docuerit, nam tunc non satis examinaverat D. Augustinum; postea enim re diligentius perpensâ, & D. Augustino diligentius & accuratius expenso, & hæreticorum rationibus consideratis, in eam sententiam concessit, quam nos modò tenemus; quamque in Gallia Parisiis, in Hispania Salamanticæ, Compluti, & Conimbricæ, ubi sunt & viri doctissimi, & viget inquisitio, traditam scimus.

Nihil ergo metuendum est, ne à nobis prava doctrina dimanet; cum ea doceamus, quæ Romæ in conspectu Sedis Apostolicæ, & in tot aliis Universita-

Legantur
Bellarmini
lectiones
Lovan fa-
ctæ anno
1573. cir-
ca Quæst
109. a. 8.
1. 2. ubi
de aux. suf.
& gra. ef-
fica idem
docet quod
nos. Idem
etiam post
multò fu-
sius fecit
Romæ.

tibus, ubi viget Sacrosancta Inquisitio, sine ulla contradictione aut cuiusquam offensa sint in lectionibus publicis tradita. Quod cum à quibusdam Magistris NN. non ignoretur, mirum est, quomodo dogmata nostra judicentur periculosa & offensiva.

R E S P O N S I O.

*Ad Censuram assertionum de Sacra
Scriptura.*

IN his tribus propositionibus (eas videlicet de incensura) non potest esse difficultas, si explicentur, sicut alias à nobis explicatae sunt. Nam quod attinet ad duas priores, non negamus Authores Hagio-graphos ex peculiari inspiratione Spiritus Sancti, & directione & assistentia scripsisse: sed hoc tantum dicimus, non fuisse necessarium, ut ad singulas sententias & singula verba habuerint novam & positivam inspirationem ex parte illius; id est, novam illuminationem, qua novo modo cognoscerent veritates quas scriberent, & viderent verba quibus Spiritus S. volebat eos uti; sed suffecisse ut Spiritus S. peculiari modo illos excitaret, ac im-

impelleret ad scribendum ea quæ audierant, vel viderant, vel alio modo cognoverant, & simul iis ad singulas sententias & verba assisteret, & ubi opus esset, dirigeret.

Hæc sententia visa est mihi probabilior quàm contraria: primo quia Evangelistæ ac alii Scriptores Hagiographi ad ea scribenda quæ viderant, vel ab infallibilibus testibus audierant, non videntur eguisse nova revelatione illarum virtutum, sicut Paulus, qui non ab hominibus, sed per revelationem Jesu Christi brevissimo tempore didicit Evangelicam Doctrinam; Joannes enim scripsit, quæ vidit; 1. Joan. 1. id clare patet. Similiter Matthæus. Marcus autem, quæ audivit à Petro, ut refert D. Hieron. *de viris illustribus in Marco*, & Irenæus lib. 3. *cont. hæres. cap. 1.* & alii patres. Lucas verò, quæ acceperat ab ipsis qui viderant, ut testatur initio Evangelii. Si multa crediderim esse scripta & ab aliis Historicis Sacris quæ ipsi viderant, vel audierant, vel alio modo certo cognoverant absque nova revelatione.

2. Ratio est; quia Spiritus S. utitur instrumentis idoneis, prout ea invenit, & sicut in necessariis non deest, ita

& in sufficientibus non redundat; atque tales, qui jam aliquid certò cognoscunt; & habent eloquendi facultatem, sunt idonei ad illa scribenda, ergo si Spiritus S. velit his uti instrumentis & amanuensibus, non est necesse, ut ipsis rursus de novo revelet res istas, sed satis est, ut eligat eos in suos amanuenses, & excitet peculiari instinctu ad scribenda ea, quæ jam antea cognoverant, ac simul illis specialissimo modo assistat in omnibus verbis & sententiis, ut ne minimum quidem errorem committere possint.

Quod ut melius explicetur, sciendum est, aliquid duobus modis posse scribi ex inspiratione Spiritus Sancti.

Primo, ut Spiritus S. novâ inspiratione supernaturali ostendat singulas res scribendas & singula verba; & sic scripserunt Prophetæ suas Prophetias, ut patet Jeremiæ 36. qui tantâ facilitate Prophetias dictabat, ut eas legere videretur.

Secundò, ut Spiritus S. peculiari instinctu excitet & impellat eum quem delegit, ad scribenda ea quæ antea vidit, audivit, vel alio modo cognovit; & simul assistat in singulis verbis & sententiis. Et teneo probabiliter scripsisse multa Evangelistas & Historicos. Hagiographos,

ita

ita ut non fuerit opus illis novâ & positivâ inspiratione & illuminatione circa singula. Et eo magis inducor in hanc sententiam, quòd hæretici hujus temporis ex contrario fundamento, id est eorum qui putant omnia verba Spiritus S. positivâ & novâ inspiratione dictata, conantur probare libros Machabæorum non esse Scripturam Canonicam, quia lib. 2. cap. 2. Author dicit se abbreviatorem Jasonis Cyrenæi, & in hoc opere breviando negotium plenum vigiliarum & sudoris assumpsisse: & cap. ult. veniam petit, si minus convenienter historiæ scripsit. Unde concludunt hunc librum non esse Scripturam Canonicam, quia Scriptura Canonica debet esse sine humana industria à Spiritu S. immediatè dictata & revelatâ. Adfert hoc argumentum Calvinus in Antidoto Conc. Trid.: ad quod Catholici respondent, sicut jam dixi, non esse necesse, ut Spiritus S. singulas sententias & singula verba & verborum sententiarumque ordinem & structuram per novam illuminationem & internam locutionem dicteret: nam si ita esset, non diceret se S. Lucas scribere ea, quæ ab Apostolis acceperat, qui viderant, sed quæ acceperat à Spiritu S. qui singula de novo dicta-

dictauerat , nec Patres dicerent S. Marcum scripsisse eâ quæ acceperat à S. Petro , sed quæ à Spiritu S. nec rectè diceret Author 2. Máchab. se accepisse negotium plenum vigiliarum & sudoris , quia parum est laborandum ei , cui penitus omnia dictantur , ut tantum habeat merum officium scribendi : nec veniam rectè peteret , si minùs cõvenienter historiæ dixisset ; nam hoc videtur redundare in injuriam Spiritus S. qui omnia ita dictaverat ; Sed satis est in historiis sacris , ut Deus peculiari instinctu impellat eos ad scribendum ea quæ antea noverant , ac simul infallibiter illis ad omnia assistat ; per hæc enim non tollitur labor revocandi in memoriam audita , visa , & lecta ; dirigendi omnia in ordinem , & aptis verbis , prout judicaverit esse convenientius , explicandi : unde & fit , ut Scriptores eloquentiores eloquentius , minùs facundi minus ornatè scripserint ; utitur enim S. Spiritus idoneis instrumentis prout ea invenerit.

Tertia propositio , semotâ parenthesi , videtur mihi esse omininò certa , nisi sit quæstio de nomine ; ponamus enim aliquam piam historiam ab aliquo pio viro qui eam optimè nôrit , ex instinctu Spi-

ritus-

ritus S. scriptam , qui sine ulla Spiritus S. assistentia singulari verum scripturus & nullum commissurus errorem , si Spiritus S. postea per aliquem Prophetam vel aliter testetur , omnia , quæ ibi scripta sunt , vera ac salutaria esse , non video , cur talis liber non sit habiturus authoritatem Scripturæ Sacræ , cum eandem habeat rationem credendi , quam alia quævis Prophetia ; nempe authoritatem Divinam ; ejusdem enim authoritatis est epistola ab ipsa Rege dictata , & ab alio dictata ab ipso tamen Rege subscripta. Et hoc dico , non quòd asseram , hunc modum in Scripturis inveniri ; sed tantum loquor de possibili , unde & expositio est conditionalis ; si enim Deus voluisset , potuisset hunc modum in aliqua Scripturæ parte servare , quod non implicat contradictionem , ac illa esset tam infallibilis auctoritas quàm alia.

Ex his patet , quàm longè distet hæc sententia ab errore Anomæorum ac Erasmi , qui volebant Apostolos interdum ut homines locutos , id est , aliquando humano more errasse ac lapsos esse memoriâ ; ita enim respondebant Anomæi , cum eis aliquid ex Apostolo vel Prophetis objiceretur , Apostolus ibi ut homo est lo-

cutus. Et cur objicis nobis V. Testamen-
tum? Nos enim dicimus, omnes Scrip-
turæ partes esse infallibilis veritatis & esse
à Spiritu S. vel novâ inspiratione reve-
lante, vel peculiari instinctu excitante &
assistente ad singula verba & sententias,
& nec minimum quidem posse esse in iis
errorem, quia is redundaret in Spiritum
S. (ut fusè ostendi aliàs) & totius Scrip-
turæ autoritas concideret, etiamsi non
sit necessarium, ut Spiritus S. novo mo-
do singula inspiraverit positivè hominem
illuminando.

Unde ad primum testimonium resp.
Non dicit Concilium Trid, loco citato,
totam Scripturam esse Dei verbum à Spi-
ritu S. dictatum; fateor tamen esse Dei
verbum & à Deo dictatum modo supra
explicato: quia scilicet vel à Deo novo
modo illuminante vel inspirante dicta-
tum, vel excitante & infallibiliter assi-
stente scriptum: & hi duo modi de facto
reperiuntur in scripturis.

Ad testimonium Petri resp, loquitur
de Prophetiis, quæ sine dubio positivè
per novam illuminationem inspirantur.

Ad testimonium Pauli: Scriptura di-
citur divinitus inspirata, quia vel positi-
vâ & novâ Spiritus S. inspiratione & il-
lu-

luminatione scripta (qualis sine dubio est major Scripturæ pars) vel peculiari instinctu Spiritus S. excitantis, ut scriberent ea, quæ vel revelatione, vel narratione vel experientiâ noverant, & ad singula peculiariter assistentis.

Ad ultimum dico, linguas & manus Scriptorum fuisse calamos Spiritus Sancti non tamen eodem modo omnium; aliter enim Prophetarum, quibus ita omnia dictabantur, ut solum laborem scribendi haberent; aliter Historicorum Sacrorum, qui debebant etiam industriam suam adhibere.

R E S P O N S I O

Ad Censuram primæ assertionis.

Deus præscit, quid homo quavis excitatione & motione positâ sit facturus: quâ præscientiâ positâ Deus aliquos sic vocat, sicut videt eos secuturos, talia beneficia præparat, qualia videt eos non rejecturos; & talium beneficiorum præparatio est prædestinatio. Docet hoc apertè Aug. lib. 1. ad Simp. q. 2. Cujus miseretur, sic eum vocat, quemadmodum videt congruere illi, ut non respuat

vocantem. Similia multa habet q. eadem.
 Sed respondent quidam MM Nostri, illum librum esse scriptum ab Augustino juvene ante exortam hæresim Pelagianam : postea autem satis sese correxisse in libris, quos scripsit post hæresim illam senex. Sed non videtur ita dicendum : primò, quia ita solvit Calvinus, cum aliquid ei in hac materia ex lib. D. Augustini de libero arb. vel ex qq. ad Simplicianum adfertur : nam lib. de prædett. pag. 33. ait, *ne in unâ quidem syllaba ab Augustino de prædestinatione differimus ; ubi autem contra nos aliquid scripsisse videtur, juventutis hoc tempore fuit : quin totus Philosophia intentus Manichæorum hæreses refellit : quæ autem pro hac nostra opinione scripsit, senex, religiosus, & spiritu S. plenus addidit contra Pelagianos &c.* Hæc Calvinus. Videatur ergo, utri magis D. Augustini authoritatem contra hæreticos labefactent, nos qui illum totum recipimus, an illi qui aliquos libros, qui maximè valent contra hæreticos, tamquam non rectè ibi docuerit Augustinus, rejiciunt.

Sed Augustinum non aliter docuisse juvenem & aliter senem in hac quæstione,

nē , patet ex cap. 14. de bono pers. ubi ait , inesse quibusdam Divinum naturaliter munus intelligentiæ , ut si apta suis mentibus vel signa videant , vel audiant verba , convertantur ad fidem : & hanc dicit esse gratiam prædestinationis , quæ non datur reprobis. Unde rectè dicitur , prædestinationem præsupponere præscientiam conditionatam & certitudinem illam , quâ certum est , hunc hominem prædestinatum salvandum , non pendere ex mera prædestinatione , sicut dicit Calvinus lib. 3. Instit. cap. 21. §. 5. & 9. sed ex illa præscientia conditionata , quâ certum est apud Deum , cum secuturum , qui tali vel tali modo tractus fuerit : atqui semotâ hâc præscientiâ , difficillimè explicatur , quomodo salvetur liberum arbitrium in prædestinatione , ut fatentur illi , qui contra Calvinum de hac materia scripserunt. Unde hæc explicatio non est Massiliensium ; non enim dico , electionem ad gratiam prædestinationis esse ex præscientiâ meritorum : imò hoc prolixè refutavi ; quòd enim Deus voluit huic dare talem gratiam , cum qua prævidet eum salvandum , si illam acceperit , ex nulla meritorum præscientia est , sed ex mera & gratuita

Dei voluntate, qui potuisset illi dare gratiam aliam, cum qua prævidebat eum non salvandum.

Neque verò conditionata præscientia, de qua loquimur, est illa, quâ Deus prædestinet hominem, si gratiam ejus accipere voluerit; ut DD. Censores interpretantur, quia Tyrii illi & Sidonii non erant prædestinati; qui tamen gratiam illam acceptassent si illis data fuisset, ut Dominus ait; sed est ea, quâ novit infinitos modos, quibus ipse liberum hominis arbitrium regere & movere & eidem suadere possit; & quid homo secundum unamquamque excitationem, suasionem & motionem sit facturus: v. g. est ea præscientia, quâ Deus præsciebat Tyrios & Sidonios pœnitentiam acturos, si ejus signa vidiissent & prædicationem audivissent: accedente autem ad hanc scientiam siue præscientiam Divinâ voluntate, quâ velit uti hoc modo providentiæ, cum quo videt hunc hominem salvandum, jam est prædestinatio; & illa præscientia conditionata sit absolutâ, & per illam cognoscit Deus; & quid ipse sit facturus & quid homo sit facturus: Unde non est diversa præscientia conditionata, & præscientia, quâ præsit, quid homo, & quid

quid ipse facturus sit, sed eadem, quæ ut prior Divinæ voluntatis ordinatione est præscientia conditionata & quasi simplex intelligentia; ut posterior, est scientia visionis. Non ergo pervertimus D. Augustini definitionem, sed eam explicamus, dum dicimus prædestinatorum salutem esse certam apud Deum non ex mera præordinatione, sicut creatio mundi futura; sed ex tali præordinatione, quæ supponat præscientiam conditionatam, atque adeo fundamentaliter est certa ex præscientia conditionata. Unde etiam verum est, prædestinatum certissime liberari; quia Deus decrevit illum liberare; sed hoc decretum præsupponit ulterius illam præscientiam conditionatam. Hanc doctrinam habet Driedo de cap. & lib. fol. 133. & Ruard. a. 7. fol. 326. & 347. Ex his patet responsio ad testimonia citata in Censura; non enim dicimus, Deum requirere aliquam conditionem ab homine, ut illum prædestinet; nam prædestinat omnino gratis, ut dictum est.

RESPONSIO

Ad Censuram Assertionis secunda.

Authores
hujus 2.
prop. Hal-
lens. 3. p.
q. 69. 5.
memb. D.
Thom. lib.
4. contra
gen. c. 150
Scot. in d.
46 Sor. lib.
de nat. &
gra. cap. 2
15. & 18.
Vega lib.
13. in Con-
cil. Trid.
per multa
capp. Adr.
Papa in 4.
d. 15 fol.
129. Ru-
ard. a. 7. f.
351. Cu-
ner. opusc.
de gra Ch.
c. 13. &
alii multi,
& pauci
sunt Cath.
qui contr-
arium te-
nent.

HÆc quæstio, utrum detur omni-
bus sufficiens auxilium, eo sensu
& modo à nobis tractata est, quo ab iis
Authoribus, qui de hac re scripserunt,
non solum superioribus sæculis, sed e-
tiam hæc tempestate contra hæreticos, ut
Rossensis a. 36. Soto lib. 1. de nat. &
gra, cap. 15. & seq. Driedo de cap. &
redemp. generis humani Tract. 4. cap.
20. & Tract. 5. cap. 1. & seqq. Ruard.
a. 7. Vega in Trid. lib. 13. Omitto
antiquos, ut Hallensem, Albertum, Bo-
naventuram, Scotum, & D. Thomam,
& alios complures, qui eodem modo lo-
quuntur; & idem nobiscum sentiunt.
Unde illum modum loquendi non puto
reprobandum, & multò minù ipsam
sententiam, quamvis Magistris NN.
displiceat, eo quod videatur illis contra
D. Augustinum esse: aliud enim est suf-
ficiens, ut quis immediatè possit credere
vel converti, ita ut nihil aliud requira-
tur, quod non detur omnibus, neque
de eo potest inter Catholicos esse que-
stio

stio ; aliud , quo quis ad Justitiam sensim & ad fidem pervenire possit , si ipse sibi non deesset : & hoc dicimus ex parte Dei nemini ratione utenti deesse ; paratus est enim Deus omnes sufficienter juvare , ut probatum est ex Scriptura & Patribus , ut a peccatis abstineant & resipiscant , si sibi ipsis non desint : & hæc est sententia omnium ferè Catholicorum.

Ad Censuram Assertionis tertia.

Auctores

3. assert.

Utitur hoc

arg. Ruar.

a. 7. pag.

356. Veg.

r 3. in con.

Trid. c. 3.

Concilium Trid. est pro nobis ; dicit enim in genere , *Deus impossibilia non jubet* : est autem aliquid duobus modis possibile.

Primò , immediatè , ut cum nostris viribus id possumus , vel jam actu habemus satis auxilii ; & sic præcepta non sunt omnibus possibilia : neque de hoc potest apud Catholicos esse quæstio.

Secundò , mediatè , ut cum quis non potest , nisi petat auxilium ab alio , quod potest petere , & petenti non denegabitur : sicut possum vincere hostem , si petam auxilium a Rege : & utrumque modum indicat Concilium. Itaque etiamsi quod actu habent , non sit sufficiens , tamen

Id quod possunt impetrare, est sufficiens. Unde rectè dicuntur habere sufficiens auxilium, non quidem in actu secundo, sed ex parte Dei & in actu primo, sicut sepe explicuimus. Similiter aliquis dicitur posse non tantum id quod per se potest, sed etiam quod amicorum auxilio potest, qui illum parati sunt iuvare. Et quia verba Concilii sumpta sunt ex Augustino patet ipsum nobis non adversari.

R E S P O N S I O

Ad Censuram Assertionis quartæ.

Authores.

Aug.

2. ad

Simplic.

Ruard. 2.

7. p. 326.

& 347. &

de concor.

lib. arb. p.

81.

Ecoram tale argumentum: Deus omnes vocat ad penitentiam, ergo paratus est omnibus dare auxilium, ut possint penitere. Deinde posueram solutionem hereticorum dicentium, quod Deus quidem omnes vocat, sed non ex proposito, ut convertantur, ut nihil habeant excusationis &c. Ad quod respondi: si Deus ita illos vocaret, delusorie illos vocaret, ut quidam Doctor Parisien. contra Calvinum rectè respondet. Juxta tamen D. Augustini explicationem, concedo, non omnes vocari secundum propositum, id est eo modo, quo sciebat illos Deus convertendos: sic

hic enim videtur intelligendus Augustinus, ut colligitur ex q. 2. lib. 1. ad Simp. ubi idem est Augustino misereri & vocare secundum propositum (nempe miserendi) misereri autem est ita vocare sicut novit secuturum. Unde patet, hoc non esse vocare secundum propositum hominis, sed secundum propositum Dei, cuius est misereri.

R E S P O N S I O

Ad Censuram Assertionis quintae.

Argumentum illud meo iudicio optimè concludit, quod volo; nempe Deum ex parte sua paratum esse omnibus dare gratiam Baptismi, quia jubet omnes baptizari & omnes obligat ad Baptismum: non enim ob aliam causam jubet omnes baptizari, quam ut eis det gratiam Baptismi. Mirum est, quomodo B. D. Censores trahant hæc ad voluntatem beneplaciti, cum aperte significetur contrarium, cum dicitur, vult quantum in ipso est; quod idem est, acsi dicerem: est paratus ex parte sua; sicut cum dicimus: Deus, quantum in ipso est, cupit omnes salvari. Similibus locutionibus plena est Scriptura.

Simili modo argum-
entatur Ve-
ga lib. 13.
in Trid. c.
7. de præ-
nit.

Nemini autem, qui terminos intelligit, dubium esse potest, quin Deus non velit omnes voluntate beneplaciti baptizari aut omnibus dare gratiam: non tamen idem dicendum videtur, quod Deus nolit aliquibus dare gratiam Baptismi & baptizari: nam quod ex Actis adfertur, non idem prohibuit Spiritus S. Paulum & Silam in Asia loqui & Bethinia verbum Dei, quod nollet etiam tunc eos baptizari; nam si quis ex illis locis ad Apostolos venisset, certe Deus non prohibuisset; sed quia Apostoli non poterant simul omnes Provincias convertere, sed aliam post aliam: deinde quia, ut ait Chrysost. & Theoph. Asia reservabatur Iohanni, & Bethinia-Lucæ,

R E S P O N S I O

ad Censuram Assertionis sextæ.

Vide Sot.
lib. de nat.
& grat. c.

15. Thom.
cont. gent.

lib. 3. cap.

159. Ru-

ard. a. 1.

pag. 334.

Cuner. de

gra. Chr. c

13. Dried.

Illum locum, Deus vult omnes salvos fieri & ad cognitionem veritatis venire, exposui de voluntate antecedente, ut sensus sit, Deum esse paratum omnibus dare sufficientia auxilia, ut possint salvari, & eam expositionem confirmavi ex 13. Dried. Patribus; refutavi autem expositionem

D.

D. Augustini, quâ passim utitur contra Pelagianos, & quâ eludunt istum locum hæretici hujus temporis, nempe, vult omnes salvos fieri, qui salvi fiunt: D. etiam Augustinus habet duas alias. Una est, vult ex omni hominum genere aliquos salvos fieri: altera est, facit nos velle, ut omnes salvi fiant, quas non duxi refutandas, quia in eo omnes conveniunt, quod noluit hanc Dei voluntatem pertinere ad omnes. Itaque sufficienter manent refutatæ rationibus illis, quibus improbatur prima.

de capt. & redemp. p. 94 qui hunc locum exponit de volunt. ant. quâ Deus confert ex parte sua auxilia suf. ad salut.

Mirum verò est, DD. Censores hanc expositionem meam de voluntate antecedente improbare, quasi periculoso dogmati viam sternat, cum sit D. Ambrosii & omnium Græcorum, partim in hunc locum, partim in id Joan. 1. *qui illuminat omnem hominem*. Videatur Damascenus lib. 2. de Fide cap. 29. Imò & ipsius Augustini de spir. & litt. cap. 33. & ad articulos sibi falso impositos a. 2. & 3. & D. Prosp. lib. 2. de vocat. gent. cap. 31. ut ostendi in lectionibus. Vide etiam Ruard. a. 2. pag. 334.

RESPONSIO.

Ad Censuram Assertionis septimæ.

Utiuntur hoc

arg. Vega

lib. 13. in

Trid. c. 4.

Soro in d.

15. q. 1. a.

1. 3. 2. 3.

SI ita essent aliqui reiecti à Deo, ut nunquam eis daretur ullum auxilium, quo possent sensim resurgere à peccatis, certe non videretur Christus eorum esse Redemptor: esse enim omnium hominum Redemptorem, non tantum est obtulisse pretium, quod esset sufficiens pro omnibus: quia si tantum obtulisset sanguinem suum pro uno, exclusis cæteris omnibus, certe pretium esset sufficiens pro omnibus, tamen non diceretur omnium Redemptor, quia non esset oblatum pro omnibus. Ut ergo dicatur omnium Redemptor, requiritur, ut pretium obtulerit pro omnibus, petendo à Deo, ut omnibus præpararentur auxilia. Unde cum ipse semper sit exauditus pro sua reuerentia, non uideatur dubitandum, quin Deus propter Christi meritum sit paratus omnes sufficenter iuvare, quantum suavis dispositio rerum permittit. Nihil hic video, quod speciem habeat sententiæ Massiliensium: illi enim volebant, propter Christum omnibus esse ita præparatam gratiam, ut singuli eam li-
bero

berò arbitrio nudo & non præparato
possent apprehendere, quod nos detesta-
mur; sed tantum dicimus, propter Chri-
stum paratum auxilium sufficiens, ita ut
pro loco & tempore à Deo excitentur,
quibus excitationibus eorum voluntas
præparata possit cum Dei adjutorio, quod
illi non deerit, ulterius aggredi, si velit.

RESPONSIO

Ad Censuram Assertionis octava & nona.

Quia de gratia excitante & adjuvante brevissimè tantum in lectionibus egi, quantum satis esse videbatur ad uni-
us incidentis objectiunculae solutionem; ideo iterum fusius meam sententiam explicabo, quamquam eam priva-
tim quibusdam Magistris Nostris fa-
tis mihi visus sum aperuisse, quibus ta-
men nihil dixi de velleitatibus aut scrupulis conscientiae, quorum ipsi mentio-
nem saepe faciunt; quamquam & ista ad gratiam excitantem pertineant; in hac enim quaestione latet praecipua causa nostrae dissensionis. Et quoniam haec duae assertiones avulsae sunt à propriis locis,

Anthofes
affert. 8.
Tho. cum
Cajot. 1 2.
q. 109.
Ruad. 2. 7
fol. 307.
Veg. lib. 6.
in Trid. c.
78. Dried.
de capt. f.
101. &
102. Cu-
ner. de lib.
arb. c. 9. &
10. Cont-
rarium nō
viderur in-
telligibile;
loquendo
de poten-
tia separa-
ta ab actu.

E

po-

Aurhores
 Albert 9.
 pater su-
 pra citatos
 propositionem hanc
 tenent An-
 d. eas à Ca-
 stris nov in
 1. d. 22.
 Gabr in 1.
 d. 45. & in
 2. d. 1. q. 1.
 & d. 37.
 Cajet p. 1.
 q. 14. a. 3.
 Rithov in
 2. d. 29.
 Denique
 omnes illi,
 qui ponunt
 sufficientem
 auxilium
 præveni-
 ens.

ponam eas, sicuti in lectionibus nostris
 dictum habetur.
 Dixi ergo, fieri posse, & de facto sæ-
 pe fieri, ut quis habeat auxilium præve-
 niens omnino sufficiens in genere auxi-
 lii prævenientis ad conversionem, & ta-
 men non convertatur, quia non vult, &
 tunc desse auxilium concomitans in actu
 secundo, quod tamen aderat in actu pri-
 mo, eo fere modo, quo concursus gene-
 ralis adest habenti potentiam videndi, cum
 non videt. Unde talem habere omnia re-
 quilita antècedenter ad conversionem, ac
 proinde totam rationem, cur non conver-
 tatur, esse quod non vult. Hinc intulit, ut
 peccator possit converti, non esse neces-
 sarium, ut accipiat utrumque auxilium,
 scilicet præveniens & concomitans in a-
 ctu secundo; sed satis esse, ut accipiat
 auxilium præveniens in actu primo, nem-
 pe sufficiens, & tunc dicuntur habere
 auxilium sufficiens ad conversionem. De-
 inde addidi: ut tamen actu convertatur,
 requiritur concursus Dei supernatura-
 lis, qui ita est præparatus peccatori suf-
 ficienter disposito. & excitato, sicut con-
 cursus generalis præparatus est v. g. po-
 tentiæ videndi. Ita docet Ruardus a. 7.
 pag. 307. & seq. Hanc doctrinam pu-
 tant

tant DD. Censores repugnare Scripturis, & D. Augustino, evertereque gratiam Christi: ego vero puto, eam consentaneam esse Scripturis, & D. Augustino, & Con. Trid. sess. 6. c. 5 & 6. & c. 4. Pro quo notandum est Concil. Trid. sess. 6. c. 5. duplicem esse gratiam ad conversionem necessariam. Una est excitans, quæ vel est exterior, sicuti prædicatio miraculosa, & hoc nullo modo sufficit, vel interior, ut bonæ inspirationes, cogitationes, illuminationes intellectus & affectiones, commotiones & complacentiæ, voluntates ad bonum & aversiones à malo, quales homo viribus naturæ non habere potest. Quantæ verò hæ debeant esse, ut sint sufficientes v.g. ad fidem vel ad conversionem, Deus novit. Certum tamen est, illas posse esse sufficientes & debere esse, ut homo possit credere & converti.

Altera est gratia adjuvans, quæ ut docet Ruard. a. 7. in tribus consistit. Primò in directione intellectus ob ignorantiam & intellectus instabilitatem. Secundò in protectione seminis Divini præsertim in voluntate, ut illa bona affectio maneat nec eam diabolus auferat vel impediat, sicut agricola custodit semen su-

um ab avibus. Tertiò in concursu & cõ-
operatione supernaturali, qui similis est
concurfui naturali.

His pofitis dico, quando homo fuffi-
cienter eft excitatus ex parte intellectus
& voluntatis v. g. ad fidem vel conver-
fionem Deo interius femen fuum custo-
diente, poteft homo liberè credere vel
non credere, converti vel non converti,
prout voluerit: nec requiritur alia gratia
præveniens, quæ faciat eum credere, fed
tantum requiritur gratia concomitans
feu cõcurfus fupernaturalis. Eft quæ hæc
aperta fententia Concilii Trid. Sef. 6. c.
5. ubi docet, per gratiam excitantem &
adjuvantem hominem fe difponere ad ju-
ftificationem, eidem gratiæ liberè affen-
tiendo & cõoperando. Item hominem
poffe illam infpirationem abjicere. Item
cap. 6. dicit, hominem excitatum Divi-
nâ gratiâ & adjutum liberè moveri in
Deum. His locis nihil aliud requirit
Concilium, nifi gratiam excitantem &
adjuvantem, neque requirit præter hoc
aliâ gratiam quandam, quæ infallibili-
ter faciat & operetur confenfum.

Dices, Concilium eam non excludit.

Contra, quia Concilium ponit omnia
necelfaria ad juftificationem, & folum
requi-

requirit gratiam excitantem & adjuvantem, ergò non requirit illam aliam efficacis præparationis. Item Concilium dicit, hominem excitatum & adjutum in Deum liberè moveri, ergò positâ illâ excitatione & auxilio omni, quod prævenit ipsum consensum, potest non moveri in Deum, ergò falsum est requiri quandam efficacem præoperationem Dei in voluntate, quâ positâ homo necessariò moveatur in Deum, & sine qua non possit de facto moveri in Deum, quia videlicet sine gratia Christi non potest.

Respondent primò, hominem cum illa gratia Christi liberè moveri in Deum, quia libenter & non coactè.

Contra, quia talem libertatem etiam admittit Calvinus lib. 1. Institut. cap. 2. §. 7. & 8 & tamen damnatur à Concilio. Præterea, quia in Bulla Gregorii XIII. & Pii V. damnatur hæc propositio: *id quod voluntariè fit, etiamsi necessariò fiat, liberè tamen fieri.* Denique Concilium dicit, quòd possit illam rejicere, cum qua potest converti. Unde

Respondent secundò, gratiam efficacis præoperationis & inoperationis non tollere libertatem & posse rejici, quia non tollit ipsam potentiam liberam, nec

infirmi-
tatem ejus & proclivitatē natu-
ralem ad contrarium; sed tantum tollit
usum illius libertatis, impediendo, ne
tunc possit exire in actum.

Contra primò, quia hoc totum admit-
tit Calvinus, ut patet lib. 2. Instit. cap.
5. §. 14. & 15. & damnatur tanquam
qui neget liberum arbitrium in operibus
gratiæ: contra quem Concilium hic agit
dum ait, hominem excitatum & adju-
tum liberè moveri in Deum, item posse
converti & gratiam Dei rejicere. Secun-
dò, si Deus necessitaret hominem ad ali-
quem actum bonum, tantum relinque-
ret in ipso potentiam liberi arbitrii & pro-
clivitatē ad contrarium, & solum im-
pediret usum libertatis ipsius in contra-
rium, iste actus bonus non esset liber sed
necessarius; ergò similiter hic si illa gra-
tia non relinquit homini usum libertatis
sue, necessitat simpliciter ad conversi o-
nem vel opus bonum. Tertiò, de ra-
tione actus liberi est, ut voluntas quo-
modocumque sit preparata, sit indiffe-
rens & indeterminata ad illum actum in
omni instanti quod est prius quam eliciat
actum, ita ut in omni priori signo, si-
cut potest elicere actum, ita etiam possit
non elicere, ut docet Scotus in 3. d. 18.

ergò

ergò si est necessaria talis gratia , quâ posita impossibile sit , liberum arbitrium non obtemperare , & necesse obtemperare , non est libertas in iis actibus. Denique hæc est omninò sententia Calvinii , qui lib. 2. cap. 3. ait : *movet Deus liberum arbitrium , non ut multis sæculis creditum est , ut nostra sit electionis , motioni Dei aut obtemperare aut refragari &c.* Ubi dicit , nobis non relinqui liberam electionem , id est , usum libertatis.

Respondent ergò tertio , posita illâ gratiâ efficacis cooperationis , voluntatem quidem eodem momento consentire , tamen hanc necessitatem non repugnare libertati , quæ tantum est necessitas ex suppositione.

Contra , hæc gratia distinguitur realiter à consensu , sicut vera causa à suo effectu , atqui hæc causa talis est , ut eâ posita impossibile sit , non sequi effectum statim , ergò effectus sequitur necessariò ex illa causa , ergò non liberè : nam omnis causa , quæ ita determinat intrinsecè liberum arbitrium , ut illâ posita necessario liberum arbitrium agat , sine dubio adfert necessitatem , quæ repugnat libertati actus , sicut patet in amore Dei in Beatis , qui tantum est necessarius ex suppositione.

positione luminis gloriæ, non tamen ullo modo est liber. Confirmatur primò, quia si Deus necessitaret hominem ad aliquem actum, ille actus non esset necessarius nisi ex suppositione, & tamen non posset respectu hujus hominis dici liber.

Confirmatur secundò, quia quando suppositio non est in nostra potestate, tunc id quod necessariò sequitur ex suppositione, nullo modo est liberum. Non enim imprimis in se est liberum, ut patet, quia habet necessariam habitudinem ad suppositionem: nec etiam in sua causa, videlicet quasi suppositio esset libera, quia non est in nostra potestate hoc vel illo tempore habere gratiam illam efficacis inoperationis: quin ex sententia illorum est necessaria ad omnes bonos actus, etiam ad petendam illam, sicut oportet: unde ulteriùs videtur sequi, hominem totâ vitâ suâ esse astrictum perpetuæ necessitati, & non posse quidquam boni facere, nisi Deus ante in illo efficaciter operetur ut faciat, & tunc necessariò facere. Unde patet, hanc sententiam tollere studium orandi & omnem sedulitatem, præcepta, exhortationes &c.

Unde urgeo ex Concilio Trid. can. 4. ubi dicit, liberum arbitrium hominis à Deo

Deo motum & excitatum posse assentiri Deo excitanti & vocanti & dissentire, si velit, ergo non est necessaria illa gratia efficax, quæ infallibiliter & indeclinabiliter operetur assensum.

Respondent primò, Concilium intelligendum esse, quòd homo possit assentiri & dissentire gratiæ excitanti & pulsanti extrinsecus, non autem gratiæ efficacis cooperationis.

Contra, quia Concilium vult, ut cum eadem gratia, cum qua possumus consentire, cum eadem etiam possimus dissentire; quia, sicut dicit, liberum arbitrium motum & excitatum posse consentire, ita & dissentire, ergo cum tota illa gratia, cum qua potest consentire, cum eadem potest dissentire. Unde

Respondent secundò, *assentiri & dissentire* pertinere ad intellectum propriè, & sensum canonis esse, hominem posse per intellectum consentire & dissentire gratiæ, quatenus est magistra intellectus. Confirmant: quia Concilium non dicit, quòd possit assentiri & dissentire gratiæ, sed Deo.

Contra, quia Concilium apertè loquitur de assensu & dissensu liberi arbitrii, id est liberæ voluntatis. *Si quis dixerit:*

erit, inquit, liberum hominis arbitrium nudum & excitatum nihil operari assentiendo &c. Deinde si gratia Christi potest respui ex parte intellectus, cur non etiam ex parte voluntatis?

Respondent tertio, hominem excitatum Deo posse consentire & dissentire; quia si superveniat gratia efficacia cooperationis, homo potest consentire & reipsa consentit; si non superveniat, potest dissentire, & reipsa dissentit.

Contra, quia hoc est facere Deum liberum, non hominem; quia in solius Dei libertate positum est, ut illa gratia detur vel non detur; dat enim eam cui vult, & est propria prædestinatorum, ut dicunt. Deinde nemo hæreticus unquam negavit, quin hoc modo homo possit consentire & dissentire, converti & non converti; & tamen Concilium hic aliquid determinat contra hæreticos. Tertio, quia similiter visio & amor Dei in Beatis essent actus liberi, quia poterat fieri, ut Deus daret istis hominibus lumen gloriæ, & tunc poterant videre & amare, & fieri poterat, ut Deus non daret, & tunc poterant non videre & non amare. Omitto nunc Scripturas & Patrum testimonia & rationes, atque hæc
pro

pro confirmatione nostræ sententiæ sufficiant.

Hinc concludo in Concil. Trid. hominem peccatorem à Deo sufficienter excitatum posse consentire & dissentire, si velit, nec requiri aliam gratiam, quæ efficaciter præoperando & cooperando faciat illum consentire, quâ positâ necessario consentiat.

Unde ulterius infero, hominem à Deo sufficienter excitatum & præparatum verè posse illud, ad quod sufficienter est excitatus, si de uno actu loquamur v. g. ut consentiat, & illi esse præparatum auxilium concomitans seu adjuvans, eo ferè modo, quo habenti potentiam videnti præparatus est concursus naturalis. Et ratio est, quia ipsa excitans gratia est veluti semen quoddam boni operis præbens

Quidam nuper aliter respondit, Conc. Trid. non tam propriè loqui, quàm loquatur Augustinus in hac materia, id est, illa capita dogmatica non esse relecta in Concil. & quodam loco depre-

F 2

vires hensus fu-

isse errorem. Contra primò, quia hoc est evertere auctoritatem Concilii; nam quotiescumque adferretur aliquid ex capitibus illis, diceretur, capita illa non esse relecta & Concilium non tam propriè loqui, quàm Patres. Secundò, quia Concilium ibi dogmaticè loquitur contra Lutherum & Calvinum, & verbis contradictoriis eorum hæresi uritur; nam Lutherus dicebat, liberum arbitrium ut rem inanimam agi, & se merè passivè habere: Calvinus dicebat, illud quidem cooperari, sed necessario, ita ut positâ Divinâ motione non posset dissentire: Concilium autem utrumque verbis contradictoriis elidit. Tertio, quia idem est definitum in Canonibus, quos constat esse de fide, ut patet Can. 4.

vires voluntati ad conſenſum, ſicut ſemen præbet vires terræ ad germinandum: unde & in parabola vocatur ſemen Mat. 13.

Ad primum argumenrum in Cenſura poſitum reſp. Hæc ſententia nullo modo repugnat Scripturis aut D. Auguſtino, ſed omnino ex illis colligitur. Et quia potiffimum putatur D. Auguſtino repugnare, adferam aliqua loca. Lib. ergo 12. de Civit. cap. 6. ponit duos pari modo & corpore & animo affectos & paritentione pulſatos, & dicit alterum cadere, alterum ſtare, quia hic liberè vult à caſtitate deficere, alter non vult. Unde patet, illum non requirere illam gratiam efficaciſ præoperat. in eo qui ſtetit. Item lib. 83. qq. q. 68. dicit, ut venirent vocati ad cœnam, erat in libera eorum poteſtate, & ſi quiſquam ſibi tribuat, quòd venit vocatus, non tamen poteſt ſibi tribuere, quòd ſit vocatus: ubi apertè dicit, vocatum poſſe venire & non venire pro ſua liberrima voluntate, nec requirit aliam gratiam efficaciſ, quæ ipſum faciat venire. Præterea Aug præter excitationem ſeu vocationem & protectionem non videtur requirere aliam gratiam efficaciſ in omnibus operibus: nam lib. 1. ad Simp. q. 2. docet gratiam efficaciſ, quæ nunquam

quam respuitur, nihil esse aliud, quam vocationem seu excitationem, quam Deus eo tempore & modo dat, quo videt fore ut non respuatur, etiamsi facillimè posset respui. Lib. de grat. & lib. arb. cap. 5. dicit, Paulum de cælo vocatum, & illâ efficacissimâ vocatione conversum: ubi vocationem vocat gratiam efficacem. Item ipsum credere & velle converti secundum Augustinum ideo tantum tribuitur Deo, quia Deus vocavit Lib. 1. ad Simplicianum q. 2. Si Esau voluisset & cucurrisset, Dei adjutorio pervenisset, qui ei velle & credere vocando præstaret. Ecce quomodo Deus det velle & credere, nempe vocando & excitando. Ibid. Ut velimus, & suum esse voluit & nostrum; suum vocando, & nostrum sequendo. De gra. & lib. arb. c. 16. Ille facit, ut faciamus præbendo vires voluntati. De Spir. & litt. cap. 34. Velle bonum non tantum esse à Deo, quia est à libero arbitrio, quod est à Deo, sed etiam quod visorum suasionibus agit Deus, ut velimus & ut credamus sive extrinsecus per Evangelicas exhortationes &c. sive intrinsecus, uti nemo habet in potestate, quid sibi veniat in mentem, sed consentire vel dissentire propriæ voluntatis esse, id est liberi arbitrii. Deinde ait: his ergò modis quando

Deus agit cum anima rationali , ut ei credat
 (neque enim credere potest , si nulla sit sus-
 cio vel vocatio cui credat) profectò & ip-
 sum velle credere Deus operatur in homine,
 & in omnibus ejus misericordia prævenit nos,
 consentire autem vocationi Dei vel dissentire
 propria voluntatis est. Quibus locis aper-
 tissimè docet , quòd velle & credere Deus
 operetur in nobis , quatenus dat nobis
 gratiam excitantem ad velle & credere,
 licet positâ illâ gratiâ sit in nostra pote-
 estate cum auxilio concomitante consen-
 tire vel dissentire. Uade patet hanc totam
 sententiam esse Augustini , nec eum re-
 quirere præter sufficientem excitationem
 & vocationem aliam gratiam , quæ faciat
 nos efficaciter consentire , & quâ positâ
 impossibile sit non consentire : nam hæc
 ipsa excitatio , quando ita fit , sicut De-
 us novit hominem secuturum , est gratia
 efficax.

Dices , si hoc relinquitur liberum , ut
 consentiat vel non , ergò gratia Dei est
 pedissequa voluntatis.

Respondeo , tota gratia non est pe-
 dissequa voluntatis ; nam gratia excitans
 seu vocatio prævenit hominis libertatem,
 gratia etiam concomitans non est pedis-
 sequa sed comes : posset tamen aliquo
 sensu

sensu dici pedissequa, quia voluntate
sufficienter excitatâ est in potestate nostra
habere gratiam concomitantem in actu
secundo, vel non habere: & quidem
quod Deus non det alteri bona opera, nisi
dando gratiam excitantem ad illa & præ-
bendo concursum, patet evidenti ratio-
ne (de habitu enim non loquor) nam vel
infundit illa extrinsecus, sicut infundit
habitus, & sic est error Lutheri, qui
putat bona opera interna extrinsecus in-
fundi, libero arbitrio se merè passivè ha-
bente; vel operatur illa efficaciter præ-
veniendo & movendo liberum arbitrium,
sicuti operatur in nobis sanctas inspiratio-
nes & affectiones, ut docet Augustinus
de spir. & litt. cap. 34. & hic est error
Calvini; vel operatur illa ponendo ali-
quid in libero arbitrio, unde necessariò
sequitur, sicut operatur amorem beati-
ficum, & hic etiam est error Calvini;
vel denique operatur illa ponendo in li-
bero arbitrio aliquod semen, & ita suä-
dendo sicut noverat consensurum, & hoc
est quod nos dicimus.

Sed infert Censura, gratia Christi au-
fert cor lapideum & tribuit cor carneum,
nec tribuit solum possibilitatem, sed e-
tiam operationem.

Resp.

Respondeo , gratia Christi auferentis cor lapideum aliquando est Augustino gratia habitualis , ut docet Ruardus a. 7. hæc enim formaliter auferit cor lapideum. ut cum ait de prædest. Sanct. cap. 5. gratiam Christi discernere bonos à malis : aliquando est excitatio & vocatio , quâ Deus ita interiorius vocat , sicut novit futurum , ut cum ait eodem lib. cap. 8. gratiam Christi à nullo corde duro respui. Hæc ergò non tollimus , sed statuimus : qualis autem debeat esse gratia excitans , satis dictum est.

Ad locum illum Augustini de gratia Christi cap. 47. resp. non vult dicere Augustinus , ipsum velle & agere esse à liter à Deo , quam ratione gratiæ excitantis & adjuvantis : imò apertè dicit , ideo hæc esse à Deo , quia non sunt sine ejus auxilio , quod auxilium consistit in excitatione , protectione & concursu.

Dices , Augustinus dicit , non tantum posse , sed etiam velle & agere esse à Deo.

Respondeo , per posse intelligit liberum arbitrium , per quod habemus potentiam ad bona opera : agit enim ibi contra Pelagium , qui ut patet cap. 4. ejusdem libri , distinguebat tria , *posse*,
velle,

velle, *agere*: per *posse* intelligebat vires liberi arbitrii, & hoc dicebat esse à Deo; *velle* autem & *agere* tantum à nobis, sicut potentia videndi à Deo est, videre autem à nobis: contra quem D. Augustinus agit dicens, non tantum *posse* à Deo esse, sed & *velle*, quia sine ejus adjutorio nunquam salubriter vellemus. Hæc est vera expositio hujus loci ex mente D. Augustini. Nos ergò cum D. Augustino contra Pelagium confitemur, non tantum *posse* nobis esse à Deo, id est liberum arbitrium, sed etiam *velle*; quia ut bene velimus, debet liberum arbitrium excitari, præparari & juvari. Hinc patet responsio ad objectiones, quæ sunt in censura nonæ assertionis: nemo enim unquam dixit, specialem Christi gratiam, quam Scripturæ commendant, esse propriè tantum concursum illum supernaturalem (quamvis Pelagius & illum & naturalem negaverit, ut patet ex Hieron. Epist. ad Thesip. ut mirum sit, DD. Censores dicere, Pelagium hunc concursum non negasse) illa enim est varia; Scripturæ enim commendant aliquando gratiam justificantem & inhabitantem, aliquando prævenientem, aliquando adjuvantem, aliquando etiam omnes simul;

G

sicut

sicut cùm ait, *gratia Dei in me vacua non fuit.* Cùm autem dicitur: *dabo vobis cor carneum, & faciam ut ambuletis in præceptis meis;* sensus est, dabo vobis gratiam justificantem, quâ diligatis mea præcepta, & crebras excitationes internas & externas & singularem protectionem, quibus fiet, ut ambuletis in præceptis, licet possitis facile non ambulare: non autem promittitur gratia, quæ præter excitationes & protectiones Divinas efficaciter determinet hominem, & faciat, ut in præceptis ambulemus: nam hæc est hæreticorum expositio.

RESPONSIO

Ad Censuram Assertionis decimæ.

Authores
hujus Ass.
Vega in
Trid. lib. 6.
c. 6. & 7.
Cuner. de
lib. arb. c. 9
& 10.

SI illa sententia, *Non tantum egemus gratia, quâ possumus, sed etiam quâ faciamus* intelligatur de libero arbitrio sufficienter excitato, quod nempe præter liberum arbitrium sufficienter excitatum & præparatum, quo propriè dicimur posse, requiratur alia gratia, quâ faciamus, illa alia gratia non potest intelligi, nisi auxilium concomitans, si loquamur de uno aliquo actu; tamen sciendum est, hanc expositionem, etsi verum sit, quod dicitur, non esse

esse ex mente Augustini, sed ea, quam attulimus, id est, secundum quam gratia quâ possimus, est liberum arbitrium gratis acceptum à Conditore, gratia autem quâ faciamus, est gratia habitualis, excitatio, vocatio, protectio Divina & concursus: negavimus autem præter excitationem & auxilium jam dictum requiri ad singula bona opera gratiam ita efficacem, ut infallibiliter voluntatem determinet: nam hæc loquendo de determinatione quæ provenit ex efficacia gratiæ, videtur tollere libertatem, ut supra dictum est, non enim gratia præveniens propriè voluntatem determinat ad consensum, sed invitat & inclinât, ita tamen ut voluntas in instanti, quod antecedit consensum, sit indifferens & indeterminata ad consentire & non consentire, ut supra ostensum est. Ad locum illum de corrept. & gra. cap. 12. *Si homo relinqueretur sua voluntati &c. non perseveraret*: tantum vult dicere Augustinus, hominem justum, si relinqueretur sine speciali auxilio, nempe excitatione & protectione Divina, facile succumbere; & ideo subventum est voluntati, ut per gratiam adjuvantem & excitantem inseparabiliter & indeclinabiliter ageretur, id est, ita ut non separetur

vel declinet de facto, non autem quod non possit facile declinare; vel indeclinabiliter, nempe ex præscientia: quia subventum est illi per talem providentiæ modum, per quem certissime sciebat, si ita juvaretur, cum non declinaturum. Hæc tamen gratia & excitatio in aliis est multò potentior quàm in aliis, v. g. in Paulo & Magdalena vocatio & excitatio ita magna fuit, ut difficile eis fuisset resistere, & moraliter certum erat eos secuturos. Unde cum dico, fortè in Paulo & Magdalena fuisse talem excitationem & vocationem, quæ illos infallibiliter determinaret, loquor de infallibilitate morali, quâ moraliter certum erat & infallibile, consideratâ potentiâ talis vocationis, quod qui tam potenter vocaretur, obtemperaret: omninò autem & absolute certum erat Deo, quia ipse novit, quibus modis liberum arbitrium excitari debeat, ut sese liberè convertat. licet inter illos modos magna sit differentia, ita ut aliis facillimè, difficilius aliis resisti possit. Nec tamen hinc sequitur, magnos Sanctos, qui magno impetu gratiæ ei ad bonum excitati fuère, minus meruisse in suis operibus, quàm communes fideles qui minore; quia opus non statim, si

est

est magis liberum ; ideo etiam magis meritum ; nam licet ad rationem meriti requiratur libertas ; tamen meritum magis ex perfectione operis , quàm ex libertate spectatur. Itaque quædam opera Sanctorum libera , etsi minùs erant libera quàm alia communia Fidelium , poterant tamen magis esse meritoria ; quia magis intensè & intrinsecè perfectiora. De distinctione autem gratiæ Adami & nostræ amplectimur D. Augustinum : Adamo enim fuit datum posse perseverare , si vellet ; quia tantùm fuit liberum arbitrium sanum , instructum justitiâ originali sine omni rebellionè carnis & spiritus &c. quò poterat perseverare si volebat : nobis autem propter vulnera peccati originalis in nobis relictâ non tantum datur ut possimus , sed etiam ut velimus : id est , non tantum datur nobis liberum arbitrium etiam instructum gratiâ & virtutibus ; quia si nihil aliud daretur , facilè in tanta infirmitate carnis deficeremus ; sed etiam datur ut velimus : id est , dantur nobis crebræ excitationes internæ & externæ , quibus invitamur ad bona opera , daturque protectio singularis. Non autem vult dicere præter hæc omnia dari etiam quandam gratiam , quæ efficaciter & in-

fallibiliter faciat nos, facere omnia nostra bona opera, aut faciat nos perseverare: nam hæc videtur rationem libertatis auferre, ac proinde rationem meriti; non autem gratia efficax, quam nos ex D. Augustino ostendimus.

R E S P O N S I O

Ad Censuram Assertionis undecima.

Augustini sententia non pervertitur. Primò, quia ipsius oratio est conditionalis, quæ æquivalet universali. Si tamen, inquit, sint reprobi, non adhibentur eis dicta vel facta, per quæ possent credere si audirent. Nonne hinc bene colligitur: ergò nullis reprobis infidelibus adhibentur dicta vel facta, per quæ possent credere? Sicuti si dicam, si illi sint prædestinati, dabitur illis gratia; quâ credant, bene possum inferre: ergò omnibus prædestinatis infidelibus gratia datur, ut credant, etiamsi non intelligeretur, nisi de Tyriis & Sidoniis; tamen quia ostendimus illis etiam ex parte Dei non defuisse auxilium sufficiens, ut possent converti ad fidem, ut etiam docet Ru-ardus a. 7 non omnino propriè de illis dici

dici potest quòd non potuerunt credere: ergò sententia D. Augustini piè est exponenda juxta ipsius intentionem, non verborum rigorem: idque sicut dicitur in assertione 10. sic enim sæpè dicit Augustinus non posse fieri, quod prævisum est de facto non futurum &c. ut cùm dicit, hominem indeclinabiliter agi, & inseparabiliter agi per gratiam, sensus est, ita agi ut eo facto non declinet, vel ita agi, ut Deus noverat illum non declinaturum, & patet ex præcedentibus; quia colligit hanc sententiam ex verbis Domini dicentis Tyrios & Sidonios facturos fuisse pœnitentiam, si ejus signa vidissent: unde D. Augustinus infert, habere quosdam Divinum naturaliter munus intelligentiæ, quo moveantur ad fidem, si congrua suis mentibus audiant verba vel signa conspiciant: si tamen sint reprobi, non adhibentur eis dicta, per quæ possent credere: sine dubio non aliud ex præcedentibus infertur, nisi ea non adhiberi, per quæ de facto crederent. Ita docet Ruard. 2. 7. fol. 354. habuerunt tamen Tyrii & Sidonii auxilia sufficientia ex parte Dei, quibus sensim possent pervenire ad fidem si Divinæ gratiæ suâ negligentia non defuissent.

RES-

RESPONSIO.

Ad Censuram Assertionis duodecimæ.

SI D. Augustinus hoc non vult dicere, sed hunc nolle credere, quia ejus voluntas non præparatur à Deo; bene habet. nam sic non est mihi ratio istius locutionis explicanda. An tamen non possit colligi, judicent, qui in Augustino bene sunt versati. Queritur enim cur duobus audientibus evangelium hic credat, ille non: respondet, quia hic vult, ille non: deinde ulteriorem rationem videtur assignare, cur hic velit, alter nolit, quia, inquit, cum huic præparatur voluntas, alteri non præparatur, videndum quid veniat de misericordia & judicio; ubi ultimas utriusque causas assignare videtur. Inspiciatur & examinetur totum caput. Sanè D. Ruardus vir doctissimus & in Augustino versatissimus sic Augustinum intelligit a. 7. fol. 333. Mihi ergò non sine ratione videbatur id velle dicere, & propterea ex-
 causare sum conatus respondendo, improp-
 priam esse locutionem; quia omnis lo-
 cutio est impropria, quæ aliqua ratione
 causam

causam peccati in Deum refert. Tamen in sensu proprio vera est & Scripturis consentanea* *dedit illis spiritum compunctionis; oculos ut non videant, aures ut non audiant usque in hodiernam diem: & 1. Reg. 2. non audierunt vocem sui patris, quia Deus voluit disperdere eos: illa enim particula quia non semper significat propriam causam. Ad illud autem, quod adfertur ex D. Augustino lib. de bono persever. cap. 22. respondeo: D. Augustinus non ideo ait, hoc non esse dicendum, quod nullo sensu sit verum; sed quia improprie diceretur, & cum offensione populi.*

Isaia 6.

R E S P O N S I O

Ad Censuram Assertionis decimatertiae.

Non dubitandum, quin Apostoli & Beatissima Virgo habuerint multò majus donum perseverantiae, quàm communes fideles, qui frequenter labuntur in peccata mortalia: ita enim custodiebantur & regebantur à Deo, ut B. Virgo non posset quidem peccare, saltem mortaliter; Apostoli autem vel non possent, vel donum perseverantiae, quàm alii. Vide D. Thomam p. 3. q. 27. art. 3. & 4. & ibidem Cajet. & Bonavent. & indicat Augustinus lib. de nat. & gra. c. 36. de D. Virgine

Authores
hujus Af-
sert. Est
communis
sententia
Doctorum
esse confir-
matos in
gratia, qui
habent lon-
gè majus

H

non

non nisi difficulter possent: nam secundum communem sententiam fuerunt confirmati in gratia per singularissimam assistentiam Dei; non autem per gratiam habitualement, ut Censura objicit: nemini enim justo gratia habitualis sufficit ad perseverandum. Unde Apostoli secundum se quidem erant periculo mutabilitatis ex bono in malum obnoxii; quatenus tamen erant sub tam potenti Dei custodia difficile eis fuisset in peccatum mortale labi. Unde non statuimus illos absolute non fuisse obnoxios periculo mutabilitatis, sicut Censura imponit.

Quod autem dicit, non esse Scripturæ S. nec D. Augustino consentaneum, ponere aliquos confirmatos in gratia, valde mirum est, cum sit communis sententia Scholasticorum quæ, ut opinor, non tenet aliquid Scripturis repugnans; sed potius quod contra illam à privatis quibusdam tenetur, suspectum haberi debet. Et aperte D. Cyril. lib. 9. in Joan. cap. 29. in illud *non turberetur cor vestrum: Non enim, inquit, inerat Apostolis, ne cadere possent, quod postea superiori virtute roborati (id est Spiritus S. gratiâ muniti) habuere*. Neque aliquod testimonium, quod sciam, ex D. Augustino adferri potest, quod repugnet.

repugnet. Nec obstat his illud: *qui stat. videat ne cadat: & vigilate & orate, ne intretis in tentationem*: sicut nec prædestinatis, quibus revelata est sua prædestinatio. Quod autem dicit Censura, potius debere dici hominem confirmari in gratia quam esse confirmatum, ad modum loquendi pertinet. Certe non putô, eum peccare, qui cum omnibus pene Scholasticis loquitur: licet enim homo per intrinsecam dispositionem in hac vita non possit dici confirmatus in gratia, tamen propter Divinam assistentiam, quæ eum regit, rectè dicitur confirmatus. Unde patet, non excludi orationem hominis & studium. Quod autem dicimus esse aliquod perseverantiæ donum, quo posset homo perseverare & non perseverare, & hoc dari omnibus justis, videtur de fide; nisi sit quæstio de nomine: nam Concilium Trid. & D. Augustinus docent, omnem justum posse perseverare: atqui istud posse perseverare est donum Dei; nam nemo potest, nisi Dei auxilio: ergo est quoddam donum perseverandi; quo potest homo perseverare & non perseverare: hoc autem donum non omnino male vocatur donum perseverantiæ, sicut donum quo possum credere, vocatur do-

num fidei, nam ex adjunctis constat,
quomodo accipiat.

R E S P O N S I O

Ad Censuram Assertionis decimaquarte.

Authores
hujus ass.
Docet hoc
Hallen. 3.

P. q. 6. m.
5 c. 4 Tho
mas q. 13.
de verit. a.

11. ad 1 &
lib. 3. cont.

gen. c. 159
Soto acriter
hoc defendit lib.

1. de nat. &
gra. c. 18.

& probat
ex Origine

Hier. Aug.

Adrian. in

4. d. 15.

Dried. de

cap. & re-

demp. fol.

413. 131.

Ruar. a. 7.

fol. 331 &

339. Vega

lib. 13. in

Trid. c. 12.

& 13.

Valde mirum est, DD. Censores
hæc ita accipere, quasi velimus
excæcatos & infideles habere tantum
auxilii in actu secundo, ut immediatè
possint converti. Quis enim Catholicus
hoc diceret? Neque verba ullo modo
præ se ferunt, ut patet ex longissima
quæstione, quam hac de re feci, ubi
ostendi, catenus eos habere auxilium suffi-
ciens, quia Deus non ita eos deserit, quin
eos loco & tempore excitet ad bonum,
paratus iuvare ulterius, si ipsi Divinas
inspiraciones non repellant. Quod autem
dico, infideles semper habere auxilium
sufficiens ex parte Dei, hoc non est dice-
re, eos semper habere divinas inspiratio-
nes: nam fusè docui contrarium; sed
tantum, quod nunquam sint in tam ma-
lo statu, ut Deus illos in posterum dese-
rat, nunquam amplius pulsando ad osti-
um cordis. Quidam enim dicunt, esse
quædam peccata tam gravia, similiter esse
quandam

quandam peccatorum mensuram, postquam Deus hominem omninò deserat: quod ut excluderem, dixi semper: habere autem semper auxilium sufficiens ex parte Dei, est Deum esse paratum homini auxilium præstare, ut sæpe ibi diximus. Neque ideo frustra Ecclesia pro infidelibus aut fidelibus orat, quia Deus non semper pulsatur. Unde petit, ut crebrius pulset, deinde petit, ut efficaciter pulset; nimirum ita, ut novit illos secuturos: & ut ait Augustinus, ita vocat, sicut novit congruere, ut vocantem non respuat,

Neque hæc doctrina quidquam commune habet cum Pelagio, ut patet intelligenti, & bene docet Ruard. a. 7. pag. 346. & 339. nemo enim Catholicus dicit infideles per liberum arbitrium habere sufficiens auxilium, ut credant, gratiam verò dari, ut facilius hoc præstent, quod volebat Pelagius: sed dicimus, infideles interdum excitari à Deo, & ita excitatos sensum posse progredi,

R E S P O N S I O

Ad Censuram Assertionis decimaquinte.

ITa exponit hæc loca Scripturæ S. quibus significatur impossibile hominem converti, Andreas Vega lib. 13. in Concil. Trid. cap. 12. & 13. Soto in 4. d. 15. a. 1. q. 1. & alii multi contra hæreticos. Adferunt etiam aliam expositionem, scilicet esse impossibile per vires naturæ. Utraque videtur bona, tamen prior videtur melior, nam commune est omnibus, ut non possint converti per vires naturæ: Scriptura verò peculiariter de quibusdam valde malis, etiam consuetudine pravâ confirmatis, dicit eos non posse converti, ut cap. 13. Hierem. Sapien. 12. Joan. 12. & aliis locis, quando peccatum in Spiritum S. dicitur incurabile. Illud autem Eccles. 1. *nemo potest corrigere eum, quem Deus despexerit*, intelligendum est in sensu composito, ut exponit D. Thomas 1. p. q. 23. a. 3. sicut cum dicimus, reprobum non posse salvari; vel quod homo destitutus auxilio Dei, quamdiu est eo destitutus, non possit à quoquam emendari: nemo tamen est, qui ita destituitur.

tuatur. Cum autem additur aliquid impossibile, quo impossibilitas ipsa restringatur; ut cum dicitur *sine me nihil potestis facere*, id est, viribus naturæ aut solâ lege non potestis justificari; sine dubio intelligitur de absoluta impossibilitate: tam enim est homini impossibile sine gratia aliquid boni spiritualis facere, quam beare. Sed est argumentum sophisticum, si quis ita colligat: Scripturæ quæ significant impossibile esse converti, non sunt intelligendæ de absoluta impossibilitate: sed tantum de magna difficultate, ergo quæ significant impossibile converti viribus naturæ vel sine gratia; non sunt intelligendæ de absoluta necessitate, sed tantum de difficultate: nihil ergo nobis commune est cum Pelagio. Quod autem ii, qui dicuntur inductati, non ita destituantur à Deo, ut nullo modo possint converti amplius, ostensum est multis testimoniis & exemplis ex Scriptura & Patribus, ad quæ nondum vidi esse responsum. Sentit D. Ruardus a. 7. pag. 326. ubi etiam id probat ex Augustino.

R E S P O N S I O.

*Ad Censuram Assertionum decimasexta
& decimasextima.*

Quomodo illud intelligendum sit, satis explicui in lectionibus. diximus enim parvulos habere sufficiens remedium contra peccatum ex parte Dei, non quidem eo modo sicut adulti, qui se ipsos juvare possunt, sed hoc sensu, quia Deus hoc remedium instituit pro omnibus parvulis, nemine excepto, & per se non statuit impedire ejus remedii applicationem, neque ordinat vel facit seriem causarum naturalium vel liberarum, ut hæc remedia parvulis non applicentur, sed tantum permittit sinendo eos agi suis motibus secundum providentiam communem. Permittit autem ob duas causas ut dixi. Primo, ut ostendat in his justitiam suam, sicut in aliis misericordiam. Cur enim hunc parvulum vult potius nasci tempore, loco, modo &c. quo scit eum non perventurum ad Baptismum secundum communem cursum rerum, quam istum parvulum? Et hic se produnt inscrutabilia Dei judicia. Vide Ruardum in

in simili articulo 7. pagina 347.

Secundò , quia non est consentaneum , ut Deus semper faciat miracula mutando cursum naturæ & impediendo hominum libertatem. Et hoc modo parvulos habere sufficiens remedium ex parte Dei , rectè colligitur ex eo, quod Christus pro omnibus mortuus est, & pro omnibus Baptismum instituit. Idem colligitur ex ep. 17. D. Cypri. ad Fidum. Probat enim infantibus ante octavum diem non esse dene-gandum Baptisma ; ne nostrâ negligentiam pereant , quibus Deus gratiam suam sine discrimine impartiri cupit. Deus enim, inquit , ut personam non accipit , sic nec ætatem ; cum se omnibus ad cælestis gratiæ consecutionem æqualitate librata præ-beat Patrem , & ut alii legunt , *Parem*. Item esse apud omnes sive infantes sive majores natu Divini muneris unam æ-qualitatem , declarat nobis Scriptura &c. Denique concludit : & idcirco , Frater charissime, hæc fuit in Concilio 60. Episcoporum nostra sententia , à Baptismo & gratia Dei , qui omnibus misericors , benignus , & pius est , neminem per nos debere prohiberi.

Mirum ergo est , DD. Censores dicere , ex D. Cypriano nullo modo colligi,

Deum non impedire applicationem remedii; si enim Deus disponit causas naturales & liberas eo fine, ut parvulis quibusdam non possit adhiberi remedium, quomodo dicit Cyprianus, Deum se præbere patrem vel parem omnibus ad celestis gratiæ consecutionem? Item quomodo una Divini muneris apud omnes æqualitas? Quæ æqualitas in hoc consistit, quòd ipse ex parte sua instituerit pro omnibus Baptismum, & cupit applicari omnibus, quatenus ordo providentiæ communis permittit. Et hæc sententia multò magis videtur pia, quam ea, quæ dicit, quotiescumque puer aliquis non est baptizatus, Deus voluntate beneplaciti & absolutâ ante prævisionem causarum impediendum voluit, ut ei Baptisma non applicaretur, idque suo justo iudicio, & ideo sic disposuit omnes causas naturales vel liberas, ut in effectu applicatio esset impossibilis. Neque detrahitur Divinæ providentiæ, si dicamus, sicut dicimus, Deum ante omnem prævisionem determinationis causarum secundariarum naturalium & liberarum non præordinasse, atque voluntate beneplaciti prævoluisse omnes effectus naturales & liberos in particulari cum omnibus

bus suis circumstantiis v. g. ut ego tot & tales habeam cogitationes & volitiones tali tempore, loco, momento, ordine, tantâ intentione &c. Item ut in hac regione hoc anno tot nascantur culices, tam magnæ, determinando cuique quoties debeat volare, per quæ aëris spatia, quoties & quibus locis quiescere & quamdiu vivere unaquæque, & à quo tandem occidi. Item quot & quales crispationes undarum, motus pulvisculorum &c. Item quot gramina sint in hoc prato, quàm longa, quàm lata, ad quam partem singulis momentis moveri debeant. Probat ex Patribus. Origen. lib. 7. in epist. ad Rom. Hier. in cap. 26. Jerem. Chrysost. hom. 97. in cap. 10. 1. ad Cor. qui dicunt, non ideo aliquid futurum, quia Deus præscit, sed ideo præscire, quia est futurum: quod intelligendum est de talibus futuris, qualia diximus. Damasc. lib. 7. de fide cap. ult. Deus omnia præscit, sed non omnia prædefinivit. Idem docet Anselm. de conc. præscientiæ & prædestinationis cap. 1. & 2. & D. Thomas p. 1. q. 23. a. 7. ubi dicit expressè, numerum culicum non esse à Deo prædefinitum, sicut cæteras mundi partes, prævisum tamen. Item q. 6. de ve-

ritate a. 3. Nec repugnat, quod ait q. 19. a. 8. quædam contingenter evenire; quædam necessariò propter infinitam efficaciam Divinæ voluntatis, quæ non tantum facit quæ vult, sed etiam eo modo quo vult: nihil enim aliud vult dicere, quam ex infinita efficacia Divinæ voluntatis provenire, ut unumquodque habeat suæ conditioni & modo productionis consentaneos effectus, liberi liberas, necessarii necessarias. Mirum autem est, DD. Censores hanc sententiam de providentia modò tam graviter accusare, cum nondum sint duo anni, quòd eam publicè in scholis impressis conclusionibus defenderint, quas apud me habeo: & certè si illa sententia admittatur, non satis video, quomodo defendi possit libertas & contingentia; nam ex hoc potissimum fundamentò hæretici nostri liberum subvertunt arbitrium, & Deum faciunt authorem peccati. Videatur Phil. Melancthon apud Ruard. a. 7. & Calv. lib. 1. Instit. cap. 17. & 18. præsertim §. 1. & confirmatur ratione, quia quod absolutà & efficaci voluntate ante omnem prævisionem determinationis causarum secundarum decretum est, nulla creata potentia impedire potest: ubi ergò est contin-

contingentia & libertas ? Item sequetur Deum absolutâ voluntate decrevisse omnes motus animorum , & omnes externas actiones impiorum , ac proinde ad ipsius providentiâ pertinet procurare , ut suis temporibus fiant : unde manifestè sequitur , Deum non minùs esse Authorem proditionis Judæ , quam vocationis Pauli.

Sed dicet fortè aliquis , actus qui sunt intrinsecè peccata , non esse efficaciter præordinatos & prævolitos à Deo , sed alios omnes.

Contra, quia hæc pertinent ad prædestinationem vel reprobationem , ergò Deus maximè circa hæc singularem habet providentiâ : nam ideo DD. Censores volunt potissimùm tegulam , quæ fortè in caput infantis baptizandi delabitur eumque ante Baptismum interimit, divinâ providentiâ ita procurante cecidisse , quia hoc pertinet ad ejus prædestinationem vel reprobationem : ergo peccata non debent excipi. Deinde , ergo saltem diminuta erit providentiâ circa peccata. Ideo judicant me divinæ providentiæ detrahere , quòd non omnia ponam sufficienter præordinata.

Tertiò , si peccata non sunt à Deo præordinata , sed tantùm permissa , ergò

saltem hoc habeo, infantem posse mori hic & nunc sine efficaci divinæ voluntatis præordinatione, nempe si mater cum destinato consilio interimat.

Quartò si actiones, quæ sunt intrinsicè peccata, non sint à neo efficaciter præordinatæ, cur non idem dici potest de omnibus actionibus ludicris, & multis aliis minoris momenti?

Sed dices, si hæc non sunt efficaciter præordinata, quomodo ergo subsunt Divinæ providentiæ?

Respondeo, sicut dixi in lectionibus meis, Divina Providentia etiam circa peccata habet quinque actus. Primò videt, quidnam quâvis occasione positâ esset secuturum, nisi ab eo impediat. Secundò quidnam de facto sit futurum videt, nisi ipse impediatur. Tertiò habet voluntatem permittendi vel non permittendi circa illud. Quartò videt illud positum in rebus suo tempore. Quintò ordinat illud ad suam gloriam & aliorum bonum ex malo bonum eliciendo: habet enim omnium corda in manu sua, & videns, quid quâvis occasione positâ homo esset factururus, potest permittere illud, vel non permittere, prout placuerit; nec potest quidquam in actum evocare, nisi

nisi ipso permittente vel annuente. Unde quando dicimus, Deum permittere peccata, non intelligitur sic otiosè permittere, sicut homo permittit ea, quæ nescit, nec potest impedire, nec ordinare; sed intelliguntur ipsi quinque actus jam expressi.

Ex his patet responsio ad scripturas citatas in Censura quas etiam Calvinus adfert ad stabilendum eandem sententiam. Sine enim voluntate Dei non cadit pilus de capite, non quidem ordinante efficaciter ut tali momento talis pilus cadat de capite in tali loco &c. sed non sine voluntate permitte.

Ad testimonia D. Augustini: Deo nihil est fortuitum vel casuale; non quòd omnia procuret fieri, quæ fiunt; sed ob dictas causas: quia prævidet omnia, & nihil potest fieri, nisi ipse permittat, & quasi consensum præbeat ut fiat, laxando manum suam, quâ omnium causarum radices continet. Quòd autem in illis qui non baptizantur, cernatur iudicium, & quomodo, sæpè dictum est: nam etiam cernitur Dei iudicium, dum quis ob peccata sua Dei auxilio destituitur, & ita in gravius peccatum cadit: nec dicendum videtur, Deum præordinasse, ut in peccati

peccati præcedentis pœnam in aliud gravius caderet: quamquam quidam ex MM. NN. hoc doceat. Agunt autem in mortibus parvulorum iudicia Dei modo iam dicto.

Quod autem D. Augustinus non sentiat, à Deo omnia efficaciter esse præordinata manifestum est: nam lib. 3. de lib. arb. cap. 4. ait: *Sic tamen præscientia & memoria tua non cogis fieri, vel esse facta, ne meministi vel præsci, ita nec Deus.* Vide totum caput. Et in sententiis, quæ apud D. Prosperum: Voluntas Dei est prima & summa causa omnium spiritualium corporaliumque motionum: nihil enim fit visibiliter vel sensibiliter, quod non de invisibili & intelligibili Summi Imperatoris aula aut jubeatur, aut permittatur. Non ergo vult Augustinus, omnia à Deo esse prævolita, sed multa tantum permissa. Et lib. 7. de Civ. cap. 30. *Deus omnia ministrat, ut & agere sinat ipsa suos motus.* sunt & alia testimonia. Atque hæc fusius, quia sunt majoris momenti, nec contraria sententia est communis, ut dicit Censura, quia Patres nobiscum sentiunt, ut ostendimus, & ex Scholasticis præter Scotum, qui illam teneat, scio neminem: qui tamen si nostra tempora vidisset, siam mutasset sententiam. Quod

Quod autem in Censura tamquam à nobis pro ratione allata adfertur, quòd nempe videatur Deo indignum ejus providentiam ad has minutias deducere; nunquam tale quid diximus; quia ostendimus Dei providentiam ad omnia minutissima perfectè pertingere: Sed hæc sunt verba nostra: *Indignum videri providentiâ Divinâ, omnia ista in particulari efficaciter Deum præordinasse ante prævisionem determinationis causarum secundarum*: Quamquam eum modum loquendi Hieronimus & Nyssenius non recusent.

R E S P O N S I O

Ad Censuram Assertionis decimoctavæ.

Quæ ad primam partem attinent, supra exposita sunt: solum explicanda hic est probatio, quam Censura oppugnat. Sed hic nulla est difficultas, si omnia legantur, quæ circa illum locum dicta sunt. Diximus enim primò, nullum opus moraliter bonum solis naturæ viribus factum, esse propinquam aut remotam dispositionem ad gratiam, sed tantum esse ut prohibens impedimentâ gratiæ, faciensque hominem minus in-

K

ptum

ptum. Secundò deum interdum dare sceleratissimis majora auxilia gratiæ, quàm minùs malis. Tertiò, deum non exspectare ordinariè, ut infideles vel peccatores faciant quod in ipsis est, sed deum suâ benignitate excitando & pulsando sæpissimè prævenire. Dico præterea, si infideles jam à deo per inspirationes & motiones supernaturales, quales viribus naturæ non possunt in se elicere, excitati sibi non deessent, deus illos juvaret ulterius. Item si tunc, quando non excitantur, conentur vivere secundum dictamen rectæ rationis & eas motiones quas à deo accipiunt ut authore naturæ; piè credendum est, deum non diu dilaturum, quin illos suâ gratiâ incitare incipiat: cùm enim sit propensissimus ad benefaciendum omnibus tamquam omnium pater, ut ex Cypr. diximus, decet ut illi imprimis suam misericordiâ infundat, qui minùs resistit, sicut ait Cypr. de parvulis. Non ergò provocant hæc opera moralia deum ad excitandum supernaturaliter, veluti merita de condigno & congruo, sed tanquam removentia majora divinæ gratiæ impedimenta. Nihil ergò nobis cum ea sententia quæ dicit, *Gratiam secundum merita nostra dari*, cùm contrarium ubique expresse

expresse doceamus. Idem docet D. Ru-
ardus art. 7. pag. 346.

RESPONSIO.

Ad Censuram Assertionis decimanonæ.

IN hac Censura nihil contra me dici-
tur. Intellico autem infidelibus dari
moraliter sufficiens auxilium ad servan-
dum decalogum, sicut datur sufficiens, ut
possint pervenire ad fidem: non enim ma-
nentes in infidelitate & peccatis suis pos-
sunt servare omnia præcepta Decalogi;
sed possunt peccata deponere & converti,
& sic salvari. Ex eo enim quod infideles
omnes obligantur ad omnia præcepta mo-
ralia, colligitur illos habere ex parte Dei
sufficiens auxilium: *Iuste enim instat præ-*
cepto, qui prævenit auxilio, inquit D. Leo
serm. 16. de passione. Unde non recte di-
citur, quod Deus propter peccatum ori-
ginale illis deneget auxilium, quo possint
servare præcepta, & tamen infideles dam-
nabiliter peccant, & illa peccata illis im-
putari, quia suâ culpâ, nempe originali,
carent auxilio: hoc enim accederet ad sen-
tentiam hæreticorum, ut qui dicunt infi-
delem necessariò peccare, tamen imputa-

ri quia per culpam originalem in hanc necessitatem sese conjecerit.

R E S P O N S I O

Ad Censuram Assertionis Vigesima.

Distinxi inter prædestinationem, & immediatam & efficacem electionem ad gloriam. Prædestinatio enim est præparatio gratiæ, per quam Deus sciebat hominem salvandum: atque hanc ostendi ex Scripturis & Patribus non esse ex ullis prævisis meritis, sed ex sola Dei voluntate. Electio immediata & efficax ad gloriam, est præparatio gratiæ seu voluntas absoluta & efficax dandi gloriam. Hanc dixi esse probabiliter ex prævisione meritorum; est enim gloria postremus effectus prædestinationis: posteriores autem effectus possumus mereri, ergo quod Deus ab æterno præparaverit efficaci & immediatâ voluntate gloriam, fuit ex prævisis meritis, quæ per gratiam ipsius eramus facturi. Hanc distinctionem ponit D. Ruardus a. 7. pag. 340. & Driedo de concord. lib. arb. & prædest. fol. 54. & multi alii recentiores, & ita reliquos Patres conciliant cum D. Augustino: nam
D. Augu-

D. Augustinus cum dicit prædeterminationem non esse ex meritis, per prædeterminationem intelligit præparationem gratiæ. Cum autem alii Patres dicunt prædeterminationem vel electionem esse ex meritis, per prædeterminationem intelligunt electionem ad gloriam. Cæterum testimonia Patrum hoc asserentium longum esset referre: pauca referam. D. Petrus apud Clementem lib. 3. recog. prævidens, inquit, Deus, quod illa potestas liberi arbitrii alios quidem faceret bona eligere, alios mala, & per hoc in duos ordines necessario propagandum esse hominum genus, unicuique concessit ordini & locum & Regem. Clemens Alex. 7. Stromatum: Quos prædestinavit, id est, clegit ad gloriam ante mundi constitutionem sciens fore justos. Ambr. lib. 5. de fide c. 3. non prædestinavit priusquam præscivit, sed quorum præscivit merita, prædestinavit præmia. Hier. q. 10. ad Helibiam, & alii multi. Tenet etiam apertè Scriptura Mat. 25. ubi dicitur: salvandis præparatum est regnum à constitutione mundi propter merita. Et multis aliis locis. Mediatè tamen potest quis dici electus ad gloriam ante prævisionem meritorum; nempe quia electus ad gratiam prædeterminationis, per quam Deus sciebat illum

perveniturum ad gloriam. Hanc patet esse sententiam Augustini, neque probatum est contrarium. Quod autem DD. Censores dicunt, August. non agnoscere aliam electionem quàm absolutam & efficacem: Respondeo, si intelligant de electione ad gratiam, concedo: nam Deus efficaciter & absolutà voluntate, quæ nullam conditionem requirat ex parte hominis, constituit homini dare gratiæ suæ auxilium. Si verò intelligant de electione ad gloriam, nego: quia promissiones vitæ æternæ sunt conditionatæ, ut docet Concil. Trid. Sess. 6. can. 20. Contrarium est Calvini libi. 3. Inst. cap. 22. §. 7.

R E S P O N S I O

Ad Censuram Assertionis vigesima prima.

Volebam probare, hominem non ita esse efficaciter electum, quin verè & propriè ab ea possit excidere, ac proinde non ante prævisionem operum saltem conditionalem: id quæ probavi ex Apoc. *Tene quod habes, ne alius coronam tuam accipiat.* Et quidam DD. quem apud me habeo, his verbis hunc locum solvit: respondet, D. Augustin. cap. 13. de corrept.

corrept. & gra. Scripturam ita loqui, non
 quòd corona possit amitti, sed ut homo
 sit in timore. Quo loco obiter inspecto
 visum est mihi hoc ex Augustino colligi:
 quòd indicat hoc dici, non quòd sit incer-
 tum eos perseveraturos, sed ut non al-
 tùm sapiant sed timeant. Patet autem du-
 pliciter intelligi certum esse, hominem
 perseveraturum. Primò, quia Deus ab-
 solutâ & efficaci voluntate ante omnem
 præscientiam conditionatam, vel saltem
 nullâ habitâ ratione præscientiæ condi-
 onatæ vult hunc perseverare, unde dat illi
 talem gratiam, ex cujus mera efficacia se-
 quatur infallibilis perseverantia, & sic
 non bene constant hæc verba cum illo
 loco Apoc. nam hinc videtur sequi, ho-
 minem absolutè loquendo non posse amit-
 tere coronam: non enim potest non fieri,
 quòd ex tali efficaci & absoluta ordina-
 tione certum est. Sed Augustinus de tali
 certitudine non est intelligendus. Unde
 secundò potest dici, certum esse, hunc
 hominem perseveraturum, quia Deus de-
 crevit illi dare talem gratiam, cum qua de
 facto videbat ipsum perseveraturum, si-
 cut supra dictum est: & cum hoc opti-
 mè constat, quòd homo verissimè & pro-
 priissimè possit amittere coronam, in sensu
 tamen

tamen composito. Verum etiam est, certum esse, talem hominem perseveraturum & non posse non perseverare. Et sic intelligendus est D. Augustinus, ut patet ex supradictis, & ex hoc ipso capite. Unde hic Augustini locus non est ex acre citatus, sicut nec alii quibus usus sum, licet interdum fiat, ut aliter D. Augustinum intelligamus, quam fortè aliqui Magistri NN. neque tamen mirum videri debet, si interdum in citando vel capitulum numerus non rectè assignetur, vel ipsa verba Authorum non tam accuratè citentur, quia sæpe fit, ut & ipsi bene legentes malè ipsos numeros annotemus, vel etiamsi bene annotati & citati fuerint, ab auditoribus malè scribantur: quorum alterum vel utrumque in hac Censura accidisse comperi. Reliqua, quæ in Censura dicuntur, non sunt contra nos.

R E S P O N S I O

*Ad Censuram Assertionis vigesimæ
secundæ,*

Non videntur DD. Censores percepisse meam mentem; nam non dico sufficere hominibus in statu naturæ lapsæ

lapsæ dona habitualia, ut possint perseverare si velint, quæ sufficiebant in statu innocentiae: per hæc enim sola homo lapsus nullo modo potest perseverare, ut eleganter D. Augustinus docet cap. 22. de dono persever. Et mirum est hoc nobis imponi; nam luculenter in hac materia de prædestinatione docui contrarium, ostendens in quo differat gratia necessaria homini lapsæ ad perseverandum, à gratia Adami. Nempe homini lapsæ præter omnia dona habitualia ad perseverandum necessariam esse crebram excitationem, singularem protectionem, directionem intellectus &c. quæ Adamo secundum sententiam D. Augustini non erant necessaria; gratia ergo, quæ homo lapsus potest perseverare, præter dona omnia habitualia includit hæc dicta auxilia & protectiones; & cum hac gratia ita potest perseverare, ut possit etiam non perseverare. Sic Adam per dona habitualia poterat perseverare, ut posset etiam non perseverare, & in eo est similitudo inter gratiam Adami & hominis lapsi: non enim putamus præter dictas gratias necessariam esse ad perseverandum gratiam illam quæ suâ efficaci præoperatione faciat hominem perseverare. Quomodo autem di-

cat Augustinus, nos non tantum egere gratiâ, quâ possumus, sed etiam quâ faciamus, supra expositum est; quia non tantum egemus libero arbitrio etiam habitibus instructo, sicut Adam, sed etiam singulari curâ, protectione, excitationeque crebrâ, quibus fiat, ut faciamus & de facto perseveremus.

R E S P O N S I O

*Ad Censuram Assertionis vigesima
tertiæ.*

Oportet videre quâ occasione ita argumenter: volo enim probare, hominem non esse efficaciter electum ad certum gloriæ gradum ante omnem prævisionem etiam conditionatam operum, idque contra Calvinum, qui ex hoc colligit, omnia opera hominum in particulari secundum omnes suas circumstantias & mensuras esse efficaciter præordinata, idque semotâ omni prævisione Vide Calvinum lib. 3. Inst. cap. 21. §. 5. & 7. & 22. Excludit omnem præscientiam & acriter impugnat nostram sententiam. Hanc sententiam refuto, quia si opera omnia, nullâ habitâ ratione præscientiæ etiam conditionatæ

ditionatæ (nam contra talem hic disputabam præordinationem) sunt à Deo secundum omnes suas circumstantias & modos, ut exactè tantæ gloriæ respondeant, efficaciter præordinata, ergo homo non potest aliud nec aliter operari, quàm sicut à Deo decretum est: quia si decrevit ut hoc momento faciam talem actum, tam intensum &c. idque absoluta & efficaci voluntate, quomodo id potero evitare? Sed hoc supra secus probatum est. Videatur D, Thom. q. 6. de verit. a. 3. ubi vult non omnia media prædestinationis ante omnem præscientiam esse præordinata. Dico ergò, sicut dixi supra, non esse hanc Augustini sententiam, quâ omnes salvandi sunt electi efficaciter ad gloriam, & ad omnia media prædestinationis nullâ habitâ ratione præscientiæ; hoc enim nihil est aliud dicere, quàm Deum absolutâ voluntate velle, ut hic tantam gloriam habeat, & tot ac tantas actiones talibus locis, momentis, modis faciat. Sententia ergo Augustini est, Deum elegerisse omnes, qui salvantur, ad talem gratiam, cum qua si eis daretur, sciebat eos salvandos, & nihil præjudicabat libertati: actuale verò perseverantiam esse donum Dei propter Christi merita, non est du-

bitandum sicut supra explicatum est ex D. Augustino.

Ad illud autem, quod in Censura dicitur: si ex Dei absoluta præordinatione, qua aliquid ante omnem prævisionem efficaciter præordinat, sequitur illam rem necessario futuram, etiam sequetur Deum sibi necessitatem imponere: respondeo re torquendo: id quod Deus absolutâ voluntate ante omnem præscientiam præordinat, positâ hac præordinatione, hoc nullo modo potest impediri, ut patet in præordinatione creationis mundi & partium ejus, nam hæc præordinata sunt ante omnem præscientiam, & ideo nemo potest impedire, quo minus suo tempore sint facta: ergo similiter, si omnia nostra opera absolutâ voluntate sint præordinata & prævolita, nullâ habitâ ratione præscientiæ, nullo modo possunt impediri.

Patet à paritate rationis; quia utraque æque absolutè à Deo sunt prævolita. Cum ergo opera nostra facile possint impediri, signum est, non esse efficaciter præordinata sicut sunt partes mundi &c. Positâ enim divinâ præordinatione, impossibile est impedire, quod absolutè ante omnem præscientiam præordinatum est:

omne

omne enim efficaciter præordinatum habet necessariam habitudinem cum præordinatione. Neque ideo detrahitur Deo libertas ; quia Deus ita præordinat , ut possit non præordinare : nos autem non possumus facere ut non præordinet in sua æternitate ; unde ipse manet liber , nos tamen non similiter maneremus. Deinde libertas Dei est alterius rationis quam nostra : Deus enim est liber, quia in sua æternitate potest quamvis rem præordinare vel non præordinare ; ubi tamen præordinata est, voluntas ipsius manet determinata necessitate immutabili ita ut in sensu composito non possit contrarium : nostra autem voluntas nunquam ita determinatur ad actus quos elicit , quin illam excitationem possit excutere , & eâ stante (si non est actus voluntatis) possit velle contrarium. Externa ergo creatio est libera, quia velle Dei est liberum, a quo tamen velle necessariò procedit : actus autem elicti à nostra voluntate intrinsecè sunt liberi, & proinde nullam causam habent, unde necessariò procedant. Unde nihil hoc Scripturæ Sacræ repugnat , si dicamus probabiliter argumentando difficile esse tueri libertatem , ubi omnia in particulari efficaciter ponuntur à Deo.

ante omnem prævisionem etiam conditionatam prævolita & præordinata : sed potius Sacræ Doctrinæ repugnat , dicere , quod Deus non minorem nobis necessitatem imponit , ad faciendā omnia opera nostra hīc & nunc , quā ipse sibi imponit , cum absolute aliquid decrevit facere. Item dicere , sicut Deus , cum aliquid decrevit , non potest aliter facere , quā decrevit , ita non possumus nos aliter facere ea , quæ facimus , eo quod omnia jam supponantur decreta. Sanè ex hoc fundamento hæretici nostri libertatem tollunt & Deum authorem malorum faciunt , quibus hactenus non vidi ferè aliter à Catholicis responderi , quā negando talem præordinationem. Hæc ergo argumentatio erat satis probabilis , ut non tam duram mereretur censuram.

R E S P O N S I O

*Ad Censuram Assertionis vigesima
quarta.*

Quomodo hæc sint præordinata à Deo , in quæst. de præscientia fuse explicui , ubi ostendi , Christi passionem &

& Sanctorum tormenta non fuisse à Deo præordinata in particulari cum omnibus suis circumstantiis antè prævisionem malitiæ Judæorum & Tyrannorum, quam Deus prævidebat fore talem, ut si permitterentur, tali & tali modo Christum interficerent & Sanctos cruciarent: Quo præviso per præscientiam conditionatam, pro sua sapientia permisit, quæ, quantum & quando illi visum fuit, & voluit suis sanctis dare robur & fortitudinem, ut constanter ea perferrent: Et hoc vult Apost. ad Philipp. 1. Scilicet donum Dei esse, non tantum credere, sed etiam patienter ferre pro Christo illatas injurias. Tormenta ergò à Deo permessa sunt, sed patienter perferre tormenta, positivè à Deo donatur. Ad testimonium ex Actis aliàs respondi: non enim decrevit Deus absolutâ voluntate, ut Christus flagellaretur, conspueretur & blasphemaretur, qui sensus placuit Calvino, sed altissimo consilio decrevit permittere, & Christo præceptum dedit, ut hæc perferret. Similes sunt multæ locutiones in Scriptura. Similiter percussit Pater Christum, non quòd Judæis influxerit, malitiam temperaverit & formaverit in istorum suppliciorum infligatione, sed quia cum non protexit,

protexit, sed impiis percutiendum exposuit. Ita Catholici hæreticis respondere solent.

RESPONSIO

*Ad Censuram Assertionis vigesima
quinta..*

Satis dictum est de hoc loco superius, breviter tamen dico, me non velle dicere, nec ullo modo inducere Vetus Testamentum, id est, Legem & Legis promissa & comminationes fuisse aliquo modo sufficientes, ut homo possit aliquo modo ambulare in præceptis Dei sine spiritu interno: hoc enim prorsus est Pelagianum. Sed quia in Veteri Testamento etiam multis dabatur gratia interior, & auxilium ut possent ambulare in præceptis, ideo dico hic promitti abundantiorē gratiam: volebam enim ostendere tantum ex illo loco non probari; præter gratiam excitantem & adjuvantem superius explicatam, esse aliam quandam necessariam, quæ efficaciter faciat, ut faciamus; quasi in Veteri Testamento habuissent gratiam efficacis in operationis, & hæc promitteretur his verbis, ut putant Magistri Nostri,

Nostri, & etiam vult Calvinus: nam talem gratiam dicimus hic non promitti, sed gratiam & dona habitualia, auxilium excitans & adjuvans, quibus fiat, ut & impiis detur cor novum, & piis detur amplius, quàm in Veteri Testamento, & utrisque, ut sanctè vivant eo modo; quo supra ex Augustino explicatum est.

R E S P O N S I O

Ad Censuram Assertionis vigesimæ sextæ.

QUicumque credunt filio, rectè dicuntur dari filio, nam facti sunt ejus discipuli, idque operâ patris. Hos autem omnes non vult pater absolutè salvos fieri, quia multi ex illis damnantur. Aliquando tamen propriè dicuntur prædestinati dati filio, sicut fortè Joan. 17. cum ait: *Non pro mundo rogo sed pro eis, quos dedisti mihi.* Quamquam ad litteram ibi tantùm videatur loqui de Apostolis; nam pro aliis credituris per Apostolos, & denique pro toto mundo rogat paulò inferius, & hos vult pater absolutè fieri salvos, sed non ante omnem præscientiam saltem conditionatam. Quod autem Censura infert; ergo universi hominès etiam

M

repro-

reprobi sunt dati filio: Respondeo, etiam hunc modum loquendi non abhorre à Scripturis, ut patet Psal. 2. ubi etiam reprobi dantur: & Matt. ult. *data est mihi potestas omnis.* item hoc loco, *omnia tua mea sunt:* & imprimis de reprobis, qui credunt & sunt in gratia, sicut sunt filii, ita etiam possunt dici dati Christo. Alii etiam ita dati sunt, ut ipsius sub sint potestati: sed videndum, quâ occasione quidque dicatur.

R E S P O N S I O.

Ad Censuram Assertionis Vigesima septima.

Hunc locum Apostoli Amb. Chrysost. Theop. & multii alii Patres generatim exponunt de omnibus Christianis diligentibus Deum, & non tantum de prædestinatis: & ratio est, quia hortatur Apost. Rom. ad patientiam in persecutionibus ut ait Chris. & patet ex præcedentibus; idque hoc argumento, quia omnes calamitates iis, qui diligunt Deum, cedunt in magnum meritum, nempe si velint manere in dilectione. Non videtur autem loqui de prædestinatis tantum, quia non solemus sic exhortari, ferte patienter injurias; quia, si estis prædestinati, omnia cedent vobis in bonum. Hinc patet responsio ad argumentum Censuræ;
Nam

Nam tribulationes cooperantur in bonum generatim omnibus, quamdiu manent in Charitate. Illa autem particula, *secundum propositum*, variè à Patribus exponitur, ex quibus ea maxime videtur accedere ad mentem Apostoli, quæ dicit, *secundum propositum* vocari idem esse, quod ex divinà benignitate & liberalitate, quæ vocat gratis, quos vult, sicut ab æterno proposuerat, non ex meritis. quæ expositio videtur probari 2. ad Timoth. id est, ubi vocavit nos sancta vocatione non secundum opera nostra, sed secundum propositum suum. Aliter accipit D. Augustinus, cujus expositio subtilis est, nec illam rejicio tanquam falsam.

RESPONSIO

Ad Censuram Assertionis Vigesima octava.

IN hac propositione non puto esse aliquid D. Augustino contrarium; non enim probarunt DD. Censores, *Iacob dilexi*, significari secundum D. Augustinum præparari vitam æternam Jacob ante omnem prævisionem meritorum. *Esau odio habui*, id est, destinavi Esau excludere à regno. Imo D. Ruardus a. 7. p. 340. & Driedo sup. volunt D. Augustinum per dilectionem non intelligere electionem ad gloriam sed ad gratiam: &

M 2

patet.

patet ex D. Augustino lib. 1. q. 2. ad Simpl. ergo loquendo de posteritate Jacob & Esau, de qua omnes fere Patres hunc locum exponunt, exposui hunc locum juxta mentem D. Augustini: & licet non omnia dixerim quæ ipse, nihil tamen contra ipsum. Quod autem illud, *Esau odio habui*, non possit exponi: Ego ante omnem prævisionem demeritorum, Esau à regno excludere statui, patet; quia & secundum Augustinum, & secundum sententiam quorundam Magistrorum Nostrorum, illud velle absolutum Deus non habuit ante prævisionem demeritorum: illud ergo odium si intelligatur esse ante prævisionem malorum, quæ Esau & ejus posteritas gessit, nihil potest esse aliud quam nolle dare gratiam illam & beneficia majora, cum quibus fuissent salvati, qualia dedit Jacob, quod tamen non excluduntur minora. Non ergo metuemus retia veritatis, qui quærimus veritatem, si quo modo eam assequi possumus. Attulimus etiam aliam expositionem hujus loci Patrum testimoniis satis munitam.

RESPONSIO

*Ad Censuram Assertionis Vigestimæ
nonæ.*

REspondeo , hoc argumentum videtur probabiliter procedere , præsertim de reprobis : nam quod absolutâ & efficaci voluntate , nullâ habitâ ratione præscientiæ , decretum est ; non bene intelligo , quomodo possit declinari , ut supra ostendi. Quod autem de parvulis obijcitur : resp. in illo argumento agi de adultis ratione utentibus , ut patet ex scriptis : sicut enim hi ante prævisionem demeritorum non sunt efficaciter prædestinati ad pænas , ita nec parvuli ante prævisionem mortis in peccato originali , ut alio modo probavi. Et his quidem locis semper accepi reprobationem pro efficaci voluntate excludendi à gloria , & destinandi ad pænas : nam si pro permissione accipiat , quam Deus habet , præsuppositâ tamen præscientiâ conditionatâ , sic post solius peccati originalis absolutam prævisionem dici potest , factam esse reprobationem.

RESPONSIO

Ad Censuram Assertionis Trigesima.

JAm supra explicuimus , quomodo se habeat præscientia ad prædestinationem , & quomodo sit certa præscientia conditionata , non ex mera præordinatione , sicut numerus stellarum erat Deo certus ab æterno : ideo enim certus erat, quot futuræ erant stellæ , quia ipse nullâ habita ratione præscientiæ voluit tot condere & non plures vel pauciores. Unde absolutè hoc erat impossibile impedire: numerum vero prædestinatorum non sic putamus præordinatum ; sed Deum primo considerant , quid liberum arbitrium cujusque hominis cum tali vel tali providentiæ & gratiæ modo esset acturum : deinde voluisse dare eum providentiæ modum , cum quo sciebat , Petrum & Paulum &c. salvos futuros : & hæc voluntas est prædestinatio , quæ secundum omnes suos effectus præsupponit præscientiam conditionatam , quâ præscit , quid liberum arbitrium secundum quamque excitationem esset acturum , quæ est omnium occultissima ; tantum abest

abest, ut à nobis possit haberi. Secundum effectus posteriores præsupponit præscientiam absolutam effectuum priorum: ideo enim vult augmentum gratiæ, quia prævidet ipsius meritum. Pro quo notandum, tripliciter posse Deo aliquid esse certum ab æterno. Primò, ex mera præordinatione, ut numerus stellarum futurarum. Secundò, ex mera præscientia, ut peccata. Tertiò, ex præordinatione partim præsupponente præscientiam conditionatam, partim absolutam, ut numerus prædestinatorum. Unde rectè dicitur, hunc numerum non esse certum ex mera præordinatione. Hanc sententiam de præordinatione omninò puto esse D. Augustini; nec ego solus, sed multi hâc rempestate viri doctissimi. Et licet, cùm hanc materiam docerem, nonnihil dubitaverim de electione ad gloriam, obscuritate quorundam locorum D. Augustini impulsus, jam tamen illis locis bene examinatis, & consultis iis, qui in D. Augustino sunt versatissimè, vix dubito, quin D. Augustinus etiam in hoc puncto nobiscum sentiat.

R E S P O N S I O

*Ad Censuram Assertionis trigesimæ
primæ.*

QUàm justè hæc, quæ Censurâ im-
ponit, de nostra sententia dici
possunt, facilè intelliget is, qui vel lectio-
nes nostras perceperit, vel hanc responsio-
nem meani diligenter perpenderit. Nos
enim docuimus, Deum dare omnibus ho-
minibus auxilium sufficiens, quo possint
vitare peccata, & quo possint pervenire
sensim ad justitiam & salvari, si sibi non
desint. Contraria sententia dicit, multos
ita à Deo descri, ut non possint desistere
à peccato, ita ut necessariò peccent, ta-
men imputari illis, quia per peccatum
originale se in eam necessitatem conjece-
runt: Item Deum non dare omnibus a-
dultis pro loco & tempore sufficiens au-
xilium, ut sensim possint pervenire ad
justitiam; imò justis non prædestinatis
subtrahi auxilium, idque in pœnam pec-
cari originalis: Nos docemus, Deum
non impedire vel disponere causas natu-
rales & liberas, ut parvulis non possit ap-
plicari Baptismus: Contraria sententia
docet,

sententia docet, Deum non solum permissivè, sed etiam directè causas impedire & disponere, ut parvulis non possit applicari Baptismus: Nos docemus, Deum non omnia in particulari cum omnibus suis circumstantiis efficaciter ante omnem prævisionem præordinasse & prævoluisse, sed omnia præscivisse, & quædam pro suo arbitratu permittere, quædam non: Contraria sententia vult, omnia à Deo absolutâ voluntate esse præordinata, ante omnem præscientiam, sicut præordinatæ sunt præcipuæ partes universi: Nos docemus, hominem sufficienter excitatum & præparatum à Deo ad aliquod opus posse consentire & non consentire, prout voluerit: Contraria sententia vult, hoc esse falsum, & nunquam tam sufficientem esse excitationem, ut in hominis libertate relinquatur, ut cum illa excitatione & auxilio comitante consentiat vel non consentiat: nam hoc esset, inquiunt, gratiam Dei voluntatis pedissequam facere, & gratiam Novi Testamenti tollere; sed requiri præterea aliam quandam gratiam, quæ faciat inoperando hominem consentire &c. & hanc gratiam esse propriam prædestinationem & eam requiri ad singulos actus bonos: Nos docemus,

N

non

esse homines alios quidem electos immediate & efficaciter ad gloriam, alios destinatos suppliciis, nullâ habitâ ratione præscientiæ: Contraria sententia vult, Deum habitâ solius præscientiæ peccati originalis ratione, hos destinasse gloriæ & tantæ gloriæ, illos suppliciis; & media omnia efficaciter præordinasse secundum omnes circumstantias suas, nullâ præscientiæ habitâ ratione.

Hæc sunt dogmati nostra, & quæ illis sunt contraria, ut patet ex nostris lectionibus & nostro responso. Jam perpendatur, utra magis consentiant S. Scripturæ, Patrum testimoniis, & rationis æquitati, & utra facilius defendi possint contra hæreticos.


PERORATIO.

Hæc sunt, Eximii Domini Magistri Nostri, quæ vestris Censuris breviter existimavimus respondenda. Ex quibus intelligi potest, nostra dogmata peregrina non esse, nedum periculosa & offensiva: sed vestra potius peregrina esse (nam offensiva & periculosa non est meum dicere) ut qui ab ea doctrina recedatis, quam vestra

vestra Facultas, cùm & florentissima erat & nullâ adhuc erroris labe aspersa, tradebat. Nam, ut omittam Adrianum Papam & D. Driedonem & Reverendissimum Episcopum Rithovium, qui bonam partem nostrorum dogmatum expressè tradunt; D. Ruardus, quem Sanderus ait sui temporis eruditissimum fuisse, omnia ista dogmata, quæ in Censura reprehenduntur, ita expressè tradit a. 7. de lib. arb. ut nullâ tergiversatione negari possit, & inspectis locis à me citatis, apertè poterit quivis animadvertere: quod etiam facit subtilissimè Reverendissimus Episcopus Cuncrus. Itaque hæc Censura non tam contra nos est, quàm contra antiquam vestræ Facultatis doctrinam.

Sed dicitis, Ruardum potius in Scholasticis, quàm in Augustino versatum fuisse. Ad quod respondeo, quàm excellenter D. Ruardus in Augustino fuerit versatus, patet abunde ex ipsius scriptis; nulum enim ferè est testimonium D. Augustini ad hanc materiam pertinens, quod non diligentissimè ipse excusserit: neque huic oberat sed maximè proderat diligens Scholasticorum lectio; nam sine illis D. Augustini doctrina vix potest intelligi: Si enim D. Augustinus legatur, antequam

quam solida ex Scholasticis fundamenta
dogmatum jaciantur, multi ex eo maie
intellecto errores pestiferi haurientur, ut
experientiâ teste satis constat. Hinc per-
spicuum est, non nos peregrinam doctri-
nam invehere, sed antiquam instaurare,
quæ olim in hac Universitate, & jam ferè
toto terrarum orbe celebratur.



RESPONSIO

AD CENSURAM

Facultatis Sacræ Theologiæ
Duacensis.

PRÆFATIO.



Quia Censura Duacensis parùm à
Lovaniensi differt, & circumscribitur
verbis & testimoniorum con-
gerie, ad rem parùm pertinen-
tium fusior est, paucis respondebo, in cæ-
teris Lectorem ad Apologiam, quâ re-
spondetur Censuræ Lovaniensi, remit-
tens. Miror autem homines etiam ea, quæ
optimum & planissimum sensum admit-
tere possunt, ferè semper in deteriorem
rapiere partem; cum tamen charitas Chri-
stiana nos doceat, alterius dicta in melio-
rem sensum esse interpretanda, quando
de contraria Authoris mente non constat.
Sanè experior illud in his Censuris, quod
queritur D. Hieron. in Apologia pro lib.
contra Jovin. ubi se defendit adversus
quosdam, qui varias hinc inde ex Scriptis
ejus

Ja

ejus sententiolas collegerant, non respicientes, quorsum, aut quâ occasione, aut quo sensu ab Authore prolata essent. Quod quàm sæpè hic quoque evenerit, ex paucis quæ hic annotabimus, patebit.

Quòd si illi, qui hæc nostra dogmata tam graviter eminùs insectantur, vellent nobiscum coram Viris gravibus & intelligentibus hinc inde à partibus eligendis cominùs agere, facilè hæc tota Controversia dirimi posset, quæ scripto nunquam sopiri poterit, ut Viri prudentes facilè intelligunt.

De Scriptura Sacra.

R E S P O N S I O

Ad 1. & 2. Assertionis Censuram.

NON negamus totam Scripturam esse Dei verbum, & modò quodam à Spiritu S. immediatè dictatum, denique per Scriptores Sacros locutum, eosque esse Spiritus sancti calamos, sed hoc tantum dicimus, non esse necessarium ad auctoritatem Scripturæ S. ut omnes omninò sententiæ & omnia penitùs verba à Spiritu S. novâ & positivâ illustratione sint

sint inspirata , quâ Authores hagiographi
novo modo & novo lumine cognosce-
rent etiam ea , quæ ante vel visu , vel au-
ditu , vel alio modo certò & infallibiliter
cognoverant , & omnia verba. quoad sô-
num materiale[m] novo modo menti eo-
rum objecta fuerint , quod puto me satis
declarasse in altera Apologia ; hanc enim
rationem existimò Prophetis fuisse pro-
priam , & aliis Scriptoribus , quoties-
cumque aliquid Prophetica illuminatione
scribebant : ubi autem ea litteris manda-
bant , quæ experientiâ , vel ratione natu-
rali , vel alio modo infallibiliter cognove-
rant , puto suffecisse , ut peculiari instinctu
Spiritus Sancti adscribendum ea quæ jam
cognoverant , incitarentur , & peculiari
ipsius assistentiâ in omnibus sententiis &
verbis dirigerentur ; nec opus habuisse
novâ aliqua revelatione aut illuminatione
: quod etiam docet P. Bell. cont. de
verbo Dei c. 15. Quod autem dicitur in
Censura Patres docere , in singulis Scriptu-
ræ verbis , syllabis , litteris , apiculis , pun-
ctis latere mirificos sensus , & profunda
mysteria ; hoc ita intelligendum est , sicut
illud Domini Mat t. 5. *Iota unum , aut unus
apex non prateribit à lege donec omnia fiant.*
Nam dicere in ipsis materialibus litteris
aut

& syllabis & verbis ubique latere singula mysteria, videtur signum Judaicum, qui omnes litteras & omnia verba numerant & singulorum numerum expendunt; & inde se multa mysteria juxta artem Cabalisticam colligere putant. Deinde nostra Scriptura multò inferior erit Scripturâ Hebraicâ vel Græcâ; non enim puto DD. Censores existimare, in singulis verbis, syllabis & litteris nostræ interpretationis similia mysteria latere: unde infinitis misteriis nostra Scriptura translata carebit. Neque verum est, Patres in singulis verbis & syllabis mysteria scrutari, ut patet ex eorum commentariis. Quamquam non negaverim, in multis occulta mysteria recondi: sicut Isaïæ 4. in illo verbo *Lemarbe*; & 3. Reg. 3. in illo *Nimerezeth*, & aliis multis: licet etiam ea in quibus non sunt talia mysteria, sint quodammodo à spiritu S. immediatè inspirata, ut dictum est. Quod autem D. Hier. ait in Apocalypsi quot verba tot esse Sacramentâ, hyperbolicè dictum est; vult enim dicere Apocalypsim plenam esse Sacramentis. Unde patet, nihil contra nos facere, quæ hic congeruntur: probandum enim est, Scriptoribus S. omnes & singulas sententias novâ illuminatione,

ne, sicut Prophetis in revelatione supernaturalium fiebat, fuisse dictatas, & omnia verba ita menti fuisse objecta, ut Spiritus S. nusquam iis liberum reliquerit uti hoc vel illo synonymo. Neque verum est, quod hic indicatur, esse errorem Actii alia fuisse immediatè inspirata, alia mediata; quamquam etiam hoc nihil ad rem pertineat, multa Apostolos & Prophetas scripsisse ut homines, sicut nostri Hæretici dicunt de Patribus, cum eorum testimoniis premuntur, Patres homines fuisse.

R E S P O N S I O

Ad Assertionis tertiæ Censuram de Scriptura.

HÆc propositio tantum intelligitur de possibili: nimirum si aliquod opus pium & salutare humanâ industriâ conscriptum, publicâ Spiritus S. attestatione approbaretur tanquam omnibus suis Partibus verissimum & saluberrimum, illud habiturum auctoritatem S. Scripturæ; nec minùs censendum hæreticum, qui aliquid in eo negaverit, quàm qui aliquam sententiam S. Scripturæ inficiatus fuerit. Quo modo summa ea Veritas uti potuisset, si
ci

ei placuisset. Puto tamen (quamvis in propositione dixerim: *qualis fortè est lib. 2. Machab.*) Deum hoc modo usum non fuisse, & etiam lib. 2. Machab. ex peculiari instinctu & infallibili assistentia Spiritus S. scriptum esse.

R E S P O N S I O

*Ad Censuram primæ Assertionis,
de Prædestinatione.*

SIve electio efficax & absoluta ad gloriam, seu præparatio gloriæ in particulari singulis salvandis facta prior sit prædestinatione, ut DD. Censores volunt, sive contra prædestinatio prior censeatur, quàm absoluta gloriæ volitio, ut nos probabilius putamus, nihil ad præsentem descriptionis D. Augustini explicationem refert: nam prædestinatio propriè est præparatio, non gloriæ, sed totius ordinis divinatorum beneficiorum, quibus certissimè pervenitur ad gloriam: quam certitudinem originaliter pendere ex cognitione conditionata, satis ostendimus in altera Apologia, quod etiam docet D. Ruardus a. 7. p. 326. dicens, hæc tamen est differentia inter filios & alios, quod

quod illi vocentur, quo modo dispositos novit Deus, ut sequantur, sicut dicit Aug. q. 2. ad Simpl. & pag. 347. & Dried. de capt. & red. p. 133. & de conc. liberi arb. pag. 51. Quibus locis prædestinationi, id est absolutæ voluntati dandi gratiam quâ quis salvatur, præsupponunt hanc præscientiam conditionatam. Et sanè non video, quomodo hoc negari possit, cum hæc præscientia sit in Deo actus necessarius, prædestinatio autem actus liber, omnis autem actus necessarius prior sit ratione libero. Neque hinc ullo modo sequitur, prædestinationem esse ex prævisione boni usus liberi arbitrii, ut Censura concludit; non enim ideo Deus præparavit alicui eam gratiam, cum qua prævidebat eum salvandum, quia prævidebat illum bene usurum illâ gratiâ: nam infinitis aliis eam gratiam non præparavit, quos tamen eâ bene usuros, si haberent, prævidebat. Unde concedimus omnia testimonia sequentia, quibus probatur prædestinationem non esse ex prævisis meritis, sed ex gratuita Dei voluntate. Hinc etiam patet, articulos istos Parisienses nihil contra nos facere. Reliqua in altera Apologia.

RESP.

RESPONSIO

Ad Censuram Assertionis secundæ.

HÆc propositio, Deum ex parte sua omnibus dare auxilium sufficiens ad salutem, est fere omnium Patrum, Dionysii de Cœlest. Hier. cap. 9. Irenæi lib. 4. cap. 71. Clement. Alex. in paræm. ad gentes. Orig. lib. 3. Petiarch. c. 1. probat hoc fusè & eleganter, Chrysost. variis locis hom. 7. in Joann. hom. 16. in epist. ad Hebræos & alibi frequenter. Cyril. Alex. lib. 1. in Joann. cap. 11. Theoph. & œcum. in illud prioris ad Timoth. 2. *qui vult, omnes homines salvos fieri.* Damasc. 1. 2. de fide cap. 29. Ambr. in illud prioris ad Timoth. 2. & serm. 8. in Psal. 118. D. Aug. lib. 3. de lib. arb. cap. 18. de nat. & gra. cap. 67. de spir. & litt. cap. 33. de prædest. & gra. c. 14. D. Prosp. lib. 2. de vocat. gent. cap. 4. 9. & 10. & clarissimè, D. D. Scholastici Alex. Alenf. p. 3. q. 67. memb. 5. art. 3. dicens, Deum omni facienti quod in se est, dare sufficientem gratiam, scilicet prævenientem, quæ pertinet ad ordinem
super-

supernaturalem. Albert. in 2. Sent. d. 28. q. 1. ad. 4. Nobis possibile est aliquid facere, quo facto habebimus potestatem ex gratia: hoc autem est facere, quod in nobis est. D. Thom. lib. 3. contra gent. cap. 159. Deus, quantum in se est, paratus est aliis gratiam suam dare; vult enim omnes homines salvos fieri: sed illi soli gratiâ privantur, qui in se ipsis gratiæ impedimentum præstant. Et ibidem Ferrariensis dicens, Deus auxilium, quo intrinsecè & extrinsecè ad bonum dirigimur, omnibus impendit. Scotus in 1. Sent. dist. 46. Deus vult omnibus dare adminicula communia antecedentia ad salutem, quibus homo potest sufficienter bene vivere & salvari. Lib. 1. de nat. & gra. cap. 15. ubi hoc fusè probat, contrarium existimans erroneum. And. Vega lib. 13. in Concil. Trid. cap. 12. & 13. Adrian. Papa in 4. d. 15. Nego, inquit, quòd Deus umquam viatori decrevit non dare gratiam pro tempore vitæ suæ, seu non sufficienter saltem assistere, ut possit converti. Ruard. art. 7. pag. 352. dicit, hanc sententiam esse magis piani. Driedo de capt. & redempt. pag. 129. dicit, pi-um esse credere, omni homini habenti usum liberi arbitrii pro loco & tempore

B

sufficiens

sufficiens excitationis internæ auxilium dispensari, quo valeat justificari. D. Cunn. lib. de gra. Cristi, cap. 13. ubi dicit, hanc sententiam esse probabiliorem. Bart. Medina 1. 2. q. 109. art. 10. Deus nemini hominum denegat auxilium gratiæ necessarium & sufficiens ad salutem; & quilibet homo viator potest ad Deum converti, & salvari, & oppositum asserere, est dogma temerarium & hæreticum. P. Robertus Bellarm. in 1. 2. quæst. 109. art. 10. Lovanii, postea Romæ in quæst. de lib. arb. valde fuisse, ubi respondet ad omnia loca D. Aug. quæ huic sententiæ videntur repugnare, dicitque contrariam sententiam esse omnium hæreticorum hujus temporis. Denique quotquot hac tempestate scribunt contra hæreticos. Probari potest etiam ex plurimis Scripturis, ut ostendi in prælectionibus. Ex quibus patet, hanc propositionem omninò esse tenendam, & in Hispania sine periculo judicij S. Inquisitionis non posse negari: tantum abest, ut accedat ad errorem Massiliensium: ad hanc autem reducuntur fere omnes sequentes. Testimonia autem quæ adfert Censura, vulgatissima sunt, & ab omnibus passim solvuntur, & nos etiam in
lectioni-

lectionibus solvimus. Mirum autem est, DD. Censores hanc propositionem ita interpretari, quasi diceretur, omnes habere auxilium sufficiens in actu 2. quo possint converti, cum nullus unquam Author hoc auxilium intellexerit. Videntur autem ipsi sentire (quod etiam alibi satis manifestè indicant) neminem habere auxilium sufficiens ad conversionem, nisi qui actu convertitur, quod videtur hæreticum. Similiter solos prædestinatos illud habere ex parte Dei, quod etiam hæreticum videtur: dicunt enim eos tantum habere auxilium sufficiens ex parte Dei ad salutem, qui sunt dati Christo à Patre, qui sunt soli prædestinati, ut ipsi interpretantur in Censura Assert. 26.

Quod attinet ad parvulos, non eodem modo censemus eos habere auxilium sufficiens, quo adultos; ut circa propositionem 16. in altera Apologia ostendimus. Quod autem urgent, quâ voluntate Deus velit habere, omnes auxilium sufficiens: Respondeo, voluntate beneplaciti vult, ut omnes illud habeant in actu 1. vel 2. id est, omnibus esse præparatum per Christum, & illud pro tempore & loco actu dispensari, & nemini facienti quod in se est, denegari; quod fusissimè alibi explicuimus.

RESPONSIO.

Ad Censuram Assertionis tertiæ.

HÆc collectio est D. Ruardi a. 7. p. 350. & And. Vegæ Lib 13. in Trid. cap. 3. Bart. Mediæ 1.2. q. 109. art. 10. qui etiam dicit, hanc rationem esse fortissimam. Videat ergo Censura, quos viros condemnet: neque verò quicumquam Catholicorum hoc ita intellexit, sicut Censura accipit, quasi omnes possint implere præcepta, etsi auxilium Dei non implorent: hoc enim falsum esse, cuius Christiano notum est; non enim omnes habent sufficiens auxilium ad quidvis in actu 2. sed in actu 1. præparatum est enim illis, si petant, & datur illis, ut possint petere: sicut dicimus, pauperes huius urbis habere auxilium sufficiens ad vitam sustentandam à Civitate, quia possunt petere, & petentibus non denegatur.

RES-

R E S P O N S I O

Ad Censuram Assertionis quarta.

Certum est, quoscumque Deus vocat, ideo vocare, ut convertantur, si velint, & eos verè posse illud, ad quod vocantur; alioquin delusoriè eos vocaret; nam quod etiam alios fines intendat, neque Calvinus diffitetur, dicens, Deum vocare & increpare etiam reprobos, non quidem eâ intentione, ut convertantur aut possint converti, sed ut sint inexcusabiles, & ut declaretur gratiæ necessitas & excellentia &c. Catholici tamen hinc inferunt, talem vocationem fore delusoriam. Quomodo autem D. Augustinus accipiat *vocare secundum propositum*, dictum est in altera Apologia. Videatur D. Augustinus q. 2. ad simpl. & Ruardus art. 7. pag. 326. 347. & Driedo de capt. & redempt. pag. 133. & de conc. lib. arb. pag. 51. ex quibus manifestum est, *vocare secundum propositum* idem esse, quod vocare, sicut aptum noverat, ut homo sequeretur. Neque hinc sequitur, Deum expectare hominis consensum, ut det gratiam prævenientem, aut non ope-

rari ipsum consensum , aut non convertere ad se rebelles hominum voluntates, ut ostensum est in altera Apologia circa Assert 8. & 9.

R E S P O N S I O

Ad Censuram Affectionis quintæ.

Simili modo argumentatur Andreas Vegalib. 13. in Trid. cap. 7. de poenitentia. Omnes autem obligari ad Baptismum (quod Censura negat) est communis sententia Doctorum in 4. dist. 4. & D. Thom. 3. p. q. 68. art. 1. est enim medium necessarium ad salutem: aliud est enim non obligari ad aliquem actum , aliud excusari à peccato , si illud non facias : ut mediocriter in Theologia versato notum est , quod Deus pro omnibus parvulis , nemine excepto , instituerit Baptismum , ac proinde, quantum in ipso est , etiam illis cupiat dare gratiam Baptismi , salvo tamen rerum ordine & providentiæ communis dispositione, ut alibi dictum est. Censura autem tantum probat, Deum non velle omnibus dare hanc gratiam voluntate consequente seu beneplaciti , non autem id probat

probat de antecedente ; in qua amphibologia sæpe laborat. Videatur Damas. l. 2. de fide orthod. cap. 29.

R E S P O N S I O

Ad Censuram Assertionis sexta.

HUic loco maximè convenire eam expositionem , quâ dicitur , Deum velle omnes homines salvos fieri , quia ex parte sua præparavit omnibus sufficientia auxilia , quibus valeant pervenire ad salutem , ex eo patet , quòd omnes fere Patres & communiter omnes Scholastici ita interpretentur. Videatur D. Thom. lib. 3. contragent. cap. 159. *Deus, inquit, quantum in se est , paratus est omnibus dare suam gratiam ; vult enim omnes homines salvos fieri.* Scotus in 1. dist. 46. Multò meliùs exponitur hic locus de voluntate antecedente , vult omnes homines salvos fieri : quantum scilicet ex parte sui. Dom. Soto lib. 4. de nat. & gra. cap. 18. *etsi, inquit, D. Augustinus hunc locum exposuerit , quòd ex omnibus ordinibus & statibus Deus aliquòs vult salvos fieri , tamen hac auctoritas in universum de singulis hominibus verissima est, si de voluntate antecedente intelligatur.* Ruardus

ardus art. 7. pag. 334. Cunerus de gra. Christi cap. 13. Driedo de capt. & redempt. pag. 94. Quos puto, non fuisse petulanti ingenio, nec portam damnatis hæreticis aperuisse. Nec injuria fit D. Augustino, si aliqua expositio S. Scripturæ ipsi propria dicatur non esse conformis intentioni S. Scripturæ: nam certum est, alios Patres quædam loca S. Scripturæ commodius exposuisse, ut possem multis exemplis ostendere: Reliqua ad rem non pertinent.

R E S P O N S I O

Ad Censuram Asserticnis septimæ.

U Titur hoc argumento Andr. Vega lib. 13. in Trid. cap. 4. Dom. Soto in 4. dist. 15. quæst. 1. art. 1. & alii multi, qui tamen non sequuntur errorem Massiliensium. P. Bellarm. expositio pro nobis facit: V. Bedæ expositio non est contra nos; nam etiam ipsi dicimus. Christum aliter esse Redemptorem electorum. aliter reproborum: negare autem absolutè, illum esse Redemptorem reproborum, puto esse erroneum.

RES-

R E S P O N S I O.

*Ad Censuram Assertionis octava.
& nona.*

Assertio nona malè collecta est, ad-
di enim debet *sufficienter excitato*;
hoc modo: *Gratia concomitans, id est, con-*
cursum specialis & supernaturalis, ita prapa-
rata est sufficienter excitato &c. Hæ propo-
sitiones ita conjunctæ sunt, ut divelli ne-
queant; & tenent eas D. Thomas cum
Cajet. 1. 2. q. 109. art. 9. & 10. ubi
docent non requiri ad singulos actus no-
vum aliquod auxilium præveniens præ-
ter gratiam habitualement & concursum
Dei supernaturalem. Gab. Biel. in 1.
sent. d. 45. & in 2. dist. 39 ubi docet,
ad libertatem requiri, ut omnibus ad pro-
ductionem effectûs requisitis eodem mo-
do se habentibus, habeat voluntas in sua
potestate effectum producere & non pro-
ducere, prout voluerit. Et ibidem docet,
concursum Divinum non prævenire ac-
tum liberum voluntatis. Idem docet
Scotus in 2. dist. 37. Greg. Arimin. 1.
sent. dist. 45. q. 1. conc. 5. Ruard. art.
7. fol. 307. ubi dicit, in eo qui sequitur

C

vocationi

vocationem, & in alio qui negligit, posse esse idem conversionis principium, ita ut ex sola eorum libertate unus negligat conversionem, & alius convertatur. Quod intelligendum est, non quasi ex nuda libertate possit converti, sed ex libertate nixa auxilio ejusdem gratiæ. & ibid. docet, Deum regulariter non flectere voluntatem in hanc vel illam partem, nisi suasionem vel inspirationem, quas etiam liberum est homini semper sequi & negligere; per quas ipse operatur in cordibus velle & perficere, nempe unâ cum auxilio comitante. Driedo de cap. & redempt. p. 101 & 102. valde fusè, & multis aliis locis docet, gratiam efficacem seu gratiam prædestinationis nihil esse aliud, quàm vocationem & instinctum prævenientem, quo Deus ita vocat & excitat, sicut aptum novit ut vocantem non respuat. Cuner. de lib. arb. cap. 9. & 10. secutus suos præceptores Driedonem & Ruardum, positis, inquit, prævenientibus adjuteribus, ipsa divina cooperatio ex Dei benignitate in ipso hominis arbitrio posita est, ut ex Deo operari possit, & ex se cessare. Vbi pro eadem sententia etiam adducit Driedonem & Ruardum, ita ut nullâ tergiversatione negari possit, eos hoc sentire.

re, D. Mart. Rythovius iu 2. sentent. dist. 29. ubi fusè docet, non requiri ad singula opera novam gratiam quæ perveniat ipsum actum & quæ faciat facere. Episcopus Roffensis & Martyr art. 36. contra Lutherum : peccator post peccatum per præsentissimum auxilium Dei, quod nemini deest, ad gratiam se præparare potest : nam ut influentia generalis semper adest voluntati, ita & auxilium divinæ gratiæ cunctis ad manum est præsens : quod maximè verum est de peccatore sufficienter excitato, & per gratiam pervenientem præparato. Andreas Vega lib. 6. in Trid. cap. 7. auxilium speciale quo adjuvamus ad fidem, spem, charitatem, mediatè subest potestati nostræ, quod maximè verum est, quando quis per gratiam prævenientem sufficienter ad conversionem est dispositus. Et cap. 6. concursus divinus, quo adjuvamus ad actus, quibus acquiescimus Divinæ vocationi, videtur gratia adjuvans. Videatur idem Vega lib. 13. in Trident. cap. 13. ubi comparat hunc concursum cum concursu generali, & vocat eum gratiam efficacem : quo modo etiam vocat eum Ruardus p. 307. & D. Cuneus de lib. arb. cap. 9. & 10. Idem pro-

lixê P. Bellarm. docuit hic Lovaniî 1.2. q. 109. & postea Romæ in q. Vtrum homo habeat liberum arbitrium in actibus pietatis. F. Suares in Hispania, & postea Romæ, & multi alii. Et sanè non video, quomodo diversa sententia sit intelligibilis, si loquamur de consensu, vel alio quovis actu libero. Accipiamus enim propositionem contradictoriam utriusque; prioris est hæc, nemo potest converti, nisi qui accipit auxilium præveniens & concomitans in actu 2. quod est dicere, nemo potest converti, nisi qui actu convertitur. Item nemo habet auxilium antecedenter sufficiens ad conversionem, nisi qui actu convertitur: quas propositiones puto esse Calvinî, ut facile possum ostendere. Videatur, lib. 3. Instit. cap. 3. §. 10. ubi etiam ad hoc confirmandum eadem adfert testimonia, quæ DD. Censores. Contradictoria autem alterius est hæc: peccatori sufficienter excitato & adjuto non est præparatum auxilium quo actu convertatur, neque illud auxilium habet in sua potestate: quod est apertè contra Conc. Trid. Sess. 6. c. 5. de quo loco satis multa diximus in altera Apologia. Falsò autem hîc nobis imponitur, singularem Dei cooperationem

nem ad actualem conversionem non esse necessariam, ut patet ex Assert. 9. in 8. enim tantum agitur de auxilio, quod antecedenter necessarium est ad conversionem, ut patet legenti. Mirum autem est DD. Censores tantam congeriem testimoniorum ex D. Augustino adferre & asserere, alia plurima adferri posse, cum nuper hic quidam ex Magistris nostris de hac gratia efficaci, quam Christi vocant, contra nos docens, paucissima invenire potuerit, quæ aliquam speciem præ se ferrent: quæ facillimè à nobis in publicis disputationibus explicata sunt, nam D. Augustinus in hac quæsit. totus est pro nobis: nam ipsi gratia efficax non est aliqua determinatio voluntatis à Deo immissa, præveniens consensum liberum, sed vocatio seu instinctus, quo ita suadet, vocat, & inclinât, sicut aptum novit, ut voluntas non respuat, id est, sicut novit ipsam secuturam. Quod autem dicunt, concursum supernaturalem ad opera bona non esse necessarium; erroneum puto, nisi aliâ interpretatione explicetur, quam ego non video: manifestum enim est, sicut ad opera naturalia necessarius est actualis concursus Dei naturalis tanquam Auctoris naturæ: ita ad omnia opera supernaturalia

necessarius est concursus Dei supernaturalis tanquam Authoris gratiarum. Atqui actus pœnitentiæ vel charitatis, quo quis convertitur ad Deum, supernaturalis est, vel in substantia, ut ego cum alijs multis probabiliter teneo, vel certè secundùm aliquem realem & intrinsecum modum, ut alij existimant, Ergo ad talem actum omnino necessarius est concursus supernaturalis. Quomodo autem Deus propriè & per se, id est, ex intentione operetur in nobis opera, eaq̃ue sint ejus dona, satis dictum est in altera Apologia. Videatur Ruardus art. 7. pag. 307. Cunerus de lib. arb. cap. 9. & 10. Vega lib. 13. in Trid. cap. 13. qui docent, Deum operari in nobis opera bona, quatenus per vocationem & instinctum Divinum prævenientem dat vires & inclinationem ad opus bonum, & per auxilium supernaturale singulari modo concurrat ad illa. Nec verò cum dicimus hominem sufficienter excitatum & Divinitus præparatum posse converti, si velit, intelligimus eum primò debere velle per nudum liberum arbitrium, & deinde converti, sicut passim DD. Censores interpretantur: hæc enim intelligentia inepta est, & repugnans sententiæ Patrum, qui ita loquun-

loquuntur : sed tantum volumus, esse per ipsam gratiam in potestate hominis velle & non velle, id est, converti & non converti: ipsum enim converti nihil aliud est, quàm quoddam velle, V. G. pœnitere & Deo obedire; qui actus quodammodo reflectitur super se ipsum, ut quodam loco docet Augustinus : quicumque enim amat Deum, vult amare, qui pœnitentiâ peccatorum ducitur, vult pœnitere. Cum ergo dicitur, aliquem posse pœnitere, posse amare Deum, si velit; nihil aliud significatur, quàm ipsum actum supernaturalem pœnitendi esse in ipsius voluntatis divinitus motæ & præparatæ potestate, ita ut voluntas ex vi sua & gratiæ possit se determinare ad pœnitendum vel non pœnitendum, amandum Deum vel non amandum: simili ferè modo, quo in aliis actibus liberis: quod etiam probatur ex omnibus illis Scripturis & Patrum testimoniis, quibus significatur, etiam illis peccatoribus dari auxilium sufficiens ex parte Dei, qui non convertuntur: si enim datur illis aliquando in actu secundo auxilium sufficienter præveniens, ergo præparatum est illis auxilium concomitans, ita ut quodammodo sit in illorum potestate: nam auxilium
sufficiens

sufficiens est illud, quo quis verè potest: nemo autem per auxilium sufficiens verè potest converti, nisi præparatum sit illi auxilium concomitans, sicut nemo verè potest oculis suis videre, nisi præparatum sit illi auxilium generale. Imò si illud auxilium non esset illi præparatum, nec esset quodammodo in ejus potestate, nunquam diceretur habere sufficiens auxilium ad videndum. Eodem modo, nisi peccatori Divinis instinctibus & motionibus ad conversionem sufficienter disposito præparatum sit auxilium gratiæ concomitantis, ita ut illud quodammodo sit in ejus potestate, nunquam diceretur habere auxilium sufficiens: quod est contra omnes Patres, & etiam contra omnes Scripturas: Isaïæ 5. *Quid ultra debui facere vinea mea, & non feci?* Matth. 23. *Quoties volui congregare filios tuos, & noluisti!* Hic tunc dubio significat Deus, se ex parte sua dedisse auxilium verè sufficiens ad conversionem & bona opera: nec ullo modo tolerabilis est ea expositio, quæ dicit, Dominum loqui de auxiliis externis, ut quidam exponunt; quia Dominus queritur graviter de peccatoribus, quod non sint conversi, cum ipse omnia fecerit, quæ ex parte sua

sua erant necessaria, ergo habuerunt talem gratiam, per quam verè & propriè & etiam facile poterant converti, quæ non est tantum externa, sed maximè interna: ergo illis præparatum erat auxilium concomitans in actu primo; ita ut illud esset quodammodo in eorum potestate: nam sine eo impossibile erat etiam per gratiam internam converti. Nec Dominus ullo modo potuisset de ijs conqueri Apoc. 3. *Ego sto ad ostium & pulso; si quis mihi aperuerit, intrabo ad eum.* Vel est in potestate ejus, ad cuius ostium pulsat Dominus, aperire, vel non est: si est in potestate, ergo præparatum est ei auxilium concomitans necessarium ad aperiendum, id est, ad consentiendum vocationi; & ita habemus intentum. Si non est in potestate, cur pulsat Deus, si alter non potest aperire? Item, *si quis mihi aperuerit*; hoc enim nemo diceret, nisi putaret esse in alterius potestate aperire: nemo enim, nisi irridendo dixerit: si tu volaveris, ego te faciam divitem. Neque valet quorundam expositio, qui, ut hunc locum eludant, dicunt sensum esse, ego pulso ad ostium; & ubi voluero, ostium aperiam, & sic intrabo: hæc enim expositio est Calvinii, qui hoc modo solet eludere hujusmodi lo-

D

ca

ca S. Scripturæ. Videatur lib. 2. Instit.
c. 5. Similia loca habemus Prov. i. *Vocavi
& remisisti. Act. 7. vos semper Spiritui S. re-*
sistitis: ubi sensus non est, vos externæ
tantum prædicationi resistitis, ut quidam
exponunt, & Calvino placet, sed loqui-
tur de instinctibus Divinis, quibus potu-
issent converti; externâ autem prædica-
tione solâ nunquam potuissent converti.
Probatur ratione: quia de ratione actus
liberi est, ut procedat à voluntate in om-
ni instanti & temporis & naturæ indeter-
minata ad ipsum, habente in sua potestate
omnia necessaria ad eum eliciendum &
non aliciendum, ut docent omnes com-
muniter Doctores. Videantur Authores
citati, & D. Cunerus de lib. arb. cap. 2.
8. 9. 10. si ergo opera bona, & super-
naturalia, ut sunt conversio, oratio, a-
ctus charitatis &c. sint opera libera, ne-
cesse est, ut procedant à voluntate inde-
terminata ad ipsa, quæ habeat in potestate
sua omnia necessaria ad illos actus faci-
endos & omittendos, ita ut omnibus præ-
venientibus eodem modo se habentibus
possit actum elicere vel non elicere, pro-
ut voluerit: ergo voluntas sufficienter
præparata habet in sua potestate omne au-
xilium necessarium ad illum actum. Unde
patet,

patet, non requiri ad omne opus bonum, præter omnem sufficientem præparationem voluntatis sive per Divinos instinctus, sive per virtutes & habitus supernaturales, aliam quandam motionem prævenientem, quæ efficacitate sua voluntatem determinet ad bonum opus, quam habere non sit in voluntatis Divinitus præparatæ potestate, quâ positâ impossibile sit, bonum opus non sequi: nam hæc videntur esse contra rationem actus liberi.

Sequi etiam videtur ex hac sententia, Deum deserere hominem justum, antequam deseratur; quod est contra Concil. Trid. sess. 6. cap. 11. & contra Scripturas S. & omnes Patres. Probatur: nam si requiritur ad omne opus bonum gratia præveniens, quæ efficacitate sua voluntatem determinet, quam habere non sit in hominis potestate; ponamus hominem justum gravi tentatione tentari, & cadere; sine dubio hic non habuit hanc præmotionem prævenientem efficacem; quia non fuisset lapsus; nec in potestate ipsius erat illam habere, quia nec petere eam poterat, ut oportet sine simili gratia, ut ipsi faterentur: unde sequitur, illum fuisse desertum à Deo, antequam ipsum desereret. Nec ullo modo probabilis est eorum

expositio, qui dicunt, Deum non deſerere juſtum antequam deſeratur, quia non ſubtrahit illi gratiam juſtificationis, antequam peccet, hæc enim expositio aperte eſt contra intentiõnem Concilii, ut patet ex c. 11. loquitur enim de auxilio neceſſario & ſufficienti ad bene operandum & perſeverandum; nemo autem per ſolas vires gratiæ habitualis poteſt diu bene operari aut perſeverare. Deinde ſequitur, illum neceſſariò peccare; quia, impoſſibile erat ſine gratia illa efficaci tentationi tantæ reſiſtere, ut ipſi fatentur: dicere autem, ut quidam dicunt, illum quidem neceſſariò peccare, ſed hanc derelictionem eſſe poenam peccati originis, & ideo ipſum non excuſari, non video quomodo non ſit Calvinianum.

Sequitur ulterius, in hominis poteſtate non eſſe, plura bona facere quàm facit; nam ſine hac gratia non poteſt aliquod bonum opus meritorium vitæ æternæ facere, & hanc habere non eſt in ejus poteſtate, quia Deus præparavit illam ſolis prædeſtinatis, & diſpoſuit ante omnem præviſionem eorum, quæ homo facturus eſt talibus & talibus momentis & locis, illam ad talia & talia communicare, & non aliàs: & hæc poſitâ homo facit omne illud,

illud, ad quod ipsa datur. Quomodo ergo est in potestate hominis, vel plura vel maiora bona facere, quàm quæ facit?

Denique sequitur, omnes exhortationes, increpationes, præcepta, Divinos instinctus, & vocationes internas & externas reprobis dari non ut convertantur, sed ob alias causas, ut vult Calvinus, quia his omnibus positis, non est in illorum potestate converti, quia in illorum potestate non est habere illam motionem efficacem, quæ præter hæc omnia necessaria est ad conversionem; hæc enim solis prædestinatis præparata est, ut ipsi fatentur: Nec valet, quod quidam respondent, reprobos posse illam petere & habere, quia Deus potest illam dare: nam Deus constituit illam non dare, idque ante prævisionem operum. Impossibile est ergo, eos eam acquirere, licet habeant potestatem passivam eam acquirendi, sicut damnatis impossibile est habere gratiam, quia Deus decrevit eam absolutè non dare. Sanè non video, quomodo hæc sententia distinguatur ab errore Calvini lib. 2. Instit. cap. 3. §. 10. ubi ait: *Voluntatem Deus movet, non qualiter multis sæculis traditum est, ut nostra postea sit electionis motioni obtemperare aut refragari; sed illam efficaciter efficiendo.*

efficiendo. Qui dicitur à Conc. Trid. Sess. 6. cap. 5. Quid autem aliud dicunt, qui dicunt per gratiam prævenientem non constitui umquam hominem in eo statu, ut in ipsius potestate sit consentire & dissentire; sed ad consensum requiri aliam quandam motionem prævenientem, quam habere non est in hominis potestate, quæ efficaciter operetur ipsum consensum, ita ut impossibile sit voluntatem illâ motione positâ non consentire. Quod autem Censura dicit, hinc secuturum, ut etiam hominibus in malitia persistentibus de operibus bona, quia dat illis auxilium præveniens, & paratus est dare auxilium gratiæ concomitantis: admittimus, Deum dare quibusdam in malitia persistentibus opera bona in actu primo & quantum in ipso est; quia dat illis omnia necessaria ad opus bonum, ita ut sit in illorum potestate mediata bene vel malè operari, non tamen dat in actu secundo, quia ipsi nolunt.

R E S P O N S I O

Ad Censuram Assertionis decimæ.

Quomodo D. Augustinus sit intelligendus, satis diximus in altera Apologia.

pologia. Coligitur hæc explicatio ex And. Vega l. 6. in Conc. Trid. cap. 7. & lib. 13. cap. 12. & 13. & Cuner. de lib. arb. cap. 10. & Ruard. art. 7. p. 507. Qui dicunt, auxilium speciale, quod præter gratiam excitantem seu vocationem necessarium est ad conversionem, esse auxilium concomitans, seu concursum & cooperationem supernaturalem, quam sufficienter præparatus habet quodammodo in sua potestate: hæc enim cooperatio est vera gratia, quia supra conditionem humanæ naturæ, ei que indebita, per quam natura liberi arbitrij ita juvatur, ut efficiat opera supernaturalia & Divina, quæ cum solo concursu generali non potuissent efficere: ita ut totum opus sit à natura liberi arbitrij, & totum sit à gratia præveniente & concomitante, & liberum arbitrium nihil possit in opus supernaturale, nisi Divinitus præparatum & adjutum. Quomodo autem Deus ita se menti intimè jungat, & veluti habitus se uniat, ut ipsa ex eo potestatem habeat se ad bona opera determinandi vel non determinandi, alibi à nobis explicatum est. Videatur D. Cunerus, qui hoc subtiliter explicat, cap. 9. 10. & 11. de gratia Christi, & cap. 8. 9. & 10. de lib. arb.

De locis Augustini. quæ Censura citat, alibi dictum est. Quod autem Censura de concursu generali, quo Deus ad omnem actionem concurrat, adfert, pro nobis facit: sicut enim hic generalis concursus quodammodo est in hominis potestate, ita ut possit eum habere, si velit; ita etiam in potestate ejus, qui sufficienter excitatus & præparatus est ad aliquem actum supernaturalem, est habere omnem cooperationem Divinam necessariam ad illum actum, quod tamen Censura negat. Neque refert, siue dicatur concursus generalis voluntatem determinare, siue non determinare, modò dicatur esse in hominis potestate. Certum tamen est, illum concursum propriè loquendo non determinare voluntatem ad actus liberos; quasi eam prævenièdo: omnes enim Theologi tenent, concursum Dei in nullo instanti temporis vel naturæ attingere liberum arbitrium, quo non etiam liberum arbitrium eundem actum attingat, ut docet Scotus in 2: dist. 37. & Gab. eadem. G. Arimin. in 1. dist. 45. q. 1. c. 5. Caj. in 1. part. q. 14. art. 13. Andreas à Castro in 1. sent. & elegantissimè D. Cuner. de lib. arb. cap. 9. & 10. Unde quando D. Thomas & alii Doctores docent, De-

um

um voluntatem applicare ad suum actum, intelligendi sunt de applicatione non præveniente, sed comitante ipsam operationem voluntatis; quia nimirum voluntas per auxilium Dei generale assistens in actu primo habet in sua potestate se determinare ad actum. Quod autem in fine significari videtur, Adamo non minus defuisse crebras excitationes internas & externas, & singularem protectionem, quàm homini lapsò, videtur esse contra D. Augustinum de corrept. & gra. cap. 11. & D. Thom. 1. 2. quæst. 109. art. 9. & 10. Illud autem valde mirum est, quod Censura hìc apertè indicat, positis omnibus Divinis excitationibus internis & externis, & singulari ejus protectione, ulterius requiri quandam gratiam ita efficacem, ut ipsum velle in nostro prorsus non relinquatur arbitrio: nam hoc apertè videtur dogma Calvinianum Lib. 2. Instit. cap. 3. §. 10. Similiter & illud, requiri ad conversionem talem gratiam prævenientem, quâ positâ homo non possit nolle.

RESPONSIO

Ad Censuram Assertionis undecimæ.

ITa hunc locum explicat Ruardus art. 7. pag. 334. dicens, etiam Tyriis & Sidoniis non defuisse auxilium sufficiens, sed abundans, quo fuissent moti ad poenitentiam: unde non est verum, Augustinum loqui de auxiliis externis; nam loquitur de auxilio, quod est gratia prædestinationis, ut patet inspicienti: deinde quia per solum auxilium externum nunquam erant credituri: imo nec poterant credere; cum tamen Augustinus ibi loquatur de auxilio, quo habito fuissent moti ad fidem. Loquitur ergo de auxiliis externis, quæ secundum communem Dei providentiam & ordinationem quædam auxilia interna adferunt secum, ut sunt prædicatio & miracula: quibus autem desunt externa auxilia prædicationis fidei, vel miraculorum, iis non deesse alia tum interna tum externa, quibus sensim valeant pervenire ad fidem, est communis sententia Doctorum, ut supra ostensum est circa Assertionem 2.

RES-

R E S P O N S I O.

Ad Censuram Assertionis duodecime.

ITa exponunt hunc locum Ruardus a. 7, pag. 333. ita scribens: *Credunt*, inquit Aug. illi, *quia in illis præparatur voluntas à Domino*; isti non credunt, *quia in istis non præparatur voluntas à Domino.* & Driedo de capt. & redempt. pag. 133. iis-
dem pene verbis, ad argumentum ex doctrina Augustini dicentis, inter eos, qui audiunt evangelium prædicari, alii credunt, *quia in eis præparatur voluntas à Domino*, alii non credunt, *quia in ipsis voluntas à Domino non præparatur.* Hoc satis sit ad longam Magistrorum Nostrorum Censuram.

R E S P O N S I O

Ad Censuram Assertionis decimatertia.

ACcipiamus contradictoriam ejus partis quæ hic maximè oppugnatur, quod est, *Iusti non perseveraturi non habent aliquod donum ex Deo, quo possint perseverare in gratia, si velint*: quod est manifestè

hæreticum: nam definit Conc. Trid. omnem justum posse perseverare cum auxilio speciali, si velit. Sess. 6. cap. 13. & cap. 22. Falsum autem est, nos ipsam posse perseverare Dei dono adscribere, & non ipsam actualem perseverantiam: non enim si Deus non ita facit hominem perseverare, ut non possit non perseverare, continuò sequitur, Deum non dare ipsum perseverare, sicuti Censores intelligunt; omnes enim Catholici fateri debent, Deum ita homini dare perseverare, ut homo verè & propriè possit non perseverare: in iis autem qui perseverant, etiam ipsum perseverare est donum Dei, in iis autem, qui non perseverant, ipsum posse perseverare tantum est donum Dei. Videatur Ruard. art. 7. pag. 308. qui ad reliqua sufficere potest.

Quod ad sententiam Catharini attinet, ea mihi in multis non probatur, ut patet ex altera Apologia. Fuisse autem confirmatos in gratia, qui habuerunt longè majus donum perseverantiæ quàm alii, si loquamur de dono, quod antecederet necessarium est, ad actu perseverandum, de quo hic sermo est, est communis sententia Doctorum. Videatur D. Cyrillus lib. 9. in Joannem cap. 29. ubi dicit, Apos-

stolos

stolos post acceptum Spiritum S. cadere non potuisse. D. Thom. 3. p. & ibid. Cajet. & de veritate q. 24. a. 9. & in 3. sent. dist. 12. q. 2. art. 1. & Durand. in 3. dist. 4. q. 4. Bon. in 3. d. 3. a. 2. q. 3. Unde temerarium videtur, hoc damnare.

R E S P O N S I O

*Ad Censuram Assertionis decimæ
quartæ.*

HAnc propositionem docent omnes citati circa secundam assertionem, & D. Soto acriter hoc defendit lib. 1. de nat. & gra. cap. 18. qui id probat ex Orig. Hier. Aug. & Adriano in 4. d. de pænitentia dicens, hanc esse differentiam viatorum ab iis, qui transierunt terminum, quod viatoribus sufficienter assistat, etiam gratiam offerat, quâ pro extremo saltem virium laborando possent peccati indulgentiam promereri. Et ibidem docet, Deum indurare hominem, nihil esse aliud, quàm subtrahere gratiam abundantiorē, sine qua non pænitebit: quod etiam docet D. Cunerus de obduratione pag. 242. & Ruardus art. 7. pag. 131. & pag. 348. & iisdem ferè verbis Driedo

de capt. & redempt. pag. 113. & 131.
 Andreas Vega lib. 13. in Trid. cap. 12.
 & 13. qui authores non sunt rejiciendi.
 Reliqua vel levia sunt, vel nihil ad rem
 pertinent.

R E S P O N S I O

*Ad Censuram Assertionis decima
 quinta.*

NON quæritur hîc, an quis possit con-
 verti per vires naturæ, vel an Deus
 possit omnes convertere; sed an auxilium
 Divinum omnibus sit præparatum, ita
 ut pro tempore & loco sit in illorum po-
 testate sensim pervenire ad conversionem.
 Nos putamus esse quodammodo in om-
 nium adultorum potestate, converti per
 auxilium Dei; cujus contrarium Bart.
 Medina 1. 2. q. 19. art. 10. dicit esse
 temerarium & hæreticum; D. Soto cap.
 18. lib. 1. de nat. & gra. & in 4. dist.
 15. q. 1. art. 1. erroneum. Idem docent
 Vega lib. 13. in Trident. cap. 9. 10. 12.
 & 13. Quæ hîc adferuntur, nihil ad rem
 pertinent.

RESPONSIO

*Ad Censuram Assertionis decimæ
sexta.*

DE parvulis nihil novi dicitur: videatur in altera Apologia, quomodo hoc intelligendum sit: tantum enim volumus in parvulis verum esse illud Apostoli, *Qui vult omnes homines salvos fieri*: ita ut etiam ista voluntas antecedens in illis locum habeat: nec parvuli consequenter à Deo efficaciter & absolutâ voluntate destinati ad pœnâs ante prævisionem mortis: sicut si Rex constitueret magnum aliquem thesaurum, quo alerentur omnes pauperes Provinciæ nemine excepto; hic tamen dispensandus esset per varios Ministros, quos ipse sciret interdum officio defuturos: rectè dicetur ille Rex velle omnes pauperes sustentare, & omnes illi rectè dicentur ex parte Regis habere auxilium sufficiens ad vitam tollerandam, quamquam non esset in illorum potestate vel ob Ministrorum perversitatem, vel alia de causa ex illo thesauro accipere. Ita Deus, dum constituit Baptismum pro omnibus parvulis nemine excepto, & jussit omnibus

omnibus applicari ; etiam si sciat non omnibus applicandum , nec posse applicari ob aliquas causas externas, modo ipse causas illas non ordinèt ad hunc finem ; rectè dicitur parvulis præparasse auxilium sufficiens, & ipsi rectè dicuntur ex parte Dei illud habere.

R E S P O N S I O

*Ad Censuram Assertionis decimæ
septimæ.*

DUrum valde est, & ut puto falsum, Deum voluntate beneplaciti antecedente omnem prævisionem determinationis causarum secundarum velle, ut parvuli, qui moriuntur sine Baptismo, non baptizentur; neque hoc umquam D. Augustinus dixit. Quod si Deo non est imputandum, quando parvuli moriuntur ante Baptismum procurante id malitiâ humanâ, ut hâc Censurâ fateti videntur (in quo a Lovaniensi differt) cur id ei imputabitur, quando id accidit ex aliqua causa naturali ? Et si non censetur talis mors casu fieri quando culpâ humanâ infertur, Deo tantum justo iudicio sic permittente, cur cencebitur casu fieri, si dicamus

camus Deum tantum permittere & non procurare, ut à causa naturali talis mors inferatur? Falsum autem est, me sentire Divinam Providentiam rēn immediatē extendi ad omnia & singula, quæ in rerum natura existunt & sunt, ut satis in altera Apologia dictum est: aliud est enim efficax ordinatio seu volitio alicuius rei facta ante omnem prævisionem determinationis causarum secundarum, aliud Providentia. Unde reliqua nihil ad rem pertinent. Illa autem ratiocinatio Censuræ, *Deus omnia operatur, ergo omnia præordinat*, aut nihil concludit, aut contra Censores concludit: nam si rectē concludit, sequitur etiam, Deum præordinasse efficaciter & in particulari ante omnem prævisionem determinationis causarum secundarum ipsos actus materiales peccatorum, nam hos etiam cum creatura immediatē operatur; nisi forte hoc negent: sed hoc negare est erroneum: certum enim est, Deum immediatē omnem entitatem positivam operari, ut alibi probatum est. Quod si ipsos actus peccatorum, & quidquid est in ipsis entitatis positivæ, Deus immediatē cum creatura operatur, & tamen non præordinat efficaci voluntate ante omnem prævisionem,

cur non idem dici poterit de actibus peccatorum externis, de primis motibus concupiscentiæ, de habitibus vitiorum, de actibus ludicris & similibus? Videatur Eusebius lib. 6. præparationis Evangelicæ cap. 9. & alii Patres citati in altera Apologia, qui quando urgebantur ab ethnicis asserentibus, omnia fieri fato & inevitabili necessitate, si Deus omnia præsciat; uno ore respondebant; non ideo res contingentes seu liberas fieri, quia Deus eas præscit, sed potius Deum præscire, quia sunt futuræ; ita ut ipsæ sint quodammodo causa Divinæ præscientiæ, non quidem quoad actum illum Divinæ mentis, sed quoad determinationem ejus ad hoc objectum, ut alibi à nobis explicatum est: quæ responsio nihil valeret, si Deus omnia ab æterno ante omnem prævisionem absolutâ voluntate efficaciter præordinasset.

R E S P O N S I O

Ad Censuram Assertionis decimoctavæ

HÆc Assertio satis patet ex dictis circa Assertionem secundam. Quod ad illam rationem attinet; si enim facerent
quod

quod in ipsis est &c. valde displicet Calvino lib. 2. Inst. c. 3. §. 10. vocans illud Occamitam opinionem: sed docet hoc D. Thomas lib. 3. contra gent. cap. 159. dicens, Deum quantum in se est paratum esse omnibus dare gratiam, & in potestate liberi arbitrii esse impedire Divinæ gratiæ receptionem vel non impedire; etsi non impediat, Deum gratia sua affulsurum. Et de verit. q. 14. art. 11. si aliquis enutritus in sylvis ductum rationis naturalis sequeretur in appetitu boni & fuga mali; certissime tenendum est, quod illi Deus per internam inspirationem revelaret ea, quæ sunt credenda. Quod intelligendum est, non quod statim Deus illi infunderet fidem, sed quia daret auxilia majora, quibus sensim ad fidem posset pervenire. Idem docet Alex. A-
 lensis in 3. q. 69. memb. 5. a. 3. & Alb. in 2. dist. 28. q. 1. ad 4. D. Soto in 4. dist. 1. q. 2. a. 3. servanti ritè jus naturæ Deus singulari auxilio affulsisset. And. Vega lib. 13. in Trid. cap. 12. dicens: vel, inquit, hoc argumento possemus convincere, quemlibet viatorem posse secundum legem communem converti: Nullus est ex viatoribus, qui non possit bene uti naturalibus, ei autem qui hoc fecerit, Deus, qui ne-
 cessariè deest facienti quod in se est, auxilium

sine dubio prestabit sufficiens ad obtinendum bona supernaturalia. Idem docet Gerson in regulis moralibus alphabeto 24. reg. III. Ruard. art. 7. pag. 348. hoc dicit posse concedi. Et Driedo de concordia lib. arb. pag. 51. dicit similiter, idem posse concedi, nec affine esse alicui errori: non tamen opera moraliter bona sunt dispositio aut remota aut propinqua ad gratiam, ut alibi dictum est.

R E S P O N S I O

Ad Censuram Asserticnis decima

nona

Hæ assertio malè collecta est: scribitur enim hic *auxilium morale sufficiens pro auxilio moraliter sufficiente*, & *alioquin pro contrarium*, quod est auxilium morale sufficiens. Nihil autem novi hæc adfertur, & in alienum sensum omnia detorquentur. Habetur hoc argumentum apud Ruardum art. 7. pag. 350. & Vega lib. 13. in Trid. cap. 3. & Soto in 4. d. 15 q. 1. a. 1. & alios multos.

RES.

RESPONSIO

Ad Censuram Assertionis vigesima.

HÆc propositio non est improbabilis, sed multò quàm contraria probabilior, & ordini Divinæ Justitiæ, & merito hominis consentanea. Contraria placuit Calvino Lib. 3. Inst. cap. 22. §. 9. ubi sic ait: *Thomas contendit, gloriam electis quodammodo prædestinari ex meritis, quia gratiam illis Deus prædestinat, quâ gloriam mereantur: quid si contra excipias, prædestinationem ad gratiam electioni ad vitam subservire, esseq; velut ejus pedissequam: gratiam iis prædestinari, quibus gloria possessio jam diu assignata sit &c.* Unde multa alia colligit: nempe solis electis dari gratiam: electos non posse peccare vel perire: vitam æternam non dari ex meritis &c. & sanè valde durum videtur, Deum in primo signo rationis ab æterno ante omnem omnino scientiam, & nullâ habitâ ratione eorum quæ homo per gratiam suam esset factururus, absolutè voluisse ut homo iste & ille perducerentur ad gloriam & quidem tantam gloriam; nec ullam ab ipsis requisivisse conditionem, quam implere

vel non implere sit in eorum potestate (hoc enim prædestinatio efficax & absoluta significat) sed ad hanc voluntatem suam explendam velut in secundo signo rationis statuisset efficaciter facere ut eam gloriam mereantur, quidquid demum ipsi essent facturi. Patres autem aliter sentire, alibi demonstratum est. Videatur altera Apologia. Neque verò quidquam nobis hic commune est cum Massiliensibus: Illi enim volebant eligi ad gratiam & gloriam, qui libero arbitrio nudo & non divinitus præparato gratiam Dei quærent vel acceptarent, ut patet ex Epistolis Prosperi & Hilarii; nam dicere eos eligi ad gloriam, qui per gratiam Dei bene vivunt; nullus est error. Docet hoc F. Turrianus lib. de electione Divina & alii plurimi. Neque hic aliquid negamus, quod Ecclesia universa confitetur, ut parum modestè Censura criminatur: non enim Ecclesia tota asserit, non licere in hac quæstione à D. Aug. recedere, si ipse contrarium sentit; sicut etiam non cogit me sequi D. Augustinum in quæst. de auxilio sufficienti, si ipse putat non omnibus tale auxilium dari: ut nec in quæst. utrum prædestinatio sit facta ante prævisum peccatum originale, an post; nec in aliis

altis similibus. Et sane valde mirum est,
hanc sententiam nunc tam graviter re-
prehendi, cum apertè illam docuerit D.
Eftius in 1. dist. 41. §. 6.

RESPONSIO

*Ad Censuram Assertionis vigesimæ
primæ.*

DE assertionem 21. satis dictum est in
altera Apolog. Quod autem hic de
perseverantia ex D. Augustino dicitur,
eam semel acceptam amitti non posse, ni-
hil ad rem facit, nam perseverantia non
dicitur accepta nisi in termino, ut docet
Driedo de concordia liberi arbitrii pag.
38. Unde nullo modo amitti potest. Er-
ror autem est dicere, similiter coronam ab
aliquo viatore amitti non posse.

RESPONSIO

*Ad Censuram Assertionis vigesimæ
secundæ.*

Divi Augustini sententia mihi valde
placet, sed Censura in alium sen-
sum rapit hanc ratiocinationem, quæ à
me

me allata est. Hoc modo facile est censuras texere, & multorum errorum alios insimulare. Videatur Apologiae alterius responsio.

R E S P O N S I O.

*Ad Censuram Assertionis vigesima
tertia.*

Hic nihil novi adfertur : solum vellem, ut DD. Censores explicarent, si Deus ante omnem provisionem absolutâ, & efficaci voluntate voluit & præordinavit, nullam à me requirens conditionem, ut ego tali momento faciam tale opus bonum, cum talibus circumstantiis &c. quomodo ego possim illud opus non facere? Et quomodo hæc sententia distinguatur ab errore Calvini, qui ex hoc fundamento tollit contingentia. Nam quod dicitur, me in sensu diviso posse illud non facere, nihil aliud est dicere, quam me posse non facere, si Deus non decrevit ut faciam : quod etiam Calvinus admittit. Adducit etiam pro se locum Apostoli, quem Censura adfert, cui nullo negotio respondetur, nos creati in operibus bonis, id est, ad opera bona, quia

dum iustificamur in ordine gratiæ, velut ex nihilo producimur, idest, ex nullis meritis, ut ambulemus in operibus bonis. Ita Chrysost. Theoph. & alii, qui hoc tempore scribunt contra hæreticos. Hinc autem nullâ probabilitate sequitur, Deum omnia opera bona in particulari absolutâ & efficaci voluntate præordinasse, nullâ requisitâ conditione ab homine. Testimonia, quæ hic adferuntur, nihil ad rem pertinent.

R E S P O N S I O

*Ad Censuram Assertionis vigesimæ
quarta.*

Hanc propositionem docet expressè Damas. lib. 2. de fide cap. 29. ubi dicit: quod Iusti incidant in calamitates, non esse ex Divino beneplacito, sed tantum ex permissione. Quam autem sit durum & à ratione abhorrens, dicere Deum absolutè voluisse & præordinasse omnia Sanctorum supplicia, antequam prævideret futuros Tyrannos & impios, qui hæc supplicia vellent inferre, quod Censura hæc docet, facile quivis perspicere potest: si enim præordinavit efficaciter v. g. ut S.

G

Laurentius

Laurentius in craticula propter fidem
affaretur, antequam prævideret fore ali-
quem Tyrannum, qui hoc supplicium in
odium Christianæ Religionis vellet inferre;
ergo etiam debuit efficaciter præordinare,
ut hic Tyrannus odisset Christum, & ex
hoc odio S. Laurentium in craticula affa-
ret: nam quicumque vult efficaciter ali-
quem finem, necessariò simul vult omnia
necessaria ad eum finem, nisi ea videat
posita vel ponenda. Imò ad Providentiam
Dei pertinere, corda Tyrannorum in ta-
lium suppliciorum inflictione formare &
temperare, sicut quidam MM. Nostri do-
cent: quæ an Calviniana non sint, Docti
judicent. Quæ Censura objicit, non e-
gent responsione: non enim sequitur:
Deus omnis entitatis positivæ author est,
ergo omnem entitatem positivam ante
omnem prævisionem determinationis cau-
sarum secundarum præordinat; nisi DD.
Censores velint dicere, quod Deus etiam
efficaciter præordinaverit, ut Judas tra-
deret Christum, quia hæc traditio fuit en-
titas positiva, & ad eam Deus ut causa
prima concurrat. Non video, quid aliud
velint Calvinus & alii hæretici, quos
damnat Trid. sess. 6. can. 6. simile est il-
lud, ex sola Dei ordinatione parvulos
fuisse

fuisse ab Herode occisos , nam quod ex sola Dei ordinatione vitam æternam jam pro Christo occisi sint consecuti, libenter admittimus , sed ad rem non pertinet.

R E S P O N S I O

*Ad Censuram Assertionis vigesimæ
quintæ.*

Non respicit Censura , quorsum hæc dicta sint : unde fuit facile ea carpere. Videatur altera Apologia , nam nihil novi hîc adfertur , non enim negamus, quin prædestinati infallibiliter salventur, & qui moventur à Deo secundum Divinum propositum , ut D. Augustinus loquitur , infallibiliter sequantur : sed hæc infallibilitas pendet ex præscientia conditionata non autem ex mera efficacitate illius motionis prævenientis, quasi in quocumque poneretur illa eadem motio præveniens vel alia illi omnino similis , in eo statim sequeretur opus bonum, ita ut non sit in potestate hominis illud impedire etiam in sensu composito : sicut posito concursu Divino infallibiliter homo operatur, ita ut simul ille concursus esse non possit cum non operari. Talem enim gra-

tiam prævenientem dicimus hic non promitti, neque hanc esse gratiam Christi, quam Scripturæ promittunt, sed potius Calvini. Videatur D. Augustinus de gra. & lib. arbit. cap. 16. ubi istud, *faciam ut faciatis*, sic exponit: auferens cor lapideum unde non faciebatis. dabo cor carneum; unde faciatis: nec requirit motionem prævenientem singula opera, quæ voluntatem efficaciter afficiendo determinet. Imò ubique Divus Augustinus docet, Deum facere, ut faciamus, quia dat vires voluntati, & quia præparatur voluntas à Domino, ut patet ex illo cap. 16. & de prædest. Sanct. cap. 5. & 6. & aliis innumeris. Et idem habetur in epistola Cælest. Papæ ad Episcopos Galliarum 5.8.

R E S P O N S I O

*Ad Censuram Assertionis vigesima
sexta.*

NON provenire ex ignorantia phrasæ S. Scripturæ hanc interpretationem, facile est ostendere ex Patribus qui per eos, quos Pater dat Filio, intelligunt communiter omnes fideles. Chrysost. Homil.

mil. 44. in Joan. Cum dicit, omne quod dat mihi Pater, demonstrat non esse rem vulgarem credere in Christo, nec humano consilio perfici, sed superna revelatione indigere, quam anima devota suscipiat. & Homil. 80. in Joan. Dicit autem, nemo ex iis perit, id est, quantum est ex parte mea, non perdam: quod manifestius alibi dicit; non ejiciam foras: si verò per se ipsos exeant non ex necessitate ad me traho. Cyril. lib. 4. in Joan. cap. 11. filio ergo, qui vivificare potest, quacumque vita indigent, Pater tradit; traditio autem hac est, ut Filium cognoscant, & credant esse verum Deum. Et lib. 11. cap. 21. conservasse ita discipulos ait, ut nullus eorum prater perditionis filium perierit: perditionis autem filium appellavit, qui à pravitate periit sua, & ex proprio judicio prodicionem elegit; non enim Divino inexpugnabiliq; judicio in diaboli laqueum incidisse credendum est &c. Et infra: Quod si proditor aequaliter aliis Discipulis Salvatoris auxilium non habuisset, frustra hac à nobis dicerentur. Videantur sequentia. Theoph. in cap. 6. Igitur ego, inquit, non perdam, quos dat mihi Pater, hoc est, eos qui credunt mihi. Venerabilis Beda in hunc locum: Hi fideles sunt, quos Pater dat filio, quando per internam inspirationem facit eos credere in Filium.

Ex his patet omnes fideles dici datos Filio à Patre ; quomodo etiam cæteri ferè omnes exponunt , & satis patet ex ipso textu S. Scripturæ. Nec abhorret ab hac expositione D. Augustinus tract. 25. in Joan. ubi dicit, qui venit ad me, id est, qui credit in me : nemo autem venit ad Christum , nisi datus à Patre ut patet ex eodem loco S. Scripturæ. Hinc patet hanc expositionem non esse futilem, cum sit omnium fere Patrum , neque hic quicquam dicatur , quod D. Augustini dogmati repugnet.

RESPONSIO

Ad Censuram Assertlonis vigesima septima.

DE hujus loci sententia videatur altera Apologia in qua ostendimus hanc expositionem esse ferè omnium Patrum, quorum verba adferrem, nisi res esset per se clara , & prolixitatem vitarem. Nihil autem hic novi adfert Censura.

R E S P O N S I O

*Ad Censuram Assertionis vigesima
octava.*

P Robandum esset DD. Censoribus, eo loco Apostolum velle ostendere, Deum non ex prævisione bonorum operum vel malorum alios destinasse efficaciter & absolutè ad gloriam, alios ad pœnas, hoc enim est, quod hic negamus: quæ expositio omnibus Patribus repugnat, ut patet apud Ruard. art. 7. pag. 340. Dried. de concord. lib. arb. pag. 52. 53. & 54.

R E S P O N S I O

*Ad Censuram Assertionis vigesima
nona.*

In hac Censura nihil contra me dicitur, solum notandum est non videri Censuram hic sibi constare; hic enim vult reprobationem esse factam propter prævisum peccatum; cum circa propositionem 24. velit, afflictiones Sanctorum esse præordinatas efficaciter ante prævisionem malitiæ Tyrannorum, quæ duo non videntur bene

tur bene conſtare : nam ſi Deus præordinavit ſupplicia ſanctorum ante præviſionem Tyrannorum, quæ tamen non poterant inferri, niſi per malitiam Tyrannorum : cur non ſimiliter præordinavit ſupplicia impiorum, ante præviſionem peccatorum, licet niſi præcedentibus peccatis non potuerint inferri: nam hæc ſententia videtur bene conſtare cum illa de electione ad gloriam circa propoſitionem 1. & 2. Si enim Deus ante omnem præviſionem & abſolutam & conditionatam eorum, quæ homo per gratiam ſuam eſſet factururus &c. elegit efficaciter & abſolutâ voluntate ad gloriam omnes ſalvandos, certè conſequens, reliquos omnes ſic non electos cenſeri rejectos ante omnem præviſionem demeritorum : quod etiam ex eo convincitur, quia ſolis prædeſtinatis præparavit gratiam neceſſariam ad ſalutem, ut Cenſura docet circa Aſſertionem 2.

R E S P O N S I O

Ad Cenſuram Aſſertionis trigefimæ.

HÆc Aſſertio ſatis patet ex dictis circa aſſertionem 1. Teſtimonia autem,

tem, quæ hîc adferuntur, pleraque non loquuntur ad litteram de solis electis; nec si loquerentur, quidquam contra nos facerent: non enim negamus, numerum prædestinatorum esse certum; sed negamus, esse certum ex mera prædestinatione, quæ non præsupponat præscientiam conditionatam, ut dictum est circa propositionem. Nec nobis quidquam est commune cum errore eorum, qui præscientiam eorum, quæ homo facturus est per liberum arbitrium nudum, volunt esse causam electionis ad gratiam & gloriam, ut nobis nimis frequenter imponit Censura, non advertens de qua præscientiæ aut qualium operum loquamur.

RESPONSIO

*Ad Censuram Assertionis trigesimæ
primæ.*

HÆc Censura nihil continet præter magnam acerbitatem verborum & falsas impositiones, ne dicam columnias: nunquam enim diximus, voluntatis conversionem non esse dexteræ Excelsi, sed liberi tantum arbitrii; aut non requiri necessariò ad conversionem sufficientem
H excitationem

excitationem & præparationem, aut non requiri auxilium speciale seu Divinam cooperationem supernaturalem, quæ tantum iis immediatè præparata est, qui possunt immediatè converti, aut hominem bonam voluntatem, quâ convertatur, à se ipso sperare, sibi gratiam habere, in se ipso gloriari posse. Neque istæ propositiones hoc vel in speciem præ se ferunt, ut vehementer mirum sit, bonis Viris in mentem venisse, hæc tam atrocita nobis affingere: hæc enim apertè hæretica sunt, & similia Calvinus de Catholicis colum-niatur.

Quod de infidelitate obijciunt: admitto infideles sæpè peccare, cum Divinis instinctibus, quibus à malo avocantur & ad bonum excitantur, resistunt, & etiam gravius damnari: non tamen ideo hi instinctus ex Divina Bonitate non proveniunt. Videatur Dinyf. Areop. de Cælest. Hier. cap. 9. Quod autem dicit, me Scripturas in alios & ineptos sensus &c. detorquere; quàm merito dicat, vol ex eo patere potest, quod expositiones S. Scripturæ, quæ hîc reprehenduntur, ferè sunt omnium Patrum; expositiones autem, quibus utitur contraria sententia, ferè sunt Calvinî: ut istius loci: *faciam, ut in præceptis*

ceptis meis ambuletis : Quoties volui congregare filios tuos : Ego sto ad ostium , & pulso ; si quis mihi aperuerit &c. Deus operatur in nobis velle & perficere : Vos semper Spiritus S. resistitis : & similia. Eodem modo torquet Concilium Trid. sess. 6. cap. 5. & 6. & can. 4. item c. 11. & c. 16.

Quod ad testimonia D. Augustini attinet ; explicuimus eā summā perspicuitate in altera Apologia ; qua respondemus Censuræ Lovaniensi ; in qua selectoria quæque & majore quàm in hac delectu adferuntur. Ad illud autem quod in fine de sententia D. Augustini dicitur , satis responsum est in altera Apologia : non enim dico , D. Augustini sententiam difficile vindicari ab hæreticorum argumentis , sed contrariam sententiam ei , quæ in toto contractu erat explicata.

PERORATIO.

HÆc breviter visa sunt mihi ad hanc Censuram notanda : rogatos autem velim illos bonos Viros , ut non tam facile ad Censuras scribendas in aliorum dogmata prorumpant , antequam ea penitus intellexerint , & de mente Authoris constiterit : nam talibus scriptis vehementer

innocentes infamantur , & malevolis de-
tractionis & maledicentiæ materia submi-
nistratur , & ministeria ad honorem Dei
pertinentia impediuntur, & alia multa in-
commoda consequuntur; quæ quibus offi-
ciis compensari possint , non video. Ex-
aminent diligenter Adrianum Papam, D.
Driedonem & Ruardum & Reverendissi-
mos ac Doctissimos Præsules Martinum
Rithovium & Cunerum hujus Universi-
tatis Præclarissima Lumina, deprehendent
nostra dogmata de gratia & prædestina-
tione ab iis luculentissimè tradita esse. Fe-
cit hoc per multos menses Eruditissimus
& Reverendissimus Episcopus Middel-
burgensis , antequam quidquam in alte-
ram partem statuere vellet , & ita rem se
habere deprehendit ; cujus prudentiam &
moderationem optarem DD. Censores
secutos fuisse. Confido fore, ut ubi ipsi
omnia depositis affectibus & proposito
sibi iudicio Divino expenderint, aliter de
nostris dogmatibus judicarent. Non enim
hîc agitur , an Augustinus sit sequendus
in iis quæ contra Palagianos disputavit;
sed quæ sit D. Augustini sententia, &
potissimùm , an dogmata de grat. & præ-
dest. & lib. arb. quæ nos tradidimus, sint
conformia Scripturis , Patribus , DD. Ec-
clesiæ

clesiæ & recentioribus qui contra hæretic. disputant: nam hæc accommodatiora esse ad hæreticos refutandos & curam animarum gerendam, per se notum est; quid enim facient Pastores, cum in Universitatibus didicerint: Solis predestinatis dari auxilium sufficiens ex parte Dei: illis solis praparatam esse gratiam illam Christi, quæ est necessaria ad opus bonum: neminem Divinitus excitatum & adjutum habuisse auxilium sufficiens, nisi qui convertitur: neminem sufficienter excitatum & praparatum habere in sua potestate auxilium quo convertatur: Eum qui habet auxilium efficax, non posse non converti, & illud auxilium habere, non esse unquam in illius potestate: Ipsum consentire non relinqui in hominis libero arbitrio: Deum efficaciter, & absolutâ voluntate elegisse omnes salvandos ad gloriam immediate, ante omnem prævisionem operum, quæ adjuti gratiâ ipsius essent facturi, & statuisse efficaciter, ut hi gloriam consequerentur, nullâ requisitâ ab illis conditione, quam implere vel non implere, sit in ipsorum potestate, alios autem rejecisse: Deum ante prævisionem malitia Tyrannorum, præordinasse & prævoluisse omnia tormenta Martyrum, & his similia, quæ in hac Censura indicantur. Certè non vi-

deo, quomodo illi vel hæreticis hujus temporis respondere poterint, vel afflictas conscientias consolari. Scripsit de his subtilissimè libellum Reverendissimus D. Cunerus secutus Præceptores antiquæ scholæ Lovaniensis, ubi ea omnia dogmata clarissimè explicat, quæ nos in hac materia tradidimus, & quæ Censuræ istæ oppugnant.

Quod autem quidam dicunt, Scholasticos & recentiores non esse legendos, quod non habeant doctrinam defecatam, valde alienum est (ut nihil grave dicam) ab Ecclesiæ & omnium Universitatum aliarum consuetudine: non enim illi minus quàm nos, aut Scripturas, aut D. Augustinum aliosve Patres intellexerunt, eum plerique ingenio etiam præstantiores fuerint.

F I N I S.

PUNCTA QUÆDAM

*Quibus explicatur exordium &
Progressus controversiæ*

C U M

DOCTORIBVS.

LOVANIENSIBVS.

Dogmata, quæ ab iis reprehenduntur, tradita sunt unum annum, & amplius, antequam ipsi in ea inquirere cæperint: nam prælecta sunt anno 86. circa Pascha, & publicè in scholis nostris defensa præsentè quodam M. Nostro, & quibusdam Licentiatis; nec quisquam, quod sciam, illa ausus est damnare: nempo vivebat tunc adhuc Reverendissimus & Illustrissimus Nuntius Apostolicus, qui hanc tragædiam non permisisset excitari. Verùm anno sequenti, cum nulla esset amplius de illis quæstionibus mentio, & aliæ materiæ à nobis tractarentur, moritur idem Illustrissimus Nuntius Apostolicus: quo mortuo statim multi Magistri Nostri in nostra scripta inquirere cæperunt, & ea reprehendere, quæ ante annum docueramus.

2. Anno 87. primâ hebdomadâ Paschatis moniti sumus à quodam Doctore, Facultatem aliquid contra dogmata nostra machinari, & paulò post intelleximus, eos in lectiones nostras ab Auditoribus exceptas inquirere. Post tres hebdomadas obtulerunt nobis ingentem fascem scriptorum, rogantes an ea pro nostris agnosceremus. Respondimus, non esse otium omnia illa perlustrandi, si quid illis displiceret, id exciperent. Itaque paulò post

exhibe

exhibuerunt nobis quādam propositiones hinc inde ex nostris lectionibus ab Auditoribus exceptis detractas & avulsas, omissis iis, unde possent intelligi, petentes an eas pro nostris agnosceremus: respondimus, nostras esse, sed truncatas & suis locis avulsas, ita ut qui eas lecturi essent, non facile possent intelligere, quorsum aut quā occasione dictæ essent. Itaque confecimus 34 conclusiones, quibus continerentur omnia dogmata quæ ipsi norassent, & exprimerentur quādam clarius, quæ ipsi non videbantur intellexisse, quas obtulimus D. Decano tunc temporis M. N. Gandano, præsentē M. N. Cuyckio 1^o & Maii in Collegio Atrebatensi, simulque petivimus nomine Provincialis & Collegii, ut D. Decanus Facultati proponeret, ut ipsa duos dignaretur deputare, qui nobiscum coram arbitris hinc inde à partibus deligendis de istis sententiis tractarent; & nostram explicationem audirent, & quæcumque vellent circa easdem sententias à nobis peterent; quod Decanus dixit se facturum, sed Facultas colloquium recusavit.

3. Circa initium Junii venerunt ad nos duo Deputati, qui scriptum illud ex nostris lectionibus excerptum repeterent: Respondum fuit, ut inducerent Facultatem, ut duos deputaret, qui nobiscum, ut supra, coram Arbitris colloquerentur, & scriptum illud nos ibi exhibituros, habere enim nos rationes, cur aliter nos exhibere nolumus. Idem illius P. Rector & Professores à variis Doctoribus instanter petierunt, sed nunquam potuit obtineri.

4. Post paucos dies venit ad P. Provinciale M. N. Cuyckius, conquerens quod excerpta à Facultate nollemus exhibere. Quare Provincialis radio affectus, altero ex Professoribus vocato, rogavit quid videretur: Respondit ille, se para-

tum

tum esse exhibere, si ipsi videretur, nihil enim in excerptis esse periculi. Itaque P. Provincialis illa D. Cuyckio tradidit, qui cum indicaret Facultatem contra aliquam scripturam, respondit, si Facultas aliquid scripserit, eg. illud mittam Romam.

5. Initio Augusti descripta fuerunt multa exemplaria in Collegio Theologorum per septem studiosos, cognitumque per totam civitatem, Facultatem S. Theol. Patrum dogmata sua Censurâ damnasse: & paulò post rursus multa exemplaria per studiosos ibidem descripta sunt. Initio Septembris significatum est nobis à quodam Magistro Nostro, nobis postero die exhibitum iri à Facultate quoddam scriptum. Petit ab eo P. Rector, quidnam Facultas per illud scriptum à nobis exigeret. Respondit ille, ut videatis. Respondit Rector, nos ad vestrum scriptum non respondebimus, nisi ante miserimus illud ad R. P. N. Generalem: idem alter Professorum multis studiosis dixit, addens rem esse magni momenti à communitate atque adeo ab integra Facultate oppugnari: quare nos etiam consilio nostri Generalis uri debere.

6. Duodecimo Septembris exhibita est nobis Censura Facultatis per Bedellum, qui nihil aliud dixit, quam se à Facultate missum esse, ut hoc scriptum Rectori nostri Collegii traderet. Respondit Rector, ut renunciaret, se accepisse: neque Bedellus neque aliquis Magistrorum Nostrorum antea vel post unquam rogavit, ut scriptum illorum vel Censuram Romam non mitteremus; multò minus pactum aliquod tale inter nos initum fuit: semper enim testati sumus, nos si quid à Facultate contra nostram doctrinam scriberetur, illud Romam missuros; ibi enim nos eam hausisse. Unde verum non est, quod quidam Doctores scribunt in suis
episto-

epistolis ; Facultatem , cum nobis Censuram tradere , rogasse ne cuiquam illam communicemus , & nos id promississe , & se non fuisse communicaturos Censuram suam ulli Episcopo , nisi nos eam Romam prius misissemus & inter discipulos publicassemus : hæc enim omnia possunt convinci manifesta falsitatis. Paulò post sex rursus exemplaria Censuræ describuntur in ædibus Pastoris S. Michaelis , ut per Belgii varia loca spargerentur , & tunc passim in manibus studiosorum habebantur , & eodem mense ad varios Episcopos missa sunt.

7. Initio Octobris sollicitati fuerunt varii Episcopi per Reverendissimum Mechliniensem , ut iudicium suum statim de Censura perscriberent , sicut intelleximus tum variis rumoribus , tum litteris Reverendissimi Iprensis , & quorundam aliorum. Scriptum est etiam à Reverendissimis Mechliniensi , Liudano , & Venderilio communi consilio ad Reverendissimum Cameracensem , ut iudicium Facultatis S. Theologiæ Duacensis & Sorbonæ exquireretur. Missa etiam fuit Censura Duacum eodem tempore à Doctoribus Lovaniensibus. Nos autem Censuram cum Nostra Apologia tandem misimus Romam ad P. N. Generalem circa medium Octobris. In Belgio autem à nobis nemini communicata fuit Censura vel Apologia , præterquam uni Episcopo , quem Facultas præterierat , qui eam aliquot menses diligentissimè examinavit , antequam quicquam statueret , & R. P. Provinciali ; ex studiosis nemini , nisi in decembri , & tunc duobus tantùm communicavimus , ut haberent , quod ad Censuram responderent Eodem tempore , scilicet initio Octobris , quo passim per Belgium spargebatur Censura , & sollicitabantur iudicia Prælatorum , Lovanii instituta fuit lectio publica con-

tra nostra dogmata de auxilio sufficienti & efficaci, quæ commissa fuit M. N. Jacobo Janfonio, quâ simul sententia Facultatis explicaretur, ut dicebant, & nostra refutaretur: nempe ut uno imperu & eodem tempore domi forisque prosterneremur. Et postea in scholis publicis frequenter, etiam postquam Reverendissimus & Illustrissimus D. Nuntius Facultati silentium imposuerat, per Doctores Pelagianismi notati sumus.

8. Circa Decembrem Reverendissimus Mechliniensis iterum atque iterum sententiam Reverendissimi Iprensis (qui cæteris magis fuerat cunctabundus) petiit cum significatione, Episcopos omnes & vicinas Universitates judicium suum jam dudum misisse. Itaque ille sub finem Decembris misit breviter suam & Theologorum Ecclesiæ suæ sententiam subscribens Censuræ Lovaniensi: decimo tertio Decembris scribit alter Professorum epistolam ad R. P. Provinciale continentem quatuor rationes, quibus Facultas Duacensis istic per nostros a scribenda Censura abduci posset, sed nihil effecerunt. Decimo quarto Decembris monitus fuit Reverendissimus D. Mechlinien. nomine Concilii Privati Bruxellæ, ut dignaretur Facultatem Duacensem impedire, ne Censuram contra nos perscriberet, sed judicium Romanum præstolaretur: sed nihil secutum est.

9. Vigesimo Januarii 88. prodit Censura Duacensis, quam tandem accepimus à Reverendissimo Mechliniensi, 8. Martii Interim per totam Patriam apud summos & infimos, apud Ecclesiasticos & sæculares, atque etiam apud milites tanquam Pelagiani & hæretici trahebamur adeo ut D. Præses Pamelius & quidam alii Viri magni in Aula graviter nobis indignarentur, & reprehenderent nostram,

nostram ; ut ipsi dicebant , socordiam ; quod in causa tanti momenti minimè nos defenderemus. Quà re motus P. Provincialis scripsit quamdam epistolam in Januario ad quemdam Canonicum , quàm simpliciter rem , ut erat , explicuit , & inter cetera questus est ; quod inauditi , etsi frequenter rogassemus audiri , damnati essemus. Contra quam & Professoris epistolam quidam Doctores plurimas & acerbissimas per totam Patriam litteras sparserunt , nempe quod ab ipsis tamquam hæretici per totam Patriam traducti auderemus nos contra Facultatem defendere , & publicè testari multa falsò ab ipsis nobis imponi , & indignè nobiscum actum esse : Videbanturque totam controversiam ad contentionem verborum & querelam injuriæ velle transferre.

10. Undecimo Februarii tandem accepimus litteras Reverendissimi Mechliniensis tertio ejusdem datæ , quibus significabat de Censura Duacensi edita , & à nobis tria petibat. Primum , ut sententiam nostram , sicuti minus intellecti essemus , clarius exprimeremus. Secundum , ut ostenderemus , si quid à Facultate esset erratum in colligendis Assertionibus. Tertium , in quo moderni Professores Theologiæ à suis antecessoribus recedant. Misimus illi sex propositiones , quibus nostram sententiam expressimus , & capita quædam eorum , quæ falsò imposita , & quæ propositiones non bene ab ipsis intellectæ essent , indicavimus , & quasdam illorum sententias , in quibus maxime à nobis in præsentī dumtaxat materia viderentur dissentire , bonâ fide partim ex illorum dictatis , quæ in omnium passim habentur manibus , partim ex Censura collegimus (aliunde enim eas habere nequimus , nam nunquam voluerunt suas sententias

Sententias scripto authenticè aperire, etsi interdum à nobis rogati) in quibus sententiis valde à suis Majoribus recedere videntur: & simul rescriptimus eidem Reverendissimo D. ut Facultatem dignaretur inducere, ut nobiscum in colloquium coram Arbitris venire non gravaretur: quod idem binis aliis litteris, cum nihil secutum esset, P. R. petiit.

11. Circa initium Maii sparsum fuit quoddam scriptum per quosdam, ut dicitur, Doctores; suppressis tamen Auctorum nominibus, in quo multis conviciis nos proscindunt, sicuti ante in variis epistolis ubique sparsis fecerant: nempe quod statum controversiæ hominibus patefecerimus. Sed præcipuam causam dicunt, quod illis multa ibi falsa imponamus. Ad quod respondimus, nos, quæ ibi dicuntur, probaturos coram Reverendissimo & Illustrissimo D. Nuntio Apostolico, itaque quietem agerent: Similiter ipsorum fore probare, quæ nobis falsa in sua Censura imponunt.



The first thing I saw when I
 stepped out of the house was
 a bright sun shining down on
 the road. The air was warm
 and the smell of fresh earth
 was everywhere. I felt a sense
 of peace and freedom that I
 had never experienced before.
 The road was wide and straight,
 leading me towards the horizon.
 I walked for hours, feeling the
 sun on my face and the wind
 in my hair. The landscape was
 beautiful, with rolling hills and
 a clear blue sky. I felt like I
 was in a dream world, and I
 didn't want to wake up.
 As I walked, I thought about
 the future and the possibilities
 that lay ahead of me. I felt
 a sense of hope and optimism
 that I had never felt before.
 The sun was still shining when
 I reached the end of the road.
 I stood there for a moment,
 looking back at the path I had
 traveled. I felt a sense of accomplishment
 and pride in what I had achieved.
 I knew that this was just the
 beginning of my journey, and
 I was excited to see what the
 future held for me.

